

PAGPALAPIT KAY KRISTO

PAUNA

ANG TITULO sining diutay nga tolon-an nagasugid sang iya buluhaton. Nagatudlo sia sa kay Ginoong Jesukristo subung nga amo lamang ang makasugata sang ginakinahanglan sang kalag sang tawo, kag nagatuytuy sia sang tiil sang mga nagaduhaduha kag nagadologdolog sa banas sang paghidaet. Nagaagubay sia sa mga nagapangita sang katarungan sa tikang kag tikang sa banas sang kabuhi Kristohanon pakadto sa sinang kabugosan sang pagpakamaayo nga makita sa himpit nga pagtugyan sang kaugalingon kag sa dimationg nga pagsalig sa manugluwas nga bugay kag sa manugbantay nga gahum sang Abyan sang mga makasasala. {PK 5.1}

Ang mga pagtudlo nga makita sa sining pamihak, nagdala sing kalipay kag paglaum sa madamu nga kalag nga pinalisang, kag nagbulig sa madamu nga sumulonod sang Agalon sa paglakat sing labi kamasinaligon kag labi kamalipayon sa mga tikang sang ila langitnon nga Manugmando. Ginalauman nga magadala sia sang amo man nga balita sa madamu pa gid sadtong nagakinahanglan sang amo man nga bulig. {PK 5.2}

Ini nga tolon-an, nga sa kamunuan ginsulat sang manunulat sa Iningles, ginbadbad sa 59 ka nagkalainlain nga hambal kag ang kabilogan nga gintagtag sa bugos nga kalibutan mga 5,000,000 ka huwad. Ang bumalasa nga Pilipinhon magamalipayon sa paghibalo nga ang tolon-an nahanda man sa Bikol, Sebuano, I- ninsik, Ilokano, Iningles, Pampango, Kinastila kag Tagalog. {PK 5.3}

Ang mga dinalan sang Balaan nga Kasulatan nga ginasambit diri, ginkuha sa pagbadbad nga ginagamit sing labi sa hambal nga Panayan, luwas sadtong may kasaysayan. {PK 6.1}

MANUGPAMANTALA

{PK 9.1}

BAHIN 1

ANG GUGMA SANG DIOS SA TAWO

ANG MGA tinuga kag ang mga Balaan nga Kasulatan sila nagapamatuud nga tanan nahanungud sang gugma sang Dios. Ang aton Amay nga langitnon amo ang tuburan sang kabuhi, sang kaalam kag sang kalipay. Toloka ang mga makatilingala kag ang mga matahum nga mga butang nga tinuga. Dumduma ang ila makatilingala nga naigo-an sa mga kinahanglan kag kalipayan, dili lamang sang mga tawo, kondi sang tanan nga mga tinuga nga nagakabuhi. Ang silak sang adlaw kag ang ulan, nga nagapalipay kag nagapabugnaw sang duta, ang mga bungyod, kag ang mga kadagatan kag ang mga kapatagan, ini sila nga tanan nagahambal sa aton nahanungud sang daku nga gugma sa aton sang Manunuga. Ang Dios amo ang nagasakdag sang matag-adlaw nga kinahanglanon sang tanan Niya nga mga tinuga. Sa matahum nga mga pamulong sang manugsalmo: {PK 9.2}

“Ang mga mata sang tanan nagahulat sa Imo, kag Ikaw nagahatag sa ila sang ila kalanon sa iya panag-on; ginahumlad Mo ang Imo kamut. kag ginabusug Mo sing pagpakamaayo, ang handum sang tanan nga nagakabuhi.” Salmos 145:15, 16. {PK 9.3}

Ang Dios naghimo sa tawo nga himpit, balaan kag malipayon; kag ang magayon nga duta sang gumikan sia sa kamut sang Manunuga, wala gid sing dala nga bayhon sang pagkadunut okon landong sang pagpakamalaut. Ang paglapas sang kasogo-an sang Dios—ang kasogo-an sang Gugma—amo ang nagdala sing kasakitan kag sing kamatayon. Apang bisan pa sa tunga sang mga pag-antus nga amo ang pinatubas sang sala, ang gugma sang Dios ginapahayag. Nasulat na nga ang Dios nagpakamalaut sang duta tungud sa tawo. Genesis 3:17. Ang mga tunok kag ang mga sapinit—ang mga kaiwatan kag ang mga pagtilaw nga nagapabudlay kag nagapahimud-os sini nga kinabuhi—ginlalang nga sa iya kaayohan, subung nga bahin sang kinahanglan nga paghanas nga ginplano sang Dios agud sa pagbayaw sa iya gikan sa kalaglagan kag mga kaimolan nga nahimo sang sala. Ang kalibutan, bisan nga nahulog sa sala, wala mabug-os sa kasuluban kag sa kaimolan. Yara sa mga butang nga tinuga makita ang mga balita sang paglaum kag kalipay. May yara nga mga bulak sa mga gamhon kag ang mga kasapinitan napunan sing mga bukad. {PK 9.4}

“Ang Dios Gugma”

“Ang Dios amo ang gugma,” amo ang nasulat sa tagasa ka bukol nga nagapamuskad, sa ibabaw sang tanan nga gutuk sang nagapamuhi nga hilamon. Ang mga matahum nga mga kapispisan nga nagapuno sang mga kahanginan sing kalipayan bangud sang ila mga masinadyahon nga mga paghinunihuni, ang mga bulak nga napamugtakan sing mga katahuman sa ila kahimpitan nga nagapahamut sang kahanginan bangud sang ila kaamyon, ang mga mataas nga mga kakahoyan sa mga kabukiran nga may mga malagtum nga mga dahon—tanan nagapamatuud sang malolo, inamay nga pagtatap sang aton Dios, kag sang Iya handum sa paglipay sa Iya mga inanak. {PK 10.1}

Ang polong sang Dios nagapahayag sang Iya mga kinaugali. Sia sa Iya kaugalingon

nagpahayag sang Iya dili matupungan nga gugma kag kalooy. Sang pagpangamuyo ni Moises, “Ginaampo ko sa Imo, nga pagtugutan Mo ako sa pagtan-aw sang Imo himaya,” ang Ginoo nagsabat, “Pagahimoon Ko, nga mag-agi ang Akon bug-os nga kaayohan sa atubangan sang imo itololok.” Eksodo 33:18, 19. Ini amo ang Iya himaya. Ang Ginoo nag-agi sa atubangan ni Moises, kag nagsiling, “Jehoba, Dios nga maloloy-on kag mahinoklogon, inanay sa kaakig, kag bugana sa kalooy kag sa kamatooran; nga nagatigana sing kalooy tubtub sa linibo ka kaliwatan, nga nagapatawad sang kalautan, kag sang pagkamalalison, kag sang sala.” Eksodo 34:6, 7. “Inanay Sia sa pagpangakig, kag bugana sing bugay” (Jonas 4:2), “kay nagakahamuut Sia sang pagkalooy” (Mikeas 7:18). {PK 11.1}

Nahigot Kita sa Iya

Ang Dios naghigot sang aton mga tagiposoon sa Iya bangud sang mga dili maisip nga mga kalatingalahan sa langit kag sa duta. Bangud sang mga butang nga mga tinuga, kag sa mga madalum kag mga malolo nga mga paghiliusa nga dutan-on nga sarang mahangup sang tawhanon nga kasingkasing, ginhimulatan Niya sa pagpahayag ang Iya kaugalingon sa aton. Bisan pa nga ini tanan nga mga kasanagan ginhatag, ang kaaway sang kaayohan nagpadulum sang paino-ino sang mga tawo, agud nga magtolok sila sa Dios nga may kahadluk; nagahunahuna sila sa Iya subung nga mabangis kag dili mapintawaron. Si Satanas nagtuytuy sa tawo sa paghuput sing panghunahuna nga ang Dios mapintas—hukom nga mabangis, bukaras, kag manugsukot sing tama kaid-id sang utang. Ginlarawan niya ang Manunuga subong nga Isa nga nagabantay sa maimon nga mata sa pagtalupangud sang mga kasaypanan sang tawo, agud nga magdu-aw Sia sa ila sa paghukom. Si Jesus nagkari kag nagpuyo sa tunga sang mga katawohan agud sa pagpanas sining madulum nga landong, bangud sa pagpahayag sa kalibutan sang dili matupungan nga gugma sang Dios. {PK 11.2}

Ang Anak sang Dios nagkari gikan sa langit sa pagpahayag sang Iya Amay. “Walay sino nga nakakita sa Dios. Ang Anak nga bugtong, nga yara sa sabak sang Amay, Sia ang nagpakilala sa Iya.” Juan 1:18. “Bisan sa Amay wala sing may nakakilala, kondi ang Anak, kag ang kon sin-ong nahamut-an sang Anak nga napahayagan.” Mateo 11:27. Sang pagpangabay sang isa sang mga gintoton-an, “Ginoo, ipakita sa amon ang Amay,” si Jesus nagsabat, “Kadugay na, nga yari Ako kaupud ninyo, kag wala ka makakilala sa Akon, Pelipe? Ang nakakita sa Akon, nakakita sa Amay; busa; ngaa nga nagsiling ka: ipakita sa amon ang Amay?” Juan 14:8, 9. {PK 12.1}

Ang Buluhaton ni Jesus

Sa pagsaysay sang Iya dutan-on nga buluhaton, si Jesus nagsiling, ang Ginoo “naghidhid sa Akon, kag ginpadala Niya Ako sa pagtunda sang mga maayong balita sa mga imol; sa pagbolong sa mga mahinulsulon sing tagiposoon; sa pagbantala sang kaluwasan sa mga bihag, kag sang pagpasag-uli sang itololok sa mga bulag; sa pagpanginluwas sa mga piniutan.” Lukas 4:18, sa Griego. Ini amo ang Iya buluhaton. Naglakat Sia sa paghimo sing mga maayo, kag sa pagbolong sa tanan nga ginapigos ni Satanas. May yara nga bugos nga mga minoro nga sa iya dili mabati-an ang mga pagsininggit nga sa kasakit sa bisan diin nga balay; tungud kay nag-agi Sia sa ila kag ayohon sila sa ila mga balati-an.

Ang Iya buluhaton nagapamatuud sang Iya langitnon nga pagkatinawag. Ang gugma, kalooy, kag ang pagkamahinoklogon ginpahayag sa tagsa ka buhat sang Iya kabuhi; ang Iya tagiposoon malolo nga may pagkaawa sa mga inanak sang mga tawo. Ginsuklub Niya ang dagway sang tawo, agud nga madangat Niya ang mga kinahanglanon sang tawo. Ang labing imol kag ang labing kubus dili mahadluk sa pagpalapit sa Iya. Bisan ang magagmay nga mga kabataan maluyag magpalapit sa Iya. Nagahigugma sila sa pagpasabak sa Iya, kag magtangla sa Iya nawung nga mapinalandongon nga nagasilak sing paghigugma. {PK 12.2}

Malolo Sia sa Iban

Si Jesus wala magbuhin sing isa ka taga sang kamatooran, kondi ginmitlang Niya ang labing daku nga kaalam, kag hunahuna, malolo nga pagtatap, sa Iya mga pagpakig-upod-upod sa mga tawo. Wala gid Sia magbukaras, wala gid magmitlang sing matigdas nga mga polong nga walay pulus, wala gid maghatag sing bisan diutay nga kasakit sa mabinyagon nga kalag. Wala Sia magkaakig sa mga kaluyahon sang tawo. Naghambal Sia sang kamatooran, apang lunsay sa gugma. Ginsabdong Niya ang pagkasalimpapaw, ang pagkadimatinoohon, kag ang kalautan; apang ang mga luha yara sa Iya tingug sa nagahambal Sia sing mga masakit nga mga pagsabdong. Nagtangis Sia tungud sang Jerusalem, ang banwa nga Iya ginhigugma, nga nagdumili sa pagbaton sa Iya, nga amo Sia ang dalan, ang kamatooran kag ang kabuhi. Ginsikway nila Sia, nga amo ang Manluluwas, apang ginkahanoklogon Niya sila. Ang Iya kabuhi amo ang isa nga dili maiya-iyahon kag mainatipanon sa kaayohan sang iban. Ang tagsa ka kalag hamili sa Iya mga mata. Bisan nga nagadala Sia sa Iya kaugalingon sing langitnon nga pagkahalangdon, nagpaubus Sia nga may kalolo sa tagsa ka kabahin sang panimalay sang Dios. Sa tanan nga mga tawo nakita Niya ang nahulog nga mga kalag nga amo ang Iya ginkari-an nga pagaluwason. {PK 13.1}

Ginpahayag Niya ang Dios

Ini amo ang kinaugali ni Kristo subung nga pinahayag sa Iya kabuhi. Ini amo ang kinaugali sang Dios. Ang tuburan sang langitnon nga pagkalooy, nga napahayag sa kay Kristo, nga naga-ilig sa mga inanak sang tawo, nagagikan sa tagiposoon sang Dios. Si Jesus ang malolo kag mahinoklogon nga Manluluwas, amo ang Dios nga “pinahayag sa unud.” 1 Timoteo 3:16. {PK 14.1}

Si Jesus nagkabuhi kag nag-antus kag namatay agud sa pagtubus sa aton; nanginlalaki Sia sang mga kasakit, agud nga mangin-umalambit kita sang walay katubtuban nga kalipay. Ang Dios nagtugut sa Iya hinigugma nga Anak, nga puno sang bugay kag sang kamatooran, sa pagbiya sang kalibutan nga dili masaysay ang iya himaya pakadto sa kalibutan nga nadagtaan kag nabulit sang sala, nga ginpadulum sang landong sang kamatayon kag pagpakamalaut. Gintugutan Niya Sia sa pagbiya gikan sa sabak sang Iya gugma, kag gikan sa pagsimba sang mga manugtunda, sa pag-antus sing mga kahuluyan, mga pagbuyayaw, mga pagpakakubus, mga pagdumut kag kamatayon. “Ang silot, ang bili sang aton paghidaet sa ibabaw Niya; kag sa Iya mga pilas may pagkaayo nga sa aton.” Isaias 53: 5. Tan-awa Sia sa kahanayakan, sa Getsemane, sa ibabaw sang krus! Ang walay dagta nga Anak sang Dios nagdala sa Iya kaugalingon sang lulan sang sala.

Sia nga nanginkaupud anay sang Dios, nagbatyag sa Iya kalag sang mapait nga pagbulagay nga nahimo sang sala sa tunga sang Dios kag sang tawo. Ini nagpagowa gikan sa Iya mga bibig sang mapait kag masinakiton nga pagsinggit. “Dios Ko, Dios Ko, ngaa ginpatumbayaan Mo Ako?” Ang lulan sang sala, kag ang pagbatyag sang iya kabug-at kag sang Iya pagpabulag sang kalag gikan sa Dios—ini amo ang nagsisi sang tagiposoon sang Anak sang Dios. {PK 14.2}

Ang Amay Nagahigugma Man sa Aton

Apang ining daku nga mga pag-antus wala paghimo-a agud sa pagtuga sa tagiposoon sang Amay sing gugma sa tawo, bisan sa pagpahanda sa Iya sa pagluwas. Wala, Wala! “Ginhigugma sang Dios ang kali-butan, sa bagay nga ginhatag Niya ang Iya bugtong nga Anak.” Juan 3:16. Ang Amay nagahigugma sa aton, dili kay tungud sang daku nga katumbasan, kondi nga ginhimo Niya ang katumbasan tungud kay ginhigugma Niya kita. Si Kristo amo ang alagyan nga sa Iya mapailig Niya ang Iya walay katubtuban nga gugma sa nahulog nga kalibutan. “Ginapasag-uli sang Dios ang kalibutan sa Iya kay Kristo.” 2 Korinto 5:19. Ang Dios nag-antus kaupud sang Iya Anak. Sa Iya paghimugto sa Getsemane sa kamatayon sa Kalbaryo, ang tagiposoon sang Walay Katubtuban nga Gugma nagbayad sang kabilihanang pagtubus sa aton. {PK 15.1}

Si Jesus nagsiling, “Tungud sini ang Amay nagahi-gugma sa Akon kay Ako nagahatag sang Akon kabuhi, agud nga Akon sia pagkuhaon liwan.” Juan 10:17. Sa isa ka polong, “Ang Akon Amay nagahigugma sa inyo sa bagay nga ginhigugma pa gid Niya Ako sing labi tungud sang paghatag Nakon sang Akon kabuhi sa pagtubus sa inyo. Sa paghimo sa Akon nga tal-us kag kalig-onan bangud sa pagtugyan Ko sang Akon kabuhi agud sa pagkuha sang inyo mga kautangan, sang inyo mga pagkamalinapason, ginpakamahal Ako sang Akon Amay tungud kay bangud sang Akon mga pag-antus ang Dios nagnanginmatarung, kag labut pa, nagmanugpakamatarung sa sadtong mga magatoloo sa kay Jesus.” {PK 16.1}

Ngaa si Kristo Nagkari?

Wala sing liwan luwas lamang sang Anak sang Dios ang makahikot sang aton kaluwasan; tungud kay Sia lamang nga naggikan sa sabak sang Amay ang takus makapahayag sa Iya. Sia lamang nga amo ang nakahibalo sang kataason kag sang kadalumon sang gugma sang Dios ang sarang makapahayag sa Iya. Wala sing kubus sang sa walay katubtuban nga pag-antus nga nahimo ni Kristo tungud sa nahulog sa sala nga mga tawo ang makapahayag sang gugma sang Dios sa nadula nga mga katawohan. {PK 16.2}

“Kay ginhigugma sang Dios ang kalibutan, sa bagay nga ginhatag Niya ang Iya bugtong nga Anak.” Ginhatag Niya Sia dili lamang nga magkabuhi kaupud sa mga tawo, sa pagpas-an sang ila mga sala kag sa pagpanginmatay nga halad nila, kondi nga ginhatag Niya Sia sa nahulog nga kaliwatan nga tawhanon. Si Kristo dapat sa pagpakig-ambit sa Iya kaugalingon sa mga buluhaton kag mga kinahanglanon sang mga katawohan. Yadtong Isa nga nanginkaupud sang Dios nagpakigbuylog sa Iya kaugalingon sa mga inanak sang tawo bangud sa higot nga dili gid mabugto. Si Jesus “wala sing kahuya sa pagtawag sa ila nga mga utud.” Hebrienhon 2:11. Sia amo ang aton halad, aton

mananabang, aton utud, nga nagdala sang aton dagway nga tawhanon sa atubangan sang lingkoran nga harianon sang Amay, kag sa sulud sang walay katubtuban nga katuigan manginisa sila sang kaliwatan nga Iya tinubus—ang Anak sang tawo. Kag ini nga tanan ginll imo agud nga ang tawo mabayaw gikan sa kalaglagan kag kahuluy-an sang sala, agud nga mapasilak niya ang gugma sang Dios kag maka-ambit sang kalipayan sang pagkabalaan. {PK 16.3}

Ang Bili nga Ginbayad

Ang bili nga ginbayad sa pagpanubus sa aton, ang walay katubtuban nga halad sang aton langitnon nga Amay sa paghatag sang Iya Anak sa pagpanginmatay tungud sa aton, dapat sa paghatag sa aton sing mataas nga paghangup kon mangin-ano kita bangud sa kay Kristo. Ang pinadala nga si Juan nga ginadaldal sang Espiritu Santo, sang nakita niya ang kataason, ang kadalumon, ang kasangkaron, sang gugma sang Amay sa nagakadula nga katawohan, napun-an sia sing daku nga pagpakabalaan kag pagtahud; kag sang kinulangan sia sing nagakaigo nga polong sa pagpahayag sang kadakuon kag sang kalolo sini nga gugma, gintawag niya ang kalibutan sa pagtan-aw sa iya. “Tan-awa ninyo kon daw anong gugma, nga ginhatag sa aton sang Amay, nga ginatawag kita nga mga anak sang Dios.” 1 Juan 3:1. Daw ano nga kabilihanan ang ginhatag sa tawo! Bangud sa pagkamalinapason, ang anak sang mga tawo nangin-ulipon ni Satanas. Bangud sa pagtoo sa manugtumbas nga halad ni Kristo, ang mga inanak ni Adan mangin-anak sang Dios. Bangud sa pagkuha sang dagway sang isa ka tawo, si Kristo nagbayaw sang mga katawohan. Ang nahulog nga mga tawo nabutang sa kahimtangan nga bangud sa pagpakighiangot sa kay Kristo, sa pagkamatuud mangintakus sila sang ngalan nga “mga anak sang Dios.” {PK 17.1}

Ang Dili Matupungan nga Gugma

Ang kasubung nga gugma dili maangayan. Mga anak sang langitnon nga Hari! Hamili nga saad! Halambalanon sa labing madalum nga pagpamalandong. Ang dimatupungan nga gugma sang Dios sa kalibutan nga wala nagahigugma sa Iya! Ang aton hunahuna may mandadaug nga paggahum sa kalag kag nagadala sang painoino sa pagpasakup sa kabubut-on sang Dios. Sa nagalabi ang aton pagtoon sang langitnon nga kinaugali sa kapawa sang krus, nagalabi man kasanag ang aton pagtan-aw sang kalooy, sang kalolo, kag sang kapatawaran nga natingban sing pagkaalangay kag katarungan, kag nagalabi man kaathag ang paghangup naton sang dili maisip nga mga kasanagan sang gugma nga dili matungkad, kag sang mahumok nga pagkalooy nga nagalabaw pa sang sa labing daku nga paghikalooy sang isa ka iloy sa iya naglaug nga anak. {PK 18.1}

BAHIN 2

ANG KINAHANGLAN SANG MAKASASALA

ANG tawo sa ginsuguran ginhatagan sing halangdon nga gahum kag sing hunahuna nga nagakabagay. Himpit sia sa iya panglawason, kag nagakasinanto sa Dios. Ang iya mga hunahuna mga putli, ang iya mga tinutuyo mga balaan. Apang bangud sang pagkamalinapason, ang iya gahum ginbaliskad, kag ang pagkamaiya-iyahon amo ang nagtal-us sa baylo sang gugma. Ang iya kinaugali nagluya bangud sang pagkamalinapason sa bagay nga maiwat sa iya, sa iya kaugalingon nga kusug, ang pagbato sa gahum sang malaut. Nanginbinilanggo sia ni Satanas kag magapabilin sia sa sina nga bagay sa gihapon kon ang Dios wala magpatunga sa ila. Katuyu-an sang manunulay ang pagsablag sang langitnon nga tuyo sa pagtuga sa tawo, kag pun-an ang kalibutan sing pagkakailo kag mga kalaglagan. Kag ginapabangud niya ini nga mga kalautan subung nga patubas sang buhat sang Dios sa pagtuga sa tawo. {PK 19.1}

Sa iya walay sala nga kahimtangan, ang tawo nagaagum sing malipayon nga pagpakighambal sa Iya nga “yara natago ang tanan nga mga bahandi sang kaalam kag pagkilala.” Kolosas 2:3. Apang sa tapus sang iya pagpakasala, dili na sia makakita sing kalipay sa iya pagkabalaan, kag nagtinguha sia sa pagpanago gikan sa atubangan sang Dios. Ina amo sa gihapon ang kahimtangan sang wala maliwan nga tagiposoon. Wala sia nagaugyon suno sa Dios kag wala sia sing kalipay sa atubangan sang Dios; magalikaw sia sa pagpakig-upodupod sa mga balaan. Kon pagtugutan sia sa pagsulud sa langit, ini mangin walay kalipayan nga sa iya. Ang espiritu sang gugma nga dimaiyaiyahon nga nagahari didto—nga sa diin ang tanan nga mga tagiposoon nagasuno sa tagiposoon sang Walay Katubtuban nga Gugma—dili makatandug sang balatyagon sang iya kalag. Ang iya hunahuna, ang iya mga buluhaton, ang iya mga tinutuyo, manginlain sa sadtong ila sang mga walay sala nga nagapuluyo didto. Manginlibagon sia sa matam-is nga mga pagsinundanay sa langit. Sa iya ang langit manginduug nga sililutan; magahandum sia sa pagpanago gikan sa sadtong Isa nga amo ang iya kapawa, kag ang alibutud sang iya kalipay. Dili bangud sa sogo nga mapintas sa bahin sang Dios ang pagsikway sang mga makasasala gikan sa langit; kondi nga ginasikway sila sang ila kaugalingon nga pagkadilitakus sa pagpakigupod-upod sa iya. Ang himaya sang Dios manginmanugpapas nga kalayo nga sa ila. Ginapakamaayo pa nila ang pagbaton sing kalaglagan, agud nga matago sila gikan sa nawung sadtong namatay sa pagtubus sa ila. {PK 19.2}

Wala Kita Sing Gahum

Indi gid mahimo sa aton kaugalingon, ang paglikaw gikan sa kadadalman sang sala nga nahulogan naton. Ang aton mga tagiposoon mga malaut, kag dili naton mabaylohan sila. “Sin-o bala ang makapatinlo sang tawo nga mahigko? Wala sing bisan sin-o.” Job 14:4. “Kay ang panghunahuna sang unud, kaaway nga sa Dios; kay wala sia pagpasakup sa kasogo-an sang Dios, kag indi gid makasarang.” Roma 8:7. Ang kalantipan, ang pinaniiran, ang paghanas sang kabubut-on, ang pagpanikasug nga tawhanon, tanan sila may naigo-an, apang diri sini wala sila sing gahum. Ayhan makapakita sila sing maayo

nga mga pagginawi sa pagkabul-anan sa sagwa, apang dili sila makabaylo sang tagiposoon; dili sila makapaputli sang mga ilig sang kabuhi. Kinahanglan nga may yara nga gahum nga magapangabudlay gikan sa sulud, isa ka bag-o nga kabuhi gikan sa kahitaasan, sa wala pa ang tawo mabaylo gikan sa sala pa pagkabalaan. Ina nga gahum amo si Kristo. Ang Iya bugay amo lamang ang makabuhi sang mga patay nga mga balatyagon sang kalag, kag papalapiton sia sa Dios, sa pagkabalaan. Ang Manluluwas nagsiling “walay sin-o nga sa wala ikapanganak sa ibabaw,” luwas la-mang kon mabaton niya ang bag-o nga tagiposoon, bago nga mga handum, mga hinyo, kag bag-o nga mga tinutuyo, nga magadul-ong sa bag-o nga kabuhi, “nga sarang makakita sang ginhari-an sang Dios.” Juan 3:3. {PK 21.1}

Sayup nga Hunahuna

Ang pagpanghunahuna nga kinahanglan na lamang ang pagpauswag sang maayo nga yara sa tawo nga duna pa sang pagtuga sa iya, isa ka makamamatay nga daya. “Ang tawo sa kinaugali indi nagabaton sang mga butang sang Espiritu sang Dios, kay sa iya, kabuangon sila; kag indi sarang makakilala sa ila, kay pagahukman sila sing inispirituhanon.” 1 Korinto 2:14. “Dili ka magkatingala, nga nagsiling Ako sa imo; Kinahanglan sa inyo, nga pagaipanganak kamo sa ibabaw.” Juan 3:7. Nahanungud sa kay Kristo nasulat na, “Sa Iya amo ang kabuhi, kag ang kabuhi amo ang kapawa sang mga tawo,” ang lamang nga “ngalan sa idalum sang langit, nga ginhatag sa mga tawo, nga sa Iya magkalaluwas kita.” Juan 1:4; Binuhatan 4:12. {PK 22.1}

Dili lamang tuman nga pagtalupangdon naton ang pagkamahigugma-on kag ang pagkalolo sang Dios; nga pagtan-awon ang Iya daku nga gugma sa mga katawohan, ang inamay nga kalolo sang Iya kinaugali. Dili lamang tuman nga paghangpon naton ang kaalam kag ang katarung sang Iya kasogo-an; nga pagtan-awon nga natukud sia sa ibabaw sang walay katubtuban nga sadsaran sang gugma. Si Pablo nga pinadala nakakita sini nga tanan sang pagsinggit niya.” Ginatu-ad ko, nga ang kasogo-an maayo.” “Ngani ang kasogoan sa pagkamatuud, balaan, kag ang sogo balaan kag matarung kag maayo.” Apang nagdugang sia, sa kapait sang pagkasakit sang iya kalag, “Ako lawasnon, nga binaligya sa idalum sang sala.” Roma 7:16, 12, 14. Ginhandum niya ang kaputli, ang katarungan, nga sa iya kaugalingon wala sia sing gahum sa pagdangat, kag nagsinggit sia, “Pagkakailo sa akon nga tawo! Sin-o bala ang magaluwas sa akon sa sini nga lawas sang kamatayon?” Roma 7:24. Ina amo ang paninggit nga nagagowa gikan sa binug-atan nga tagiposoon sa tanan nga mga kadutaan kag sa tanan nga mga katuigan. Sa sini nga tanan may yara lamang nga isa ka sabat. “Yari karon ang Kordero sang Dios, nga nagakuha sang sala sang kalibutan!” Juan 1:29. {PK 23.1}

Madamu nga Paanggid

Madamu nga mga paanggid ang ginagamit sang Espiritu sang Dios sa pagsaysay sing maathag sini nga kamatooran, kag ipaathag sa mga kalag nga nagahandum sa pagpanginhilway gikan sa kabug-at sini nga kasalanan. Sang pagpalagyo ni Jakob gikan sa puluy-an sang iya amay, sa tapus sang iya pagdaya sa kay Esau nga iya utud, binug-atan sia gilayon sing balatyagon sang sala. Masubu nga sinikway, nahamulag sia gikan sa tanan nga nagahimo sang kabuhi nga mahal, ang isa ka hunahuna nga labaw sang

tanang nga nagapigus sang iya kalag, amo ang pagkahadluk nga ang sala amo ang nagpapahilayo sa iya gikan sa Dios, nga ginsikway na sia sang Langit. Sa kasubu naghigda sia sa pagpahuway sa walay tabon nga duta, nga yara sa palibut niya makita lamang ang mga kabakoloran, kag sa ibabaw niya ang langit nga ginapapawa sang mga kabitoonan. Sang nagakatolog sia, ang makatilingala nga kapawa nagbukas sa iya palanan-awon; kag yari karon gikan sa kapatagan nga iya ginahigdaan, ang daku, kag naghatag sing landong nga hagdan daw sa nagalambut sa ganhaan sang langit, kag sa iya ang mga manugtunda sang Dios nagasaka panaug; kag didto sa kahimayaan sa ibabaw, mabati-an ang balita sang kalipay kag paglaum. {PK 23.2}

Si Kristo Nagpahayag kay Jakob

Sa sini nga bagay ginpakilala sa kay Jakob ang Isa nga nagbusug sang kinahanglan kag handum sang iya kalag—ang Manluluwas. Sa kalipay kag pagpasalamat nakit-an niya nga pinahayag ang dalan nga sa iya sia, nga isa ka makasasala, sarang mapabalik sa pagpakighambal sa Dios. Ang makatilingala nga hagdanan sa iya damgo nagakahologan nga amo si Kristo, nga amo lamang ang alagyan sang paghiambitay sa tunga sang Dios kag sang tawo. {PK 24.1}

Ini amo man ang paanggid nga ginpanungdan ni Kristo sa Iya pagpakighambal sa kay Natanael, sang Iya pagsiling, “makita ninyo ang langit nga nabuksan, kag ang mga manugtunda sang Dios, nga nagasaka kag nagapanaug sa ibabaw sang Anak sang tawo.” Juan 1: 51. Bangud sang pagkamalinapason, ang tawo nahamulag sa Dios; ang duta nahamulag sa langit. Sa ulot sang kadadalman nga yara sa tunga nila, wala na sing paghiambitay. Apang bangud sa kay Kristo ang duta sa liwan naangot sa langit. Bangud sa buhat nga ginpanungod sa Iya kaugalingon, si Kristo nagtayatay sang kadadalman nga nahimo sang sala, agud nga ang manugbalantay nga mga manugtunda sarang makapakighambal sa tawo. Si Kristo nagpaangot sa nahulog nga tawo, sa iya kaluyahon kag pagkawalay masarangan, sa Tuburan sang gahum nga walay katubtuban. {PK 24.2}

Nгаа ang Tawo Wala Sing Mahimo

Apang walay kapuslanan ang mga dalamgohanon sang mga tawo nahanungod sang kauswagan, walay kapuslanan ang tanan nila nga mga pagpaninguha sa pagbayaw sang mga katawohan, kon igsikway nila ang Isa nga tuburan sang paglaum kag sang pagbulig sa nahulog nga kaliwatan. “Ang tanan nga maayo nga hatag, kag ang tanan nga hias” (Jakobo 1:17), nagikan sa Dios. Wala sing matuud nga maayo nga pagginawi luwas sa Iya. Kag ang dalan lamang pa Dios amo si Kristo. Sia nagsiling, “Ako amo ang dalan, kag ang kamatooran, kag ang kabuhi; walay bisan sin-o nga nagaabut sa Amay, kondi bangud sa Akon.” Juan 14:6. {PK 25.1}

Ang tagiposoon sang Dios nagahuyog sa Iya mga dutan-on nga mga inanak sa gugma nga labing mabaskug pa sang sa kamatayon. Sa paghatag sang Iya Anak, ginula Niya sa aton ang bug-os nga langit sa isa ka hatag. Ang kabuhi sang Manluluwas kag ang Iya kamatayon kag ang pagpanabang, ang pagbantay sang mga manugtunda, ang pagpakilooy sang Espiritu Santo, ang Amay nga nagapangabudlay sa ibabaw kag sa tanan, ang walay langan nga kabalaka sang mga tinuga sa langit— tanan ini ginhimo tungud sa pagpanubus sa tawo. {PK 25.2}

Makatilingala nga Halad

Pamalandongon naton ang daku nga halad nga nahimo tungud sa aton! Pakamahalon naton ang kabudlay kag ang kusug nga gin-uyang sang langit sa pagpangita liwan sang mga nadula, kag pabalikon sila sa balay sang Amay. Ang labi kabaskug pa gid nga tinutuyo, ang labi kakusug pa gid nga mga galamiton dili na sarang magamit; ang walay tupung nga balus sa mga maayo nga mga binuhatan, ang mga kalipayan sa langit, ang mga pagpakighiusa sang mga manugtunda, ang pagpakighambal sing tingub kag ang gugma sang Dios kag sang Iya Anak, ang pagbayaw kag ang pagpasangkad sang tanan naton nga mga gahum sa sulud sang walay katubtuban nga mga katuigan—dili bala ini mga dalagku nga mga butang kag mga pagpabaskug sa pagpilit sa aton sa paghatag sing mahigugmaon nga pag-alagad sang tagiposoon sa aton Manunuga kag Manluluwas? {PK 26.1}

Kag, sa isa ka bagay, ang paghukom sang Dios nga ginmitlang batok sa sala, ang dili malikawan nga balus, ang pagmusmus sang aton mga pagginawi, kag ang katapusan nga kalaglagaan, ginpahayag sa mga polong sang Dios sa pagpaandam sa aton batok sa mga pagalagdan ni Satanas. {PK 26.2}

Dili bala naton pagsapakon ang mga kalooy sang Dios? Anano pa ang labi nga Iya mahimo? Ibutang naton ang aton kaugalingon sa nagakaigo nga pagpakighiangot sa Iya nga amo Sia ang naghigugma sa aton sa labing daku nga gugma. Himuslan naton sa aton kaugalingon ang mga bagay nga ginaman sa aton, agud nga mabaylo kita sa kaangay Niya, kag mapabalik kita liwan sa pagpakig-upod sa mga manugalagad nga mga manugtunda, sa paghiusa kag sa paghiambit sa Amay kag sa Anak. {PK 27.1}

BAHIN 3

ANG PAGHINULSUL

ANANO ang takus paghimoon sang isa ka tawo agud nga manginmatarung sia sa atubangan sang Dios? Paano ang paghimo nga matarung sang isa ka makasasala? Bangud lamang kay Kristo nga mapasinanto kita sa Dios, sa pagkabalaan; apang paano ang pagpalapit ta sa kay Kristo? Madamu ang nagapalamangkot sang amo man nga pakiana subung sang mga kadam-an sa adlaw sang Pentikostes, sang binatyag nila ang ila sala, nagsinggit sila, “Anano ang amon pagahimoon?” Ang nahauna nga polong nga binungat ni Pedro amo, “maghilinulsul, kag magliliso kamo, agud nga pagpamanason ang inyo mga sala.” Binuhaton 3:19. {PK 29.1}

Ang paghinulsul ginaupdan sang pagkasubu sa sala, kag sang pagtalikod gikan sa iya. Dili naton masikway ang sala luwas lamang kon makita naton ang iya pagkamalaut; tubtub nga magatalikod kita gikan sa iya sa tagiposoon, wala sing matuud nga pagbaylo sa kabuhi. {PK 29.2}

May yara nga madamu nga dili makahangup sang matuud nga kinaugali sang paghinulsul. Kadam-an ang nagakalassubu tungud kay nagpalakasala sila, kag nagabuhat pa gani sing pagliwan nga sa gowa, tungud kay nagakahadluk sila nga ang ila malain nga mga buhat magadala sing mga pag-antus sa ila kaugalingon. Apang dili amo ini ang paghinulsul sono sa Biblia. Ginatangisan nila ang mga pag-antus, sa baylo sang sala. Subung sini ang pagkasubu ni Esau sang nakita niya nga ang pagkapanganay nadula sa iya. Si Balaam, nga hinadlukan sang manugtunda nga nagatindug sa iya dalanon nga nagahayaw sang hinganiban, nagkilala sang iya sala kay basi nga madula niya ang iya kabuhi; apang wala sing hanuut nga paghinulsul tungud sa sala, wala sing pagliwan sang mga katuyu-an, wala sing pagsikway sang malaut. Si Judas Eskariote, sa tapus niya matugyan ang iya Ginoo, nagsinggit, “Nakasala ako, sang pagtugyan ko sang dugo nga walay sala.” Mateo 27:4. {PK 29.3}

Pagtuad ni Judas

Ang pagtu-ad ginpilit gikan sa iya nakasala nga kalag bangud sang mapa-it nga pagbatyag sang pagpakamalaut kag sang makahaladluk nga paghukom. Ang patubas nga magaabut sa iya nagpuno sa iya sing kahadluk, apang wala sing kasakit nga madalum nga takus sa pagbuong sang tagiposoon sa iya kalag, nga natugyan niya ang walay sala nga Anak sang Dios, kag igsikway ang Isa nga Balaan sang Israel. Si Paraon sang nagaantus sia sa idalum sang mga paghukom sang Dios, nagkilala sang iya sala, agud lamang nga maluwas sia gikan sa labi pa nga mga pagsilot nga magaabut sa iya, apang magabalik sia sa paghangkat sa langit sa gilayon nga maguntat ang kalalat-an. Ini sila nga tanan nagkalassubu sa patubas sang sala apang wala magkalassubu tungud sang sala sa iya gid kaugalingon. {PK 30.1}

Apang kon ang tagiposoon magpanugyan sa manugpabuyok nga Espiritu sang Dios, ang panumduman pagapamat-on, kag ang makasasala makahangup sang kadalumon kag sang pagkabalaan sang balaan nga ka-sogo-an sang Dios, nga amo ang sadsaran sang Iya

pagginahum sa langit kag sa duta. Ang “Kapawa, nga nagaiwag sa tanan nga tawo, nga nagakari sa kalibutan,” (Juan 1:9) nagaiwag sa mga tinago nga hulut sang ka-lag, kag ang tinago nga mga butang nga nadulman ginapahayag. Ang balatyagon magagahum sa painoino kag tagiposoon. Ang makasasala magabatyag sang katarungan ni Jehoba, kag magabatyag sing kahadluk sa pagpalapit, upod sang iya kaugalingon nga sala kag pagkahigku, sa atubangan sang Manug-usisa sang mga tagiposoon. Makita niya ang gugma sang Dios, ang kagayon sang Iya pagkabalaan, ang kalipay sang Iya kaputli; magahandum sia nga manginmatinlo sia, kag ma-uli sa pagpakighiambit kaupud sang Langit. {PK 30.2}

Pagtuad ni Dabid

Ang pangamuyo ni Dabid sa tapus sia makasala, nagapahayag sang kinaugali sang matuud nga pagkasubu sa sala. Ang iya paghinulsul hanuut kag madalum. Wa-la sia maghuput sing isa ka hunahuna sa pagtagu sang iya sala; wala sing handum sa paglikaw sa paghukom nga ginaatubang. Si Dabid nakakita sang kadakuon sang iya paglapas: nakita niya ang dagta sa iya kalag; ginkasakitan niya ang iya sala. Wala sia magpangamuyo nga pagpatawaran lamang sia kondi nga pagputlion ang iya tagiposoon. Ginhandum niya ang kalipay sang pagkabalaan—nga pagaiuli sa paghiusa kag sa paghiambit sa Dios. Ini amo ang pamolong sang iya kalag: {PK 31.1}

“Bulahan yadto nga ang iya mga paglalis pinatawad na, kag natabonan na ang iya mga sala. Bulahan ang tawo nga sa iya wala pagaipahanungud ni Jehoba ang pagkamalalison; kag nga sa iya espiritu wala sing daya.” {PK 31.2}

“Kalooyi ako; O Dios, sono sa Imo kalooy; sono sa kadamuon sang Imo bugay; panasa ang akon mga paglalis. . . . Kay ginkilala ko ang akon mga paglalis; kag ang akon sala yari gihapon sa atubangan nakon . . . Ulaya ako sang isopo, kag manginmatinlo ako: hugasi ako, kag manginmaputi ako labi sang niebe . . . Tugaha sa akon, O Dios, ang isa ka kasingkasing nga matinlo; kag bag-oha ang isa ka espiritu nga matadlong sa sulud nakon. Ayaw ako pagtabuga sa atubangan Mo; kag ayaw pagkuhaa sa akon ang Imo balaan nga Espiritu. Iuli sa akon ang kalipay sang Imo kaluwasan: kag ang espiritu nga nahanda sa maayo, mag-agubay sa akon . . . Luwasa ako sa dugo nga pinatolo, O Dios, Dios sang akon kaluwasan. Mag-ambahan ang akon dila sang Imo katarungan.” Salmos 32:1, 2; 51:1-14. {PK 31.3}

Ang paghinulsul nga kasubung sini, dili malambut sang aton kaugalingon nga gahum; mabaton lamang sia gikan sa kay Kristo, nga nagsaka sa kahitaasan, kag naghatag sing mga hiyas sa mga tawo. {PK 32.1}

Nгаа Madamu ang Nagasayup

Diri sini amo ang ginasaypan sang madamu, busa ngani dili nila mabaton ang pagbulig nga ginahandum ni Kristo nga pagaihatag sa ila. Nagahunahuna sila nga dili sila makadangat sa kay Kristo luwas lamang kon maghinulsul sila sing una, kag nga ang paghinulsul magaaman sang kapatawaran sang ila mga sala. Matuud nga ang paghinulsul maga-una sa kapatawaran sang sala; tungud kay ang binoong lamang nga tagiposoon amo ang magabatyag sang pagkakinahanglan sang isa ka Manluluwas. Apang magahulat bala ang makasasala tubtub nga makahinulsul sila kag ugaling

magkadto sa kay Jesus? Himoon bala ang paghinulsul nga ka ulangan sa tunga sang malauton kag sang Manluluwas? {PK 33.2}

Ang Biblia wala nagatudlo nga ang makasasala dapat sa paghinulsul anay sa wala pa niya mahupti ang pangagda ni Kristo, “Kari sa Akon tanan kamo, nga ginabudlayan kag ginabug-atan, kag pagapapahuwayon Ko kamo.” Mateo 11:28. Ang gahum nga nagikan sa kay Kristo, amo ang nagatuytuy sa matuudtuud nga paghinulsul. Ginpaathag ni Pedro ini nga mga butang sang iya paghambal sa mga Israelinhon, sang pagsiling niya, “Ini ginbayaw sang Dios sang Iya too sa Hari kag Manluluwas, sa paghatag kay Israel sang paghinulsul kag kapatawaran sang mga sala.” Binuhatan 5:31. Dili kita makahinulsul sa wala sing Espiritu ni Kristo sa pagpukaw sang panumduman subung man nga dili kita mapatawad sa wala sing Kristo. {PK 33.1}

Ang Tuburan

Si Kristo amo ang tuburan sang tanan nga mga balatyagon nga matarung. Sia amo lamang ang Isa nga sarang makatanum sa tagiposoon sing kasuayon batok sa sala. Ang tagsa ka handum sa pagbaton sang kamatooran kag kaputli, ang tagsa ka pagbatyag sang aton pagkamalaut, amo ang kasanagan nga ang Iya Espiritu nagapanghikot sa aton mga tagiposoon. {PK 33.2}

Si Jesus nagsiling, “Kag Ako, kon pagbayawon sa kataasan sang duta, pagaguyuron Ko ang tanan sa Akon gid.” Juan 12:32. Si Kristo dapat nga pagipahayag sa mga makasasala subung nga Manluluwas nga namatay tungud sang mga sala sang kalibutan; kag sa nagatolok kita sa Kordero sang Dios sa ibabaw sang krus sa Kalbaryo, ang katingalahan sang pagpanubus magasugod sa pagbukas sa aton mga painoino, kag ang kaayo sang Dios magadul-ong sa aton sa paghinulsul. Sa pagpanginmatay tungud sa mga makasasala, si Kristo nagpakita sing gugma nga dili matungkad; kag kon makita sang mga makasasala ini nga gugma, magapahumok sang ila tagiposoon, magapabatyag sang painoino, kag magapabaskug sa pagpahinulsul sa kalag. {PK 33.3}

Balaan nga Influenzia

Matuud nga ang mga tawo kon kaisa nagakahuya tungud sang ila mga malauton nga mga buhat, kag nagasikway sang iban sang ila mga malaut nga mga batasan, sa wala pa sila makamarasmas nga sila ginaguyod pakadto kay Kristo. Apang kon magpaninguha sila sa pagliwan, sa isa ka hanuut nga handum sa paghimo sing matarung, ang gahum ni Kristo amo ang nagapanghikut sa kalag, kag ang painoino ginapabuhi, kag ang kabuhi nga sa gowa ginaliwan. Kag sang ginabuyok sila ni Kristo sa pagtolok sa Iya krus, sa pagtanaw sa Iya nga ginpilas tungud sang ila mga sala, ang kasogo-an magabalik sa ila panghunahuna. Ang kalaut sang ila kabuhi, ang sala nga nagapuyo sing madalum sa kalag, mapahayag sa ila. Magasugud sila sa paghangup sang nahanungud sang katarung ni Kristo, kag magasinggit, “Anano ang sala, nga nagakinahanglan sia sing subung nga pag-antus sa paghatag sing kaluwasan sa mga malinapason? Kinahanglan gid bala tanan ini nga gugma, tanan ini nga mga pag-antus, tanan ini nga mga pagpaubus, agud nga dili kita magkalawala kondi nga makabaton sing pagkabuhi nga walay katapusan?” {PK 34.1}

Ang makasasala ayhan magasumpung sa sini nga gugma, magadumili nga

pagpapalapiton sia kay Kristo; apang kon dili sia magsumpung, pagapalapiton sia sa kay Jesus; ang kaalam nahanungud sang paagi sang kaluwasan magatuytuy sa iya sa tiilan sang krus sa pagpahinulsul sa iya, nga amo ang nanginkabangdanan sang mga pag-antus sang mahal nga Anak sang Dios. {PK 34.2}

Ang amo man nga langitnon nga hunahuna nga nagapanghikot sa mga butang nga tinuga nagahambal sa tagiposoon sang mga tawo, kag nagatuga sing dili masaysay nga paghandum sa mga butang nga wala sa ila. Ang mga butang sa kalibutan dili makabusug sang ila mga handum. Ang Espiritu sang Dios nagapakilooy sa ila sa pagpangita sadtong mga butang nga amo lamang ang makahatag sing paghidaet kag kapahuwayan—ang bugay ni Kristo, ang kalipay sa pagkaba-laan. Bangud sa mga pagbuyok nga makita kag dili makita, ang aton Manluluwas nagapangabudlay sing dayon sa pagdala sang mga painoino sang mga tawo gikan sa dili makabusug nga mga kalalipayan sang sa-la pakadto sa walay katubtuban nga mga pagpakamaayo nga mangin-ila gikan sa Iya. Sa tanan sini nga mga kalag, nga nagapaninguha sing walay kapuslanan sa pag-inum gikan sa boong nga suludlan sini nga kalibutan, ang langitnon nga balita ginapahayag. “Ang may kauhaw magkari. Ang buut, mag-inum sang tubig sang kabuhi sa wala gid sing bili.” Bugna 22:17. {PK 35.1}

Ang Tingug Sang Dios

Ikaw nga nagahandum sa tagiposoon sing mga bu-tang nga labi pa sang sa mahatag sini nga kalibutan, magkilala sini nga mga handum subung nga tingug sang Dios sa imo kalag. Pangayo ka sa Iya nga ighatag sa imo ang paghinulsul, gugma, sa Iya himpit nga kaputli. Sa kabuhi sang Manluluwas ang mga palatukuran sang kasogo-an sang Dios—ang paghigugma sa Dios kag sa tawo—ginpahayag sing himpit. Ang gugma sa mga katawohan, ang dimaiyaiyahon nga paghigugma, amo ang kabuhi sang Iya kalag. Kon makita naton Sia, kag kon makita naton ang kapawa nga sumilak sa aton gikan sa Manluluwas, makita man naton ang pagkalaut sang aton kaugalingon nga tagiposoon. {PK 35.2}

Indi Magpahabok

Sarang kita makapahabok sang aton kaugalingon subung sa kay Nikodemo, nga ang aton kabuhi matarung, nga ang aton mga pamatasan matarung, kag maghunahuna nga dili na kita kinahanglan sa pagpaubus sang aton tagiposoon sa atubangan sang Dios, subung sang makasasala; apang kon ang kapawa gikan sa kay Kristo magsilak sa aton mga kalag, makita naton kon daw ano kita kahigku, mahangpan naton ang kahikaw sang aton mga hinyo, ang kaawayon batok sa Dios, nga amo ang nagdagta sang tagsa ka buhat sang kabuhi. Niyan mahibalo-an naton nga ang aton katarungan kasubung sang mahigku nga lapat, kag nga ang dugo ni Kristo amo lamang ang makatinlo sa aton gikan sa mga daut sang sala, kag makapabag-o sang aton tagiposoon sa kaanggid Niya. {PK 36.1}

Ang isa ka silak sang himaya sang Dios, ang isa ka igpat sang kaputli ni Kristo, nga magalapus sa aton kalag, magapaathag sang tagsa ka dagta sang kalautan, kag nagahublas sang tagsa ka kalaw-ayan kag mga kasawayan sa kinaugali nga tawhanon. Igapahayag niya ang dili balaan nga mga handum, nga pagkadilimatinoohon sang tagiposoon, kag ang kalaut sang mga bibig. Ang buhat sang mga makasasala sa

pagkadimasinolondon bangud sa pagwala sang kasogo-an sang Dios pagaipakita sa iya kag ang iya espiritu ginapilas kag ginasakit sa idalum sang manug-usisa nga gahum sang Espiritu sang Dios. Pagakaakigan niya ang iya ka-ugalingon kon makita niya ang putli, ang walay dagta nga kinaugali ni Kristo. {PK 36.2}

Sang makita sang manalagna nga si Daniel, ang hi-maya nga nagalibut sa langitnon nga manugtunda nga ginpadala sa iya, nahaurungan sia sa pagtalupangud sang iya kaugalingon nga kaluyahon kag pagkadihimpit. Sang pagsaysay niya sang pinatubas sang makatili-ngala nga talan-awon, nagsiling sia, “Kag wala sing bi-san ano nga kusug nga nabilin sa akon; kag ang akon duag nagbalin sa akon tubtub nga nagliwan ako, kag wala gid makahawid ako sing bisan ano nga kusug.” Daniel 10:8. Ang kalag nga matandug sa sini nga ba-gay magakaakig sa iya pagkamaiyaiyahon, magakaakig sa iya paghigugma sang iya kaugalingon, kag magapangita, bangud sa katarungan ni Kristo sing kaputli sa tagiposoon nga suno sa kasogo-an sang Dios kag sang kinaugali ni Kristo. {PK 37.1}

Experiensia ni Pablo

Si Pablo nagasiling nga “nahanungud sa katarungan nga tungud sa kasogo-an”—sa isa ka polong, suno sa mga buhat sa gowa—”dili sia salabdongon.” Pilipos 3:6. Apang sang ang espirituhanon nga kinaugali sang kasogo-an nahangpan niya, nakita niya ang iya kaugalingon nga makasasala. Kon paghukman sia suno sa mga letra sang kasogo-an subung sang paggamit sang tawo sa iya sa nagowa nga kabuhi, nagalihi sia gikan sa sala: apang sang natamdan niya ang kadalumon sang iya balaan nga mga tulumanon, kag sang nakita niya ang iya kau-galingon subung sang pagtan-aw sang Dios, nagyaub sia sa daku nga pagpaubus, kag nagtu-ad sang iya mga kalautan. Sia nagsiling “Kag ako nagkabuhi sang isa ka dag-on nga walay kasogo-an, apang sang pag-abut sang kasogo-an, nagkabuhi ang sala, kag ako napatay.” Roma 7:9. Sang nakita niya ang espirituhanon nga kinaugali sang kasogo-an, ang sala nagpahayag sa iya matuud nga pagkamanugdaya kag ang iya pagpakamahal sang iya kaugalingon nawala. {PK 37.2}

Kadakuon Sang Sala

Ang Dios wala nagakabig sang tanan nga mga sala subung nga alangay lamang; nanglainlain ang ka-dakuon sang mga sala sa Iya pagtamud, kasubung man sang pagtamud sang tawo; apang bisan kon daw ano ka dili salapakon ini okon ina nga buhat nga dili maayo sa mga mata sang tawo, wala sing sala nga diutay sa mga mata sang Dios. Ang paghukom sang tawo sa gowa lamang, dili himpit; apang ang Dios nagatamud sang tanan subung nga amo gid sila. Ang hubug ginatamay, kag ginasilingan nga ang iya sala magasikway sa iya gikan sa langit; kag ang bugal sing iya, ang kahisa, kag ang paghamkon sing masunsun nagapadayon lamang nga wala ginasabdong. Apang ini amo ang mga sala nga sing pinasahi nagapaakig sa Dios; tungud kay sila mga batok sa pagkaayo sang Iya kinaugali, sa sadtong dimaiyaiyahon nga gugma nga amo ang yara sa palibut sang wala mahulog nga kalibutan. Yadtong mahulog sa labi pagid kabug-at nga sala magabatyag sing kahuya kag kaimolan kag sang iya pagkakinahanglan sang bugay ni Kristo; apang ang bugal dili makabatyag sing pagkakinahanglan, kag ginatakan niya ang tagiposoon sa kay Kristo; kag sa walay katubtuban nga gugma nga Iya ginkari-an sa

paghatag. {PK 38.1}

Ang kailo nga manugsukot sang buhis nga nagpangamuyo, “Oh, Dios! magmahinoklogon Ka sa akon, nga isa ka makasasala ako” Lukas 18:13, nagkabig sang iya kaugalingon subung nga labing malaut nga tawo, kag ang iban nagtamud man sa iya sa amo man nga kapawa; apang binatyag niya ang iya kinahanglan, kag upud sang kabug-aton sang iya sala kag kahuluy-an nagpalapit sia sa atubangan sang Dios, kag nagpangayo sing kalooy. Ang iya tagiposoon nabuksan sa Espiritu sang Dios agud nga mangintakus sia sang Iya kalooy, kag hilwayon sia gikan sa gahum sang sala. Ang binugal, ang nagapakamatarung sa kaugalingon nga pangamuyo sang Pariseo nagapahayag nga ang iya tagiposoon natakup sa mga pagbuyok sang Espiritu Santo. Tungud sang iya kalayo gikan sa Dios, wala sia magbatyag sang iya kaugalingon nga kalautan, kon ipaanggid sa kahimpitan sang langitnon nga pagkabalaan. Wala sia magbatyag sing bisan ano nga kinahanglan, kag tungud sina wala man sia sing binaton. {PK 39.1}

Indi Ka Maghulat

Kon makita mo ang imo pagkamakasasala, dili ka na maghulat sa pagpaayo sang imo kauglingon. Pila ang yara nga nagahunahuna nga dili gid sila maayo sa pagpalapit sa kay Kristo. Nagapaabut ka bala nga magamanginmaayo ka bangud sang imo kaugalingon nga pagpaninguha? “Makailis bala ang Etiopinhon sang iya panit, kag ang leopardo sang iya mga kambang? Niyan sarang man kamo makahimo sing maayo, kamo nga naanad na sa paghimo sang malain?” Jeremias 13:23. Ang aton kabulig yara lamang sa Dios. Dili kita maghulat sang labing mabaskug pa gid nga pagpabatyag, sang labing maayo pa gid nga kahigayonan, okon sang labi pagid kabalaan nga balatyagon. Wala kita sing mahimo sa aton kaugalingon. Dapat kita magpalapit sa kay Kristo subung nga amo kita. {PK 39.2}

Dili Ka Magpadaya

Apang wala sing magpadaya sa ila kaugalingon ba-ngud sa pagpanghunahuna nga ang Dios, sa Iya daku nga gugma kag kalooy, magaluwas bisan pa sadtong mga nagasilikway sang Iya bugay. Ang lakas nga kalaut sang sala makita lamang sa kapawa sang krus. Kon ang mga tawo magba-is nga ang Dios tama kaayo kag indi Sia magasikway sang makasasala, patoloka sila sa Kalbaryo. Ina tungud kay wala na sing liwan nga bagay nga ang tawo maluwas, tungud kay sa wala ini nga paghalad dili mahimo sang katawohan ang paglikaw gikan sa gahum nga manugdaut sang sala, kag mauli sa pagpakighambal sa mga balaan nga mga tinuga—dili mahimo nila ang pagpakigambit sang espirituhanon nga kabuhi—tungud sini nga si Kristo nagpas-an sa Iya kaugalingon sang sala sang pagkamalinapason, kag nag-antus sa baylo sang makasasala. Ang gugma kag ang pag-antus kag ang kamatayon sang Anak sang Dios, tanan nagapamatuud nahanungud sang makahaladluk nga kadaku sang sala, kag nagapahayag nga wala sing makapalagyo gikan sa iya gahum, wala sing paglaum sang mataas nga kabuhi, kondi bangud sa pagpanugyan sang kalag sa kay Kristo. {PK 40.1}

Ang dimahinulsulon nga makasasala konkaisa nagapamalibad sa ila kaugalingon bangud sa pagsiling nahanungud sang mga nagapakakolokristohanon, “Maayo pa ako sina sa ila.

Wala man sila nagasikway sang ila kaugalingon, wala nagapakabuut, okon dimabinantayon sa ila mga pagginawi sing labi sang sa akon. Nagahigugma sila sang mga kalalipayan kag pagpatuyang sa kaugalingon subung man sa akon.” Ngani ginahimo nila ang sayup sang iban subung nga ila pamalibad sa ila pagpabayabaya sa ila mga katungdanan. Apang ang mga sala kag mga kasawayan sang iban indi magapakamatarung sa bisan kay sin-o sa dili pagtuman, tungud kay ang Ginoo wala maghatag sa aton sing masinalaypon, kag tawhanon nga solondan. Ang walay dagta nga Anak sang Dios amo ang ginhatag subung nga aton huwaran kag yadtong mga nagakulumud tungud sang mga malain nga mga buhat sang mga nagapakakolokristohanon amo yadtong dapat sa pagpakita kag sa pagkabuhi sing matarung kag dungganon nga mga solondan. Kon may ila sila sing mataas nga paghangup kon ano ang dapat pagahimoon sang isa ka Kristohanon, dili bala ang ila kaugalingon nga mga sala labi pa ka dalagku? Nahibalo-an nila kon ano ang matarung, apang nagadumili sila sa pagbuhat. {PK 41.1}

Dili Ka Magpabuyanbuyan

Mag-andam ka sa pagpabuyanbuyan. Dili pagpabuyanbuyani ang buluhaton sa pagsikway sang imo mga sala, kag ang pagpangita sang kaputli sa tagiposoon bangud sa kay Jesus. Diri sini nagsalayup ang mga linibolibo, sa ila walay katubtuban nga kalaglagan. Dili ako diri magahambal sing madugay, nahanungud sang kalip-oton kag sang pagkadilimalig-on sang kabuhi; apang may yara nga makahalanguyos nga katalagman—ang katalagman nga wala gid mahangpi sing maayo—sa pagpabuyanbuyan sa pagpanugyan sa nagapakilooy nga tingug sang Espiritu Santo sang Dios, sa pagpili sa pagkabuhi sa sala; kay ini amo ang matuud nga kabangdanan sang pagpabuyanbuyan. Ang sala. bisan kon daw ano ka diutay ang pagkabig sa iya, dili sia pagpabaya kag may katalagman sia nga amo ang pagkawala nga walay katapusan. Ang dili naton madaug, magadaug sa aton, kag pagadalhon kita sa kalaglagan naton. {PK 41.2}

Si Adan kag si Eba

Si Adan kag si Eba nagpanghunahuna sa ila kauga-lingon nga ang isa ka diutay nga buhat subung abi sang pagka-on sang ginadili-an nga bunga, dili makahimo sing subung nga makahaladluk nga patubas sono sang ginhambal sang Dios. Apang ining diutay nga butang amo ang paglapas sang dili maliwan kag balaan nga kasogo-an sang Dios, kag nagpabulag sa tawo gikan sa Dios, kag nagbukas sang gawang sang kamatayon kag sang dili mamitlang nga mga kalautan sa aton kalibutan. Sa tanan nga katuigan may yara nga nagagowa gikan sa aton duta sing walay langan nga pagtangis, kag ang bug-os nga tinuga nagabakho sing tingub sa kasakit, subung nga pinatubas sang pagkamalalison sang tawo. Ang langit sa iya kaugalingon nagbatyag sang patubas sang pagpakigaway sang tawo batok sa Dios. Ang Kalbaryo nagatindug subung nga handumanan sang makatilingala nga halad nga ginkinahanglan sa pagtumbas sang paglapas sa langitnon nga kasogo-an. Dili naton pagkabigon ang sala subung nga diutay nga butang. {PK 42.1}

Ang tagsa ka buhat sa paglapas, ang tagsa ka pagpabiyabiya okon pagsikway sang bugay

ni Kristo, magabalus sa imo kaugalingon: magapatig-a sia sang tagipo-soon, magapaluya sang kabubut-on, magapadulum sang inughalangup, kag indi lamang magasablag sia sa imo sa pagpanugyan, kondi nga dili makapatakus sa imo sa pagpanugyan, sa malolo nga pag-ampo sang Balaan nga Espiritu sang Dios. {PK 43.1}

Ginapagamu nga Hunahuna

Madamu ang nagapahipus sang ginapagamu nga painoino tungud sa pagpanghunahuna nga sarang nila mabaylohan ang dalan sang kalautan kon buut nila; nga sarang nila mapabayabayaan ang pangagda sang kalooy, kag sa gihapon mahikot sila sang Espiritu San-to. Nagahunahuna sila nga sa tapus nila mahimo ang butang nga batok sa Espiritu sang bugay, sa tapus nila mahimo ang ila pag-ugyon kay Satanas, sa isa ka ti-on sang tama kaiwat nga kahimtangan sarang nila mabaylohan ang ila mga pagginawi. Apang ini dili ma-himo sing mahapus. Ang mga inagihan, ang tinon-an sa bug-os nga kabuhi, nagdihon sing himpit sang mga pagginawi kag mga pamatasan sa bagay nga diutay na lang sa amo nga dag-on ang may handum sa pagbaton sang larawan ni Jesus. {PK 43.2}

Bisan ang isa lang ka malain nga pamatasan, isa ka malaut nga handum nga ginabunyagan sing dayon, sa pagkamatuud magapadula sang tanan nga gahum sang maayong balita. Ang tagsa ka malaut nga pagpatuyang magapabaskug sang pagsumpong sang kalag sa Dios. Ang tawo nga nagapatig-a, okon wala nagasapak sa langitnon nga kamatooran, magaani lamang sang patubas sang iya ginpanggas. Sa bug-os nga Biblia wala na sing maglabi ka makahaladluk nga pagpa-andam batok sa pagpauyon-uyon sa malaut nga maglabaw sa mga polong sang maalam nga tawo, nga ang makasasala “pagahigtan sia sang mga lubid sang iya sala.” Hulubaton 5:22. {PK 43.3}

Si Kristo Handa

Si Kristo handa sa pagbuhi sa aton gikan sa sala, apang wala Sia nagapilit sang kabubut-on; kag kon bangud sa dalayon nga pagpakasala ang kabubut-on sa iya kaugalingon mabuyok sing bug-os sa kalautan, kag kon wala kita sing handum sa pagpanginluwas, kon dili kita buut magbaton sang Iya bugay, anano pa ang Iya takus mahimo? Ginalaglag naton ang aton kaugalingon tungud sa pagtapat naton sa aton kaugalingon sa pagsikway sang Iya gugma. “Yari karon, ang panagon nga nahamut-an; yari karon, ang adlaw sang kaluwasan.” 2 Korinto 6:2. “Kon pagpamati-an ninyo karon ang Iya tingug, dili ninyo pagpatig-ahon ang inyo mga tagiposoon.” Hebreinhon 3:7, 8. {PK 44.1}

“Ang tawo nagatan-aw sang sa gowa, apang si Jehoba nagatan-aw sang tagiposoon” (1 Samuel 16:7), ang tawhanon nga tagiposoon, kaupud sang iya nagagumon nga mga balatyagon sang kalipay kag kasubu, ang nahamulag, ang nagtalang nga tagiposoon nga amo ang puluy-an sang madamu nga mga kalautan kag daya. Nakilala Niya ang iya mga hinyo, ang iya gid mga tuyo kag mga hunahuna. Kadto ka sa Iya kaupod sang imo kalag nga bulit sang sala. Kasubung sa manugsalmo buksi ang iya mga huluthulut sa nagatamud nga mata, kag magsinggit, “Usisa-a ako, O Dios, kag kilalaha ang akon tagiposoon; tilawi ako, kag kilalaha ang akon mga hunahuna; kag tan-awa kon sa akon may dalan sa kalautan, kag mando-i ako sa dalan nga walay katapusan.” Salmos 139:23, 24. {PK 44.2}

Madamu ang nagabalaton sang pagtoloohan nga sa hunahuna lamang, isa ka dagway

sang pagkadiosnon, apang ang tagiposoon wala matinlo-i. Himo-a nga mangin imo pangamuyo, “Tugaha sa akon, O Dios, ang isa ka kasingkasing nga matinlo; kag bag-oha ang isa ka espiritu nga matadlong sa sulud nakon.” Salmos 51:10. Magmaminatud-on ka sa imo kaugalingon nga kalag. Magmapisanon ka, kag magmapinadayonon ka, subung sang imo pagahimoon kon ang imo mamalatyon nga kabuhi yara sa katalagman. Ini amo ang bu-tang nga kinahanglan nga pagtapatan sa tunga sang Dios kag sang imo kaugalingon nga kalag, pagtapat nga sa walay katubtuban. Ang paglaum nga ginabantabanta, kag wala na sing iban, magatapat sang imo kalaglagaan. {PK 45.1}

Magtoon kag Magpangamuyo

Ton-i ang mga polong sang Dios sing mapinangamuyoon. Ina nga polong nagapahayag sa atubangan nimo, sa kasogo-an sang Dios kag sa kabuhi ni Kristo, sang labing daku nga sadsaran sang pagkabalaan, nga sa wala sia, “wala sing bisan sin-o nga makakita sa Gi-noo.” Hebrienhon 12:14. Nagapakilala sia sang sala; nagapahayag sia sing maathag sang dalan sang kalu-wasan. Pamatii sia, subung nga tingug sang Dios nga nagapakighambal sang imo kalag. {PK 45.2}

Sa natalupangdan mo ang pagkadaku sang sala, sa natalupangdan mo ang imo kaugalingon subung nga amo ikaw, dili ka magpakaluya. Tungud sa makasasala nagkari si Kristo sa pagluwas. Dili kita sarang makapasag-uli sang Dios sa aton, kondi—O makatilingala nga gugma!—ang Dios sa kay Kristo “ginpasag-uli Niya ang kalibutan sa Iya.” 2 Korinto 5:19. Ginabihag Niya bangud sang Iya mahumok nga gugma ang tagiposoon sang Iya masinalaypon nga mga inanak. Wala sing dutan-on nga mga ginikanan nga maglabi ka mabinatason sang mga kasaypanan kag mga sala sang Iya ginapangita nga pagaluwason. Wala sing isa nga makapakilooy sing labi kalolo sa mga malinapason. Wala sing tawhanon nga mga bibig nga makabungat sing labi kalolo nga mga pakilooy sa mga nagtalang nga maglabi sa Iya. Ang tanan Niya nga mga saad, ang Iya mga pagpaandam sila tanan mga polong sang dili mamitlang nga gugma. {PK 45.3}

Kon Magkari si Satanas

Kon si Satanas magkadto sa pagsiling sa imo nga labi ikaw kadaku nga makasasala, tolok ka sa imo Manunubus, kag maghambal nahanungud sang Iya pagkatakus. Ang makabulig sa imo amo ang pagtolok sa Iya kapawa. Kilalaha ang imo sala, apang sugiri ang kaaway nga si “Kristo Jesus nagabut sa kalibutan sa pagluwas sa mga makasasala” (1 Timoteo 1:15), kag nga maluwas ikaw bangud sang Iya dili matupungan nga gugma. Si Jesus nagpamangkot sa kay Simon sing isa ka pakiana nahanungud sang duha ka mangungutang. Ang isa nakautang sa iya ginoo sing diutay lamang, kag ang isa nakautang sa iya sing madamu; apang ginpatawad niya sila nga duha, kag si Kristo nagpamangkot sa kay Simon kon diin sining duha ka mangungutang ang magahigugma sa iya ginoo sing labi. Si Simon nagsabat, “Sa akon banta, ang ginpatawad sing labi.” Lukas 7:43. Nanginlabi kita ka daku nga makasasala, apang si Kristo namatay agud nga mapatawad kita. Ang bili sang Iya pag-antus tuman na nga makapahayag sa Amay tungud sa aton. Yadtong Iya ginpatawad sing labi magahigugma sa Iya sing labi, kag magatindug sing malapit sa Iya lingkoran nga harianon sa pagdayaw sa Iya tungud sang Iya daku nga gugma kag walay katubtuban nga halad. Kon mahangpan naton sing labi

ang gugma sang Dios, makilala naton ang kahigku sang sala. Kon makita naton ang kalaba-on sang talikala nga gintuntun sa aton, kon mahangpan naton ang walay katubtuban nga halad nga ginhimo ni Kristo tungud sa aton, ang tagiposoon magakatunaw sa kahuinok kag sa daku nga pagkasubu sa sala. {PK 46.1}

BAHIN 4

ANG PAGPANU-AD

ANG nagatabon sang iya mga paglapas, indi magauswag: apang ang nagatu-ad sa ila kag nagabiya sa ila, makadangat sing kalooy,” Hulubaton 28:13. {PK 49.1}

Ang kondisyon sa pagbaton sang kalooy sang Ginoo wala nagakinahanglan sa aton sa paghimo sing dalagku nga mga butang agud nga mabaton naton ang kapata-waran sang aton mga sala. Dili kita kinahanglan sa paghimo sing malawig kag mabudlay nga pagpanlakatan, okon sa paghimo sing mga pagsakit sa lawas (penitensia), sa pagtugyan sang aton mga kalag sa Dios sang langit, okon sa pagtumbas sang aton mga paglapas; kondi nga yadtong nagapanu-ad kag nagasikway sang iya sala makaagum sing kalooy. {PK 49.2}

Ang pinadala nagasiling, “Magtinuaday ang isa kag isa sa inyo sang inyo mga sala, kag mangamuyo ang iban sa inyo tungud sa iban, agud nga mag-alayo ka-mo.” Jakobo 5:16. Ipanu-ad ang inyo mga sala sa Dios, nga Sia amo lamang ang makapatawad sa ila, kag ang inyo mga sayup sa isa kag isa. Kon nakahimo ikaw sing sayup sa imo abyan okon kaingud, dapat ikaw sa pagkilala sang imo sayup, kag iya katungdanan ang pagpatawad sing bugana sa imo. Kinahanglan ikaw sa pagpangita sing pagpatawad sang Dios, tungud kay ang utod nga imo ginhimo-an sing lain iya kaugalingon sang Dios, kag sa paghimo sing lain sa iya nakasala ikaw batok sa iya Manunuga kag Manluluwas. Ang butang pagadalhon sa atubangan sang isa ka matuud lamang nga Mananabang, ang aton labing Pinakamataas nga Saserdote, nga “ginsulay Sia sa tanan nga paagi subung sa aton, sa walay sala,” kag tinandug sang kalooy tungud sang “aton mga kaluyahon” (Hebrienhon 4: 15), kag takus Sia sa pagtinlo sa aton gikan sa tagsa ka dagta sang kalautan. {PK 49.3}

Pagtuad Sang Sala

Yadtong wala nagapaubus sang ila mga kalag sa atubangan sang Dios sa pagkilala sang ila mga sala, wala pa makatuman sang nahauna nga kondisyon sang pagbaton. Kon wala pa naton mahimo ang mga paghinulsul nga dili hilinulsulan, kag wala pa kita makatu-ad sang aton mga sala kaupud sang matuud nga pagpaubus sang kalag kag pagboong sang espiritu, nga pagkahigku-an naton ang aton kalautan, wala pa kita makapangayo sang kapatawaran sang aton nga sala; kag kon wala pa kita makadangat sini, wala pa naton maagum ang paghidaet sang Dios. Ang isa lamang ka katarungan kay ngaa wala kita makaagum sing kapatawaran sang mga sala nga nagligad, amo tungud kay dili kita maluyag sa pagpaubus sang aton mga tagiposoon kag magsunod sang mga ginatudlo sang polong sang kamatooran. Ang tuhoy nga mga pagtudlo ginahatag nahanungud sini nga butang. Ang pagtu-ad sang sala, bisan sa dayag okon sa tago, kinahanglan nga pagbatyagon sa tagiposoon, kag igpahayag sing bunayag. Indi sia pag-ipilit gikan sa makasasala. Indi sia paghimoon sa dimahinalongon nga paagi, okon ipilit gikan sa sadtong mga wala makahangup sang mahigku nga kinaugali sang sala. Ang pagtu-ad nga nagikan sa kadadalman sang kalag naglambut sa Dios sang walay katubtuban nga

kalooy. Ang manugsalmo nagasiling, “Yari malapit si Jehoba sa mga boong sing tagiposoon, kag ginaluwas Niya ang mga mahinulsulon sa espiritu.” Salmos 34:18. {PK 50.1}

Ang matuud nga pagtu-ad sa gihapon tuhoy sa iya kinaugali, kag nagakilala sang sala nga nahimo. Ayhan mga butang sila nga kinahanglan nga pagdalon sa atubangan sang Dios lamang; ayhan mga sayup sila nga kinahanglan pagaitu-ad sa mga tawo nga naga-antus sing kalainan tungud sa ila; okon ayhan nahimo sila sa dayag, kag niyan kinahanglan nga pag-itu-ad man sa dayag. Apang ang tanan nga pagtu-ad mangintuhoy kag sa naigo-an gid nga butang, nga nagakilala sang amo gid nga sala nga imo nahimo. {PK 51.1}

Sa Kaadlawan ni Samuel

Sa kaadlawan ni Samuel, ang mga Israelinhon nagpalayo gikan sa Dios. Nagalantus sila sang mga patubas sang sala, tungud kay nadula nila ang ila pagtoo sa Dios, nadula nila ang ila paghangup sang Iya gahum kag kaalam sa paggahum sang katawohan, nadula nila ang ila pagsalig sa Iya ikasarang sa pag-apin kag sa pagbayaw sang Iya buluhaton. Nagtalikud sila gikan sa daku nga Gumalahum sang kalangitan, kag naghandum nga pagagahaman sang isa ka hari kasubung sang mga kabanwaanang yara sa palibut nila. Sa wala pa nila makita ang paghidaet, ginhimo nila ining tuhoy nga pagpanu-ad: “Amon gindugang ini nga kalainan, ang pagpangayo sing hari nga sa amon.” 1 Samuel 12:19. Ang amo gid nga sala nga ginkilala nila dapat nga igpanu-ad. Ang ila pagkadimapiasalamaton amo ang nagpigis sang ila mga kalag, kag nagpahamulag sa ila sa Dios. {PK 51.2}

Dapat Kita Magbiya Sang Sala

Ang pagpanu-ad dili pagbatonon sang Dios sa wala sing hanuut nga paghinulsul kag pagliwan. Dapat nga may yara nga matuudtuud nga pagliwan sa kabuhi; ang tanan nga butang nga makapaakig sa Dios kinahanglan nga pag-isikway. Ini amo ang manginpatubas sang matuudtuud nga pagkasubu sa sala. Ang buluhaton nga dapat naton nga paghimo sa aton bahin ginapahayag sing maathag sa atubangan naton: “Palamunak kamo, palaninlo kamo; kuhaa ninyo ang kalainan sa inyo mga binuhatan sa atubangan sang Akon mga mata; untat na kamo sa paghimo sang malain; magtoon kamo sa paghimo sing maayo; pangitaa ninyo ang katadlongan; iuli ninyo sa katadlongan ang mga manugpigis; hukmi ninyo ang ilo; tabangi ninyo ang mga balo nga babae.” Isaias 1:16, 17. “Kon ang madauton mag-uli sang inugpalig-on, mag-uli sang kinawat niya, kag maglakat sia sa mga tulumanon sang kabuhi, nga indi mighimo sing kalautan, sa pagkamatuud, magakabuhi sia, indi mamatay sia.” Esekiel 33:15. Si Pablo nagsiling, sang iya paghambal nahanungud sang buhat sa paghinulsul: “Kay yari karon, ini man, nga siling nga sa Dios ginpasubu-an kamo, daw ano nga paghimulat ang ginbunga Niya sa inyo; daw ano nga pag-apin sa inyo; daw ano nga kaakig; daw ano nga kahadluk; daw ano kainit nga paghandum; daw ano nga kakugi; daw ano nga pagpakamatarung! Sa tanan nagpalahayag kamo nga mga putli sa buluhaton.” 2 Korinto 7:11. {PK 52.1}

Kon mapatay na sang sala ang tawhanon nga inughalangup, ang manugbuhat sang malaut dili makahibalo sang mga kalainan sang iya mga kinaugali, kag dili sia

makatalupangud sang kadaku sang kalautan nga iya nahimo; kag luwas lamang kon magpanugyan sia sa manugtandug nga gahum sang Espiritu Santo, magapabilin sia nga bulag sa iya mga sala. Ang iya pagpanu-ad indi putli kag dili hanuut. Sa tagsa ka pagkilala niya sang iya sayup magahatag sia sing pamalibad nahanungud sang iya mga binuhatan, nagasiling nga kon wala lamang inang isa ka butang, wala kunta niya mahimo ini okon ina, nga amo ang ginsawayan sa iya. {PK 52.2}

Indi Magbasul

Sa tapus si Adan kag si Eba makaka-on sang ginadilian nga bunga, pinun-an sila sing balatyagon sa kahuya kag kahadluk. Sing una ang ila lamang nga hunahuna amo ang kon ano ang ipamalibad nila sang ila sala, agud malikawan ang labing makahaladluk nga paghukom sa kamatayon. Sang nagpamangkot ang Ginoo nahanungud sang ila sala, sa Adan nagsabat, nga nagpasibangud sang iban nga sala sa Dios kag ang iban sa iya kaupud: “Ang babae, nga ginhatag Mo sa akon nga akon mangin-kaupud, ginhatagan niya ako sing kahoy, kag nagka-on ako.” Ang babae nagbutang sang kasalanan sa man-ug nga nagasiling, “Ang man-ug nagdaya sa akon, kag nagka-on ako.” Genesis 3:12, 13. Ngaa ginhimo Mo ang man-ug? Ngaa gintugutan Mo sia sa pagkadto sa Eden? Ini amo ang mga pakiana nga yara sa sulud sang iya mga pamalibad tungud sang iya sala, ngani gintungtung nila sa Dios ang kabangdanan sang ila pagkahulog. Ang espiritu sang pagpakamatarung sa kaugalingon nagsugud sa amay sang mga butig, kag ginapakita sang tanan nga mga inanak, lalaki kag babae, ni Adan. Ini nga bagay sang pagpanu-ad wala ginatuytuyi sang langitnon nga espiritu, kag dili pagbatonon sang Dios. Ang matuud nga paghinulsul nagatuytuy sa tawo sa pag-ako sang iya mga kasal-anan, kag pakilalahon sia sa wala sing daya kag kasalimpaw. Kasubung sang kailo nga manugsukut sang buhis nga wala magbayaw sang iya mga mata sa langit, magasinggit sia, “Dios ko, magmahinoklogon Ka sa akon nga isa ka makasasala;” kag yadtong tanan nga magakilala sang ila paglapas pagapakamatarungon tungud kay si Jesus magapahayag sang Iya dugo sa kaayohan sang mga mahinulsulon nga kalag. {PK 53.1}

Matuud nga Paghinulsul

Ang halimbawa sa mga polong sang Dios, nahanungud sang matuudtuud nga paghinulsul kag pagaubus nagapahayag sang espiritu sang pagpanu-ad nga wala sing pagpamalibad tungud sang sala, okon sing pagpaninguha sa pagpakamatarung sang kaugalingon. Si Pablo wala magpangita sa pagtagu sang iya kaugalingon; ginpakita niya ang iya sala sa labing maitum nga duag, kag wala sia magpaninguha sa pagbuhin sang iya mga sala. Sia nagasiling: “Kag ginbutang ko sa mga bilanggo-an ang madamu sang mga balaan, sang nakabaton ako sang pagbulut-an sa mga puno-an sang mga saserdote; kag sang pinamatay sila, ginhatag ko ang akon panangdo. Kag sa pagsilot ko sa ila sa makadamu sa tanan nga mga sinagoga, ginpilit ko sila sa pagpasipala; kag sa sinab-an ako sing lakas batok sa ila, ginhingabut ko sila tubtub sa mga kabanwaan sang iban nga duta.” Binuhatan 26:10, 11. Wala sing magpangduhaduha sa pagsiling nga si “Kristo Jesus nagabut sa kalibutan sa pagluwas sa mga makasasala, nga sa ila ako ang nahauna.” 1 Timoteo 1:15. {PK 54.1}

Ang mapainubuson kag ang binoong nga tagiposoon, nga dinaug sang matuudtuud nga

paghinulsul, magapakamahal sang gugma sang Dios kag sang kabilihanang sang Kalbaryo; kag subung sang isa ka anak nga nagapanu-ad sa iya mahigugma-on nga amay, amo man ang mga matuudtuud nga mahinulsulon magadala sang tanan niya nga mga sala sa Dios. Kag nasulat na, “Kon igpanu-ad ta ang aton mga sala, matarung kag matutum Sia, agud nga pagpatawaron kita Niya sang aton mga sala, kag tinlo-an kita Niya sang tanan nga kala-utan.” 1 Juan 1:9. {PK 55.1}

BAHIN 5

ANG PAGPANUGYAN

ANG saad sang Dios amo, “Pagapangita-on ninyo Ako kag makita ninyo Ako, kay ginapangita ninyo Ako sa bug-os ninyo nga tagiposoon.” Jeremias 29: 13. {PK 57.1}

Ang bug-os nga tagiposoon dapat nga igtugyan sa Dios, kay kon dili ang pagbaylo dili mahimo sa aton nga bangud sa iya mauli kita sa kaanggid Niya. Sa kinaugali nahamulag kita sa Dios. Ang Espiritu Santo nagasaysay sang aton kahimtangan sa sini nga mga polong: “Patay kamo sa mga paglapas kag mga sala,” “ang tanan nga olo nagabalatian, kag ang tanan nga tagiposoon ginalapyo;” “wala sing maayo sa iya.” Ginahigtan kita sing malig-on sa siod ni Satanas; “nga nabihag niya sa iya kabubut-on.” Epeso 2:1; Isaias 1:5, 6; 2 Timoteo 2:26. Ang Dios nagahandum sa pagayo sa aton, sa pagpahilway sa aton. Apang tungud kay ini nagakinahanglan sang bug-os nga pagliwan, sing pagbag-o sang aton bug-os nga kinaugali, igpanugyan naton ang aton kaugalingon sa Iya. {PK 57.2}

Ang pagpakig-away batok sa kaugalingon amo ang labing daku nga inaway nga ginaaway tubtub karon. Ang pagpanugyan sang kaugalingon, ang paghatag sang tanan sa kabubut-on sang Dios nagakinahanglan sing pagpanikasug; apang ang kalag dapat sa pagpasakup sa Dios sa wala pa sa iya rnao sa pagkabalaan. {PK 57.3}

Ang pagbulut-an sang Dios, dili, subung sang ginapahayag na Satanas, gintukud sa binulag nga pagpatuman, kag walay katarungan nga paggahum. Nagapahayag sia sa painoino kag sa kaisipan. “Kari kamo kag magbais kita sing tingub” (Isaias 1:18), amo ang pangagda sang Manunuga sa tawo nga Iya ginhimo. Ang Dios wala nagapilit sang kabubut-on sang Iya mga tinuga. Dili Sia makabaton sang pagtahud nga wala ginahatag sing sa kinabubut-on kag sing mahinantupon. Ang pilit nga pagpasakup magaupang sang tanan nga matuud nga pagtubu sang painoino kag sang pagginawi; magahimo sa tawo nga isa lamang ka manugsunodsunod. Ina dili amo ang katuyoan sang Manunuga. Ginahandum Niya nga ang tawo, ang purungpurung nga binuhatan sang Iya gahum sa pagpanuga, makadangat sang labing mataas nga kauswagan nga iya masarangan. Ginabutang Niya sa atubangan naton ang kataason sang pagpakainaayo nga Iya ginahandum nga pagdal-an sa aton bangud sa Iya bugay. Ginaagda Niya kita sa paghatag sang aton kaugalingon sa Iya, agud nga mahimo Niya ang Iya kabubut-on sa aton. Yari sa aton ang pagpili kon bala buut kita nga magmanginhilway gikan sa kahiulipnan sang sala, agud sa pag-ambit sang mahimayaon nga kahilwayan nga ginaagum sang mga inanak sang Dios. {PK 57.4}

Bug-os nga Pagtugyan

Sa paghatag sang aton kaugalingon sa Dios, dapat kita sa pagsikway sang tanan nga magapahamulag sa aton gikan sa Iya. Busa ang Manluluwas nagsiling, “Ang bisan sin-o sa inyo, nga indi niya pagtalikdan ang tanan niya nga pagkabutang, indi sarang mahimo nga Akon sia gintoton-an.” Lukas 14:33. Ang bisan ano lamang nga magapalayo sang tagiposoon gikan sa Dios dapat nga pag-isikway. Ang manggad amo ang diosdios sang

kadamu-an. Ang gugma sa pilak, ang handum sa pagmanggad amo ang bulawan nga talikala nga nagahigot sa ila sa kay Satanas. Ang kadungganang kag ang kabantugan nga kinalibutanon ginasimba sang isa man ka klase sang mga katawohan. Ang kabuhi nga maiyaiyahon kag ang pagkamahinilwayon gikan sa mga responsabilidad okon salabton amo ang diosdios sang iban man. Apang ining manug-ulipon nga talikala dapat nga pagbugto-on. Dili kita makakabuhi nga katunga sa Dios kag katunga sa kalibutan. Dili kita mga inanak sang Dios luwas lamang kon mabug-os kita sa Iya. May yara nga nagasiling nga sila nagaalagad sa Dios, apang nagasalig sila sa ila kaugalingon nga pagpaninguha sa pagtuman sang kasogo-an Niya, sa paghimo sing matadlong nga pagginawi, kag sa pagdangat sing kaluwasan. {PK 58.1}

Kinahanglan ang Gugma

Ang ila mga tagiposoon wala matandug sang madalum nga pagbatyag sang gugma ni Kristo, kondi nga nagatilinguha sila sa pagbuhat sang mga katungdanan sang kabuhi nga Kristohanon subung nga ginakinahanglan sang Dios sa ila agud sa pag-angkon sang langit. Ang subung nga pagtolooan wala sing pulus. Kon si Kristo nagapuyo sa tagiposoon, ang kalag mapun-an sang Iya gugma, sing kalipay sa pagpakighambal sa Iya, sa bagay nga magaanogot sia sa Iya; kag sa pagpamalandong sa Iya, ang kaugalingon malimutan. Ang gugma sa kay Kristo mangin amo ang ilig sang kabuhi. Yadtong nagabatyag sang manugpugung nga gugma sang Dios, wala nagapamangkot kon daw ano ka diutay ang sarang mahatag sa pagtuman sang kinahanglanon sang Dios; wala sila nagapangayo sing manubu nga talaksan, kondi nga nagatinguha sila sang himpit nga pagsunod sa kabubut-on sang ila Manlu-luwas. Kaupud sang hanuut nga handum ginapanugyan nila ang tanan, kag ipahayag ang kabalaka nga nagakabagay sa kaibilihanan sang butang nga ila ginapangita. Ang pagbaton kay Kristo sa wala sining madalum nga gugma, yana sa bibig lamang, mamala nga buhat sa gowa, kag makatalaka nga lulan. {PK 59.1}

Importante nga Pakiana

Nagabatyag ka bala nga tama ka daku nga pag-antus ang pagtugyan sang tanan sa kay Kristo? Pamangkota ang imo kaugalingon sining pakiana. “Anano ang nahatag ni Kristo tungud sa akon? Ang Anak sang Dios naghatag sang tanan—kabuhi kag gugma kag pag-antus —tungud sa pagtubus sa aton. Kag mahimo bala nga kita nga dili takus sang Iya daku nga gugma, pagpunggan naton ang aton mga tagiposoon gikan sa Iya? Sa tagsa ka ti-on sang aton kabuhi nagaambit kita sang pagpakamaayo sang Iya bugay, kag tungud sini gid nga katarungan dili kita makahangup sing himpit sang kadalumon sang pagkapakuk kag kaimolan nga ginluwasan sa aton. Makatolok bala kita sa Iya Sia nga ginpilas tungud sang aton mga sala, kag maghimo lamang kita sang aton kabubut-on sa dili paghangad sang Iya gugma kag mga pagantus? Tungud sang walay tupung nga pagpaubus sang Ginoo sang kahimayaan, magakumud bala kita tungud kay makasulud kita sa pagkabuhi tu-ngud lamang sa pagpakig-away sa sala kag sa pagpaubus sang kaugalingon? {PK 60.1}

Ang pakiana sang madamu nga mga matinaastaason nga tagiposoon amo, “Ngaa nga kinahanglan ako magantus kag magpaubus sa wala pa ako mapalig-on nga binaton na

ako sang Dios?” Pagaitudlo ko ikaw sa kay Kristo. Wala Sia sing sala, kag labut pa sa sina, Sia amo ang Hari sang kalangitan; apang tungud lamang sang kaayohan sang tawo, nangin makasasala Sia tungud sang mga katawohan. “Gin-isip Sia sa tunga sang mga malalison, nga amo Sia ang nagdala sang sala sang madamu nga mga tawo, kag nagpangamuyo Sia tungud sang mga malinapason.” Isaias 53:12. {PK 61.1}

Anong Ginahatag Mo?

Apang ano ang aton ginahatag, kon ighatag naton ang tanan?—Isa ka nabulit sang sala nga tagiposoon, nga pagtinlo-an ni Jesus, nga paghugasan sang Iya kaugalingon nga dugo, kag pagluwason sang Iya dili matupungan nga gugma. Apang ang mga tawo nagapanghunahuna nga maiwat ang paghatag sang tanan! Nagakahuya ako sa pagpamati nga ighambal ini, nagakahuya ako sa pagsulat sa iya. {PK 61.2}

Ang Dios wala nagakinahanglan sa aton sa pagsikway sang bisan ano lamang nga butang nga sa kaayohan naton kon paghuptan. Sa tanan nga Iya ginahimo, ginatamud Niya ang bug-os nga kaayohan sang Iya mga inanak. Kabay pa unta nga ang tanan nga wala pa makapili sa kay Kristo magkilala nga may isa Sia ka butang nga igahatag sa ila nga labing maayo pagid sang sa ila ginapangita tungud sa ila kaugalingon. Ang tawo nagahimo sing labing daku nga kalaglagan kag kalainan sa iya kaugalingon nga kalag kon maghunahuna sia kag magbuhat batok sa kabubut-on sang Dios Wala sing matuud nga kalipay nga makita sa dalanon nga Iya ginadumli-an, Sia nga nakakilala sang kon ano ang maayo kag nagapaninguha lamang sang mga kaayohan sang Iya tinuga. Ang dalan sang mga malalison amo ang dalan sang kaimolan kag kalaglagan. {PK 61.3}

Sayup nga Hunahuna

Sayup ang paghuput sang panghunahuna nga ang Dios nagakalipay sa pagtan-aw sa Iya mga inanak nga nagaalantus. Ang bug-os nga langit may kabalaka sa sa kaayohan kag kalipayan sang tawo. Ang aton langitnon nga Amay wala nagatakup sang alagyan sang mga kalalipayan sa bisan kay sin-o Niya nga mga tinuga. Ang langitnon nga mga kinahanglanon nagatawag sa aton sa paglihi sa sadtong mga pagpatuyang nga magahatag sing mga pag-antus kag kasulub-an, nga nagatakup sa aton sang gawang sang kalalipayan kag sang langit. Ang Manunubus sang kalibutan nagabaton sa mga tawo sa ila kaugalingon nga kahimtangan, kaupud sang tanan nila nga mga kakulangan, sang ila pagkadihimpit, kag sang ila mga kaluyahon; kag dili lamang nga buut Sia sa pagtinlo sa ila gikan sa sala kag maghatag sing kaluwasan bangud sa Iya dugo, kondi nga buut Sia sa pagbusug man sang mga ginahandum sang tagiposoon sang tanan nga magpasugut sa paggamit sang Iya singkaw, sa pagpas-an sang Iya lulan. Iya katuyu-an ang paghatag sing paghidaet kag pahuway sa sadtong ta-nan nga magpalapit sa Iya sa pagpangayo sing tinapay sang kabuhi. Ginakinahanglan Niya kita sa pagbuhat lamang sang mga katungdanan nga magaagubay sang aton mga tikang sa putukputukan sang kahimayaan nga dili madangat sang malinapason. Ang matuud kag malipayon nga kabuhi sang kalag amo ang pagpapuyo kay Kristo sa sulud, ang paglaum sang himaya. {PK 62.1}

Isa Liwan ka Pakiana

Madamu ang nagapamangkot, “Anhon ko nga pag-panugyan sang akon kaugalingon sa Dios?” Nagahandum ikaw sa paghatag sang imo kaugalingon sa Iya, apang maluya ikaw

sa imo gahum, nahiulipon ikaw sang pangduhaduha, kag ginagahuman sang pamatasan sang imo pagkabuhi sa sala. Ang imo mga saad kag ang mga tinapatan kaangay sang lubid nga balas. Dili ikaw makagahum sang imo mga panghunahuna, sang imo mga balatyagon, sang imo gugma. Ang imo paghibalo sang imo binungkag nga saad kag mga panug-an nga wala matuman nagapaluya sang imo pagsalig sa imo kaugalingon nga kahanuut, kag nagadul-ong sa imo sa pagbatyag nga ang Dios dili magbaton sa imo; apang dili ka kinahanglan magdula sing paglaum. Ang kinahanglan nga imo paghangpon amo ang matuud nga kusug sang kabubut-on. Ini amo ang manugdumala nga gahum sa kinaugali sang tawo, ang gahum sa pagtapat, okon sang pagpili. Ang tanan nga butang nagasandig sa matarung nga pagtapat sang kabubut-on. Ang gahum sa pagpili ginhatag sang Dios sa tawo; ini mangin-ila agud nga paghanason nila. Dili ikaw makabaylo sang imo tagiposoon, dili ikaw sa imo kaugalingon makahatag sa Dios sang iya paghigugma; apang sarang ikaw makapili sa pag-alagad sa Iya. Sarang nimo mahatag sa Iya ang imo kabubut-on; niyan magapangabudlay Sia sa imo sa pagbuut kag sa paghimo suno sang minamaayo Niya. Sa sini nga bagay ang imo bug-os nga kinaugali madala sa idalum sang paggahum sang Espiritu ni Kristo; ang imo paghigugma mabug-os sa Iya, ang imo panghunahuna manginsuno sa Iya. {PK 63.1}

Ang handum sang pagkaayo kag pagkabalaan mata-rung tubtub sa ila madangatan, apang kon magdulog ikaw diri, wala sila sing kapuslanan. Madamu ang magakawala sang sila ang nagapaabut kag nagahandum sa pagka-Kristohanon. Wala sila makalambut sa duug nga amo ang pagpanugyan sa kabubut-on sang Dios. Wala sila nagapili sa pagka-Kristohanon. {PK 64.1}

Bangud sang matarung nga paggamit sang kabubuton, ang bug-os nga pagbaylo mahimo sa imo kabuhi. Bangud sa pagpanugyan sang imo kabubut-on sa kay Kristo, ginapun-an nimo ang imo kaugalingon sing gahum nga labaw sa tanan nga mga pagbulut-an kag kagamhanan. Magabaton ikaw sing kusug gikan sa kahitaasan sa pagpalig-on sa imo, kag ngani bangud sa dalayon nga pagpanugyan sa Dios makatakus ikaw sa pagkabuhi sing bag-o nga kabuhi, nga amo ang kabuhi sang pagtoo. {PK 64.2}

BAHIN 6

ANG PAGTOO KAG ANG PAGBATON

SA TAPUS na mapamadmad ang imo panghunahuna sang Espiritu Santo, makita nimo ang kalainan sang sala, ang iya gahum, ang iya kalaut, kag ang iya kaimolan; kag magatamud ka sa iya nga may kangil-ad. Nagabatyang ikaw nga ang imo sala nagpabulag sa imo sa Dios, nga yara ikaw nga gapus sa gahum sang yawa. Sa nagalabi ang imo pagpaninguha sa pagpalagyo, nagalabi man ang imo pagkilala sang imo pagkaluya. Ang imo mga hinyo dili mga putli; ang imo tagiposoon dili matinlo. Nakita nimo nga ang imo kabuhi napuno sang pagkamaiyaiyahon kag sala. Nagahandum ikaw nga pagpatawaron, nga pagtinlo-an, nga pagluwason. Ang pagpakigsuno sa Dios, ang pagpakigangay sa Iya— anano ang imo takus mahimo agud sa pagdangat sini? {PK 65.1}

Ang paghidaet amo ang imo kinahanglan—ang pagpatawad sang langit kag ang paghidaet kag gugma sa kalag. Ang pilak dili sarang makabakal sa iya, ang kaalam dili makahiagum sa iya, ang ihibalo dili makadangat sa iya; dili gid ikaw makalaum bangud sa imo kaugalingon nga pagpaninguha, sa pagagum sa iya. Apang ang Dios nagatanyag sina sa imo subung nga isa ka amoma, “sa wala sing pilak kag sa wala sing bili.” Isaias 55:1. Mangin-imo sia, kon buut ka lamang sa pag-untay sang imo butkon kag hugakumon sia. Ang Ginoo nagsiling, “Kon ang inyo mga sala subung sang karmesi, manginmaputi sila subung sang niebe; kon mga mapula sila subung sang eskarlata, manginsubung sila sang maputi nga buhok.” Isaias 1:18. “Kag pagahatagan Ko kamo sing bag-o nga tagiposoon, kag pagabutangan Ko sing espiritu nga bag-o sa sulud ninyo.” Esekiel 36:26. {PK 65.2}

Toohi ang Saad

Gintuad nimo ang imo sala, kag sa tagiposoon ginsikway sila. Nagtapat ikaw sa paghatag sang imo kaugalingon sa Dios. Karon kadto ka sa Iya, kag magpangayo nga paghugasan Niya ang imo mga sala, kag hatagan ikaw sing bag-o nga tagiposoon. Niyan toohi nga ini ginahimo Niya tungud kay vagsaad Sia. Ini amo ang leksyon nga ginpanudlo ni Jesus sang yari pa Sia diri sa duta, nga ang hiyas nga ginsaad sang Dios sa aton, pagtoohan naton kag mabaton naton, kag manginaton. Si Jesus nagpang-ayo sang mga tawo sa ila mga balati-an kon sila ang may pagtoo sa Iya gahum; ginbuligan Niya sila sa mga butang nga ila makita, kag sa amo nga bagay ginpabaskug sila sa pagsalig sa Iya nahanungud sa mga butang nga dili nila makita—sa pagtuytuy sa ila sa pagtoo sa gahum Niya sa pagpatawad sang mga sala. Ini Iya nga ginsaysay sing maathag sang Iya pag-ayo sa tawo nga nagbalatian sang pagpalamatay sang lawas: “*Agud nga inyo mahibalo-an nga ang Anak sang tawo may kagamhanan sa duta sa pagpatawad sang mga sala*, gilayon nagsiling Sia sa tawo nga nagakalamatay ang lawas: Tindug ka, kuhaa ang imo duyan kag kadto ka sa imo balay.” Mateo 9:6. Amo man ang ginsiling ni Juan nga manug-ebanhelyo, sang iya paghambal nahanungud sang mga kalatingalahan ni Kristo, “Apang ini sila ginsulat, agud nga magtoloo kamo, nga si Jesus amo si Kristo,

ang Anak sang Dios; kag agud nga, sa pagtoo, may kabuhi kamo sa Iya ngalan.” Juan 20:31. {PK 67.1}

Gikan sa mahapus nga mga sinulat sa Biblia kon ginano nga pagayo ni Jesus sa masakiton, makatoon kita kon paano nga pagtoo naton sa Iya tungud sa pagpatawad sang aton mga sala. Balik kita sa maragtas sang tawo nga nagakalamatay ang lawas, didto sa Betsaida. Ining kailo nga naga-antus wala gid sing mahimo; wala gid niya magamit ang iya mga paa sa sulud sang katloan ka mga tuig. Apang si Jesus nagsogo sa iya “Tindug ka, kuhaa ang imo higdaan, kag maglakat.” Ang masakiton nga tawo nagsiling kunta, “Ginoo, kon ayohon Mo ako sing bug-os, pagatumanon ko ang Imo mga polong.” Apang wala, gintoohan niya ang mga polong ni Kristo, gintoohan niya nga gin-ayo sia sing bug-os, kag nagtinguha sia sa gilayon: nagbuut sia sa iya kaugalingon sa paglakat, kag nakalakat sia. Nagtuman sia sang mga polong ni Kristo, kag ang Dios naghatag sa iya sing gahum. Nagayo sia sing bug-os. {PK 68.1}

Ang Imo Dapat Himoon

Sa amo man nga bagay ikaw makasasala. Dili ikaw makatumbas sang imo nagliligad nga mga sala, dili ikaw makabaylo sang imo tagiposoon, kag himo-on ang imo kaugalingon nga balaan. Apang ang Dios nagsaad sa pagbuhat sini nga tanan tungud sa imo bangud sa kay Kristo. Toohi ang amo nga saad. Itu-ad ang imo sala kag itugyan ang imo kaugalingon sa Dios. *Magbuut* ka sa pag-alagad sa Iya. Sa pagkamatuud sa ginahimo mo ini, ang Dios magatuman sang Iya mga polong sa imo. Kon nagatoo ikaw sa Iya mga saad—magtoo ka man nga ginpatawad Niya ikaw kag gintinlo-an—ang Dios magahatag sini nga kamatooran; magaayo ikaw sing bugos, subung sang paghatag ni Kristo sa may nagakalamatay nga lawas sing gahum sa paglakat, sang pagtoo niya nga gin-ayo sia. *Mangin-amo* man ini sa imo kon magtoo ikaw. {PK 68.2}

Dili ka maghulat sa *pagbatyag* nga naayo ikaw sing bug-os, kondi nga magsiling ka, “Nagatoo ako; nga ina matuud, dili tungud kay ginabatyag ko, kondi nga tungud kay ang Dios nagsaad.” {PK 69.1}

Isa Liwan ka Saad

Si Jesus nagsiling, “Ang tanan nga mga butang nga pagpangayoon ninyo sa pagpangamuyo, magtoloo kamo nga pagabatonon ninyo sila kag mainyo ninyo.” Markos 11:24. May yara nga kondisyon sa sini nga saad—nga magpangamuyo kita sono sa kabubut-on sang Dios. Apang kabubut-on sang Dios ang pagtinlo sa aton gikan sa sala, ang paghimo sa aton nga Iya mga inanak, kag ang pagpatakus sa aton sa pagkabuhi sang balaan nga kabuhi. Busa sarang kita makapangayo sini nga mga pagpakamaayo, kag magtoo nga mabaton naton kag pasalamatan ang Dios nga nabaton naton sila. Aton kahigayonan ang pagpalapit sa kay Jesus kag magpatinlo, kag sa pagtindug sa atubangan sang kasogo-an sa wala sing kahuya kag pagkasakit. “Busa karon, wala sing bisan ano nga katagudili-an sa mga yara kay Kristo Jesus nga nagagilinawi indi siling sang unud, kondi siling sang Espiritu.” Roma 8:1. {PK 69.2}

Sumugod karon dili na ikaw imo; binaklan ikaw sa kabilihan. “Gintubus kamo sa walay pulus ninyo nga pangabuhi, . . . indi sa mga butang nga madinulunton, subung sang bulawan, kon pilak; kondi sang hamili nga dugo ni Kristo subung sang isa ka

kordero nga walay kasawayan kag wala sing dagta.” 1 Pedro 1:18, 19. Bangud sining mahapus nga buhat sa pagtoo sa Dios, ang Espiritu Santo nagahatag sing bag-o nga kabuhi sa imo tagiposoon. Anak ikaw nga natawo sa panimalay sang Dios, kag higugma-on Niya ikaw subung sang Iya paghigugma sa Iya Anak. {PK 69.3}

Dili Ka Mag-isol

Karon nga nahatag na nimo ang imo kaugalingon sa kay Jesus, dili ka na mag-isol, dili na pagkuha ang imo kaugalingon gikan sa Iya kondi nga sa adlaw-adlaw magsiling ka, “Iya na ako ni Kristo; nahatag ko na ang akon kaugalingon sa Iya;” kag pangayo ka sa Iya nga ihatag Niya ang Iya Espiritu, kag bantayan ikaw sa Iya bugay. Subung nga bangud sa paghatag sang imo kaugalingon sa Dios, kag sa pagtoo sa Iya, nga mangin-anak ikaw Niya, subung man dapat ka magkabuhi sa Iya. Ang pinadala nagasiling, “Busa, sa bagay nga ginbaton ninyo si Kristo Jesus ang Ginoo, maggilinawi kamo sa Iya.” Kolosas 2:6. {PK 70.1}

Ang iban daw sa nagabatyag nga kinahanglan anay sila nga pagtilawan, kag dapat sila sa pagpakita sa Ginoo nga nagliwan na sila, sa wala pa nila mabaton ang pagpakamaayo sang Dios bisan sa karon. Kinahanglan sila sang Iya bugay, sang Espiritu ni Kristo, sa pagbulig sa ila sa ila mga kaluyahon, kay kon dili, dili sila makabato sa kalaut. Si Jesus maluyag nga magpalapit kita sa Iya subung nga amo gid kita, makasasala, wala sing masarangan, kag nagasalig lamang sa Iya. Sarang kita makapalapit kaupud sang tanan naton nga mga kaluyahon, sang aton mga kabuangan, sang aton pagkamakasala kag magluhud sa Iya mga tiilan sa paghinulsul. Ginahimaya Niya ang paghaku sa aton sang mga butkon sang Iya gugma, kag pagbugkos sang aton mga pilas kag sa pagtinlo sa aton gikan sa tanan nga dili putli. {PK 70.2}

Nгаа Madamu Nagakahulog

Diri sini ang ginakahulogan sang mga linibolibo: wala sila nagatoo nga si Jesus nagapatawad sa ila, sa ila gid kaugalingon. Wala nila ginatoohi ang Dios sa Iya mga polong. Kahigayonan sang tanan nga nagatuman sang mga kinahanglanon sa paghibalo tungud sa ila kaugalingon nga ang kapatawaran ginahatg sa wala sing bili sa tagsa ka sala. Ipahilayo ang panghunahuna nga ang mga saad sang Dios wala ginatuyo nga sa imo. Ginahatag sila sa tagsa ka mahinulsulon nga makasasala. Ang kusug kag ang bugay gin-aman bangud sa kay Kristo, nga pagadal-on sang manugtunda nga manugbalantay sa tagsa ka matinoohon nga kalag. Wala sing tama ka makasasala sa bagay nga dili sila makakita sing kusug, sing kaputli, kag sing katarungan sa kay Jesus nga nagpangimatay tungud sa ila. Nagahulat Sia sa pagkuha sang ila mga panapton nga namusingan kag nabulit sang sala, kag sa pagpasuklub sa ila sang maputi nga panapton sang katarungan; Sia nagasogo sa ila nga magkabuhi, kag indi magpanginmatay. {PK 71.1}

Ang Dios wala magakabig sa aton subung sang pagkabig sang dutan-on nga tawo sa iya masigkatawo. Ang Iya mga hunahuna mga hunahuna sang kalooy, gugma, kag malum-ok nga pagkahanoklog. Nagasiling Sia, “Magbiya ang malauton sang iya dalan, kag ang tawo nga madauton sang iya mga hunahuna; kag magbalik sia kay Jehoba, nga Sia may paghanoklog sa iya; kag sa aton Dios, kay nagapatawad Sia sing bugana gid.” “Ginpanas Ko, ang imo mga pagkainalalison subung sang gal-um nga madamul, kag subung sang

panganud ang imo mga sala; balik ka sa Akon kay gintubus Ko ikaw.” Isaias 55:7; 44:22. {PK 71.2}

Ang Dios Nagahigugma sa Imo

“Kay indi nagakahamuut Ako sang kamatayon sang nagakapatay, siling sang Ginoo nga si Jehoba, busa, liliso, kamo, kag magkalabuhi kamo.” Esekiel 18:32. Si Satanas handa sa pagkawat sang mga bulahan nga mga pagpasalig sang Dios. Ginahandum niya ang pagkuha sang tagsa ka igpat sang paglaum kag sang tagsa ka silak sang kapawa gikan sa kalag; apang dili sia pagtuguti sa paghimo sini. Dili pagpamatii ang manunulay, kondi nga magsiling ka, “Si Jesus namatay agud nga ttabuhi ako. Ginhigugma Niya ako, kag dili Sia buut nga ako mawala. May mahinoklogon ako nga Amay nga yara sa mga langit; kag bisan nga ginpatuyangan ko ang Iya gugma, bisan nga ang pagpakamaayo nga Iya ginhatag sa akon ginpasamaksamakon ko, magatindug ako kag magkadto sa akon Amay, kag magsiling, “Amay, nakasala ako batok sa langit kag sa Imo atubangan; kag indi na ako takus pagtawgon nga anak Mo; himo-a ako nga subung sang isa sang Imo mga mamumugon.” Ang palaanggiran nagasugid sa imo kon paano ang pagbaton sa nagtiyog: “Kag sang sa malayo pa sia, nakit-an sia sang iya amay, kag naghikalooy sia sa iya, kag nagdalagan, kag ginhakus sia niya sa liog, kag ginhalukan gid.” Lukas 15:18-20. {PK 72.1}

Apang bisan pa ini nga paalanggiran nga malolo kag makabalatyag sia, kulang pa sa pagpahayag sang walay katubtuban nga gugma sang langitnon nga Amay. Ang Ginoo naghambal bangud sa Iya manalagna, “Sa gugma nga walay katapusan, ginhigugma Ko ikaw; tungud sini ginuntay Ko tubtub sa imo ang Akon kaayohan.” Jeremias 31:3. Sang malayo pa ang makasasala sa balay sang Amay, nga gin-usikan niya ang iya pagkabutang sa mga dumulo-ong nga duta, ang tagiposoon sang Amay, nagakahanoklog sa iya, kag ang tagsa ka handum nga nagbugtaw sa kalag sa pagbalik sa Dios, amo ang mahumok nga pag-ampo sang Iya Espiritu, nga nagabihag, nagapakilooy, nga nagadala sang nagtiyog sa tagiposoon sang gugma sang Amay. {PK 73.1}

Dili Ka Magduhaduha

Kaupud sang bugana nga mga saad sa Biblia sa atubangan nimo, makahatag ka bala sing duug sa pagpangduhaduha? Makatoo ka bala nga kon ang kailo nga makasasala nagahandum sa pagbalik, nagahandum sa pagtalikod sa sala, ang Ginoo magadumili sa iya sa pagpalapit sa Iya mga tiil sa paghinulsul? Ipahilayo ang kasubung nga hunahuna! Wala na sing butang nga magadaut sang imo kaugalingon nga kalag sing labi sang sa paghuput sang amo nga hunahuna nahanungud sa aton langitnon nga Amay. Ginadumtan Niya ang sala, apang ginahigugma Niya ang makasasala, kag ginhatag Niya ang Iya kaugalingon sa lawas ni Kristo, agud nga ang tanan nga buut, maluwas, kag makaagum sang walay katubtuban nga pagkabulahan sa ginharian sang himaya. Anano pa nga makatalandug okon maglabi ka humok nga polong ang sarang magamit nga maglabi pa sang sa Iya ginpili sa pagpahayag sang Iya paghigugma sa aton? Sia nagsiling, “Nagakalipat bala ang babae sang iya anak nga masoso, nga nagauntat sa pagkalooy sang anak sang iya kasudlan? Bisan pa makalipat sila, Ako indi makalipat sa imo.” Isaias 49:15. {PK 73.2}

Tolok ka sa ibabaw, ikaw nga nagaduhaduha kag nagakurug; kay si Jesus nagakabuhi sa pagtabang sa aton. Magpasalamat ka sa Dios tungud sang hiyas sang Iya mahal nga Anak, kag magpangamuyo nga kabay pa nga ang Iya pagpangimatay tungud sa imo dili mangin walay pulus. Ang Espiritu nagaagda sa imo sa karon. Palapit ka upod sang imo bug-os nga tagiposoon sa kay Jesus, kag mabaton nimo ang Jya pagpakamaayo. {PK 74.1}

Kapahayagan Sang Gugma

Sa ginabasa mo ang mga saad, dumduma nga sila mga kapahayagan sang Iya dili mamitlang nga gugma kag kalooy. Ang daku nga tagiposoon sang Walay Katubtuban nga Gugma ginapalapit sa makasasala upod sang dili matungkad nga paghikalooy. “Nga sa Iya may aton kita sang pagtubus tungud sang Iya dugo, sang kapatawaran sang aton mga paglapas.” Epeso 1:7. Hoo, toohi lamang nga ang Dios imo kabulig. Buut Sia sa pag-uli sang Iya larawan sa tawo. Sa nagapalapit ikaw sa Iya upod sang pagpanuad kag paghinulsul, magapalapit man Sia sa imo upod sang kalooy kag kapatawaran. {PK 74.2}

BAHIN 7

PAGTILAW SANG PAGKAGINTOTON-AN

SABAGAY nga, kon sin-ong kay Kristo, bag-o sia nga natawo: ang mga butang nga mga daan nagtalaliwan; yari karon, ang tanan nagbalag-o.” 2 Korinto 5:17. {PK 75.1}

Ang isa ka tawo dili makasarang makasugid sang sibo nga dag-on okon duug, okon makatoltol sang tanan nga paghiliangot sang mga hitabu nga naghikot sang pagliso, apang ini dili makapamatuud sa iya nga wala sia maliso. Si Kristo nagsiling sa kay Nikodemo, “Ang hangin, kon diin ang iya buut, nagahuyup, kag mabati-an mo ang iya tingug, apang indi mo mahibalo-an kon diin nagahalin sia, kag kon diin nagapakadto. Subung sina, ang tanan nga pinanganak sa Espiritu.” Juan 3:8. Kasubung sang hangin nga dili makita, apang ang patubas niya makita sing maathag kag mabatyagan, amo man ang Espiritu sang Dios sa iya pagpangabudlay sa tagiposoon sang tawo. Inang gahum nga nagatuga liwan, nga wala sing mata nga tawhanon nga sarang makakita, nagapatawo sing bag-o nga kabuhi sa kalag; nagatuga sia sing bag-o nga tawo sa larawan sang Dios. Samtang ang pagpangabudlay sang Espiritu malinong kag dili mahangpan, ang iya mga patubas mga hayag. Kon ang tagiposoon nabag-o sang Espiritu sang Dios, ang kabuhi magapamatuud sa kamatooran. Samtang wala kita sing mahimo sa pagbaylo sang aton mga tagiposoon, okon sa pagdala sang aton kaugali-ngon nga manginsuno sa Dios; samtang dili kita dapat sa pagsalig sa aton kaugalingon okon sa aton mga maayo nga mga binuhatan, ang aton mga kabuhi magapahayag kon nagapuyo bala ang bugay sang Dios sa sulud naton okon wala. Ang pagbaylo makita sa kinaugali, sa pamatasan, kag sa mga butang nga aton ginahimo. Ang ginkalainan manginmaathag kag malig-on sa tunga sang ila pagginawi anay kag sang ila pagginawi nga sa karon. Ang kinaugali ginapahayag, dili bangud sang tumalagsa nga mga maayo okon dili mga maayo nga mga buhat, kondi bangud sang mga ginakaduyugan sang kinabatasan nga mga polong kag mga buhat. {PK 75.2}

Matuud nga may manginyara nga himpit nga pagginawi nga sa gowa sa wala sing gahum nga manugpabago ni Kristo. Ang gugma sa gahum kag ang handum nga pagdayawon sang iban sarang makabunga sing maayo nga kabuhi. Ang pagtahud sang kaugalingon magadul-ong sa aton sa paglikaw sang dagway sang sala. Ang maiyaiyahon nga tagiposoon magahimo sing mainalwanon nga mga buhat. Apang sa ano niyan nga bagay, makilala naton kon sa diin kita nayon? {PK 77.1}

Sin-o ang Tagiya Sang Imo Tagiposoon?

Sin-o ang naga-uyat sang tagiposoon? Sa kay sin-o ang aton mga hunahuna? Sin-o ang ginahigugma naton nga pagsugilanonon? Sin-o ang nagahuput sang aton mainit nga gugma kag sang aton mga pagpanikasug? Kon kita Iya ni Kristo ang aton mga hunahuna yara sa Iya, kag ang aton labing matam-is nga mga hunahuna yara sa Iya. Ang tanan nga aton, ginapanugyan sa Iya. Nagahandum kita sa pagdala sang Iya larawan, sa pagginhawa sang Iya Espiritu, sa paghimo sang Iya kabubuton, kag sa pagpahaman sa Iya sa tanan nga butang. {PK 77.2}

Yadtong mga bag-o nga linuga sa kay Kristo Jesus magadala sing bag-o nga bunga sang Espiritu, “gugma, kalipay, paghidaet, pagkamapinailubon, pagkalolo, pagkaayo, pagtoo, pagkahagup, paggahum sa kaugalingon.” Galasias 5:22, 23. Indi na sila magagilinawi sono sa mga una nga mga kaligbon, kondi nga tungud sa pagtoo sa Anak sang Dios magasunod sila sa Iya mga tikang, magapasilak sang Iya kinaugali, kag magulay sang ila kaugalingon subung nga Sia ulay. Ang mga butang nga ila anay ginakaakigan, ginahigugma na nila sa karon; kag ang mga butang nga ila anay ginahi-gugma, ginakaakigan nila. Ang bugalon magamahagup kag magamapainubuson sing tagiposoon. Ang mga walay pulus kag matinaastaason sadto anay sa karon nga maminatud-on kag maugdang. Ang mga palahubug sadto anay magabut-anan, kag ang mga mahigko magaputli. Ang mga malaut nga mga pamatasan kag mga pagsolondan sang kalibutan pagaisikway. Ang mga Kristohanon dili magapangita sang “nagowa nga mga puni,” “kondi sang tinago nga tawo sa tagiposoon, sa indi pagkamamalasyon, sang mahagup nga espiritu kag makighidaeton.” 1 Pedro 3:3,4. {PK 78.1}

Ang Pagliwan Kinahanglan

Wala sing kasanagan sang matuud nga paghinulsul, kon indi sia magapakita sing pagliwan. Kon ig-uli niya ang mga sinaad, ighatag liwan ang iya mga kinawat, igpanuad ang iya mga sala, kag higugma-on ang Dios kag ang iya masigkatawo, ang makasasala makapanalig nga nakaligad sia sa kamatayon pa kabuhi. {PK 78.2}

Kon, subung nga mga malalison, makasasala nga mga tinuga, magpalapit kita sa kay Kristo kag mangin-umalambit sang Iya bugay nga manugpatawad, ang gugma magatubu sa tagiposoon. Ang tagsa ka lulan mamagan: tugnud kay ang singkaw nga ginagamit ni Jesus mamag-an. Ang katungdanan mangin kalalipayan, kag ang pag-antus maginkalasadiahan. Ang dalan nga anay daw ginalikupan sang kadudulman, magasanag tungud sang silak gikan sa Adlaw sang Katarungan. {PK 78.3}

Ang Gahum Sang Gugma

Ang pagkamagayon nga kinaugali ni Kristo makita sa Iya mga sumulunod. Nahamut-an Niya ang pagtuman sang kabubut-on sang Dios. Ang gugma sa Dios, ang kakugi sa Iya himaya, amo ang manugmandu nga gahum sa kabuhi sang Manluluwas. Ang gugma nagapaambong kag nagapadungganon sang tanan Niya nga mga pagginawi. Ang gugma iya sang Dios. Ang wala matugyan nga tagiposoon dili makahimo okon makatuga sa iya. Ina makita lamang sa mga tagiposoon sa diin si Jesus naghari. “Kita nagahigugma, kay Sia naghigugma sing una sa aton.” 1 Juan 4:19. Sa tagiposoon nga ginbag-o sang langitnon nga bugay, ang gugma amo ang sadsaran sang tanan nga pagginawi. Nagapatahum sang mga pagginawi, nagagahum sang mga balatyagon, nagagahum sang mga handum, nagadaug sang mga kaawayon, kag nagapadungganon sang gugma. Ini nga gugma, kon mabunyagan sa kalag, magapatam-is sang kabuhi, kag nagapailig sang manug-ulay nga gahum sa tanan. {PK 79.1}

May yara nga duha ka sayup nga kinahanglan sing pinasahi nga pagbantayan sang mga inanak sang Dios —ilabi na gid sa sadtong mga bag-o pa lamang magluntad sa pagsalig sa Iya bugay. Ang nahauna, nga nahambalan na, amo ang pagtamud sa ila kaugalingon nga mga binuhatan, sa pagsalig sa tanan nga ila masarangan, sa pagdala sang ila

kaugalingon nga manginkahalamut-an sang Dios. Yadtong nagatinguha sa pagpakabalaan bangud sa iya kaugalingon nga buhat sa pagbantay sang kasogo-an, dili gid makasarang. Ang tanan nga mahimo sang tawo sa wala si Kristo bulit sang pagkamaiyayahon kag sang sala. Ang bugay ni Kristo lamang bangud sa pagtoo amo ang makahimo sa aton nga balaan. {PK 79.2}

Pagtuman Sang Gugma

Ang isa nga kabatok sini kag nga dili diutay ang iya katalagman amo, nga ang pagtoo sa kay Kristo nagakuha sa tawo sing katungdanan sa pagbantay sang sogo sang Dios; nga tungud kay bangud sa aton pagtoo lamang, mangin-umalambit kita sang bugay ni Kristo, ang aton mga binuhatan wala na sing kalabtan sa aton kaluwasan. {PK 80.1}

Apang talupangda diri nga ang pagkamatinumanon dili lamang ang pagtuman sa gowa kondi ang pag-alagad sa gugma. Ang kasogo-an sang Dios amo ang pahayag sang Iya gid kaugalingon nga kinaugali; ina amo ang lawas sang labing daku nga sadsaran sang gugma, kag amo ang palatukuran sang Iya pagbulut-an sa langit kag sa duta. Kon ang aton tagiposoon mabag-o sa kaangay sang Dios, kon ang langitnon nga kasogo-an matanum sa kalag, dili bala magpahayag ang kasogoan sang Dios sa kabuhi? Kon ang palatukuran sang gugma matanum sa tagiposoon, kon ang tawo mabag-o sono sa larawan sadtong nagtuga sa iya, ang bag-ong katipan sang saad matuman, “Igapahamtang Ko ang Akon mga kasogo-an sa ila mga tagiposoon, kag igapanulat Ko sila sa ila panghunahuna.” Hebreinhon 10:16. Kag kon ang kasogo-an masulat sa tagiposoon, dili bala sia makatadlong sang kabuhi? Ang pagkamatinumanon —ang pag-alagad kag ang pagpanugayan sa gugma— amo ang matuud nga tanda sang pagkagintoton-an. Ini amo ang ginasiling sang Kasulatan, “Kay amo ini ang gugma sang Dios nga pagbantayan ta ang Iya mga sogo.” 1 Juan 5:3. “Ang nagasiling: Ako nakakilala sa Iya; kag wala magabantay sang Iya mga sogo, ini sia butigon, kag ang kamatooran wala sa iya.” 1 Juan 2:4. Sa baylo sang pagkuha sa tawo sing katungdanan sa pagkamatinumanon, ang pagtoo, kag ang pagtoo lamang, amo ang nagahimo sa aton nga mga umalambit sa bugay ni Kristo, nga amo ang magapakatakus sa aton sa pagkamatinumanon. {PK 80.2}

Ang Kaluwasan Walay Bili

Dili naton makuha ang kaluwasan bangud sa aton pagkamatinumanon; tungud kay ang kaluwasan amo ang walay bayad nga hias (hatag okon bugay) sang Dios, nga pagabatonon tungud sa pagtoo. Apang ang pagkamatinumanon amo ang bunga sang pagtoo. “Nahibalo-an man ninyo, nga Sia ginpahayag sa pagkuha sang aton mga sala, kag wala sing sala sa Iya. Ang tanan nga nagapuyo sa Iya, indi nagapakasala; bisan sin-o nga nagapakasala wala makakita sa Iya, kag wala makakilala sa Iya.” 1 Juan 3:5, 6. Diri sini ang matuud nga pagtilaw. Kon kita nagapabilin sa kay Kristo, kon ang gugma sang Dios nagapuyo sa aton, ang mga balatyagon, ang aton mga hunahuna, ang aton mga hulag, manginsono sa kabubut-on sang Dios subung nga napahayag sa mga palatukuran sang Iya balaan nga kasogoan. “Mga nonoy, indi kamo pagpatalangon ni bisan sin-o. Ang nagahimo sing katarungan, among matarung, siling nga matarung man Sia.” 1 Juan 3:7. Ang katarungan ginasaysay sang talaksan sang balaan nga kasogo-an sang Dios,

subung sang ginpahayag sa napulo ka mga tulumanon sa Sinai. {PK 81.1}

Naluwas Tungud sa Bugay

Inang ginatawag nga pagtoo sa kay Kristo nga nagasiling nga ang tawo wala na sing katungdanan sa pagkamatinumanon sa Dios, dili ina pagtoo, kondi palabilabi. “Kay tungud sang bugay manginlinuwas kamo tungud sa pagtoo.” Epeso 2:8. Apang “ang pagtoo, kon wala sing mga binuhatan, patay sa iya kaugalingon.” Jakobo 2:17. Si Jesus nagsiling sa Iya kaugalingon sa wala pa Sia makakari sa duta, “Ang paghimo sang Imo kabubut-on, Dios Ko, nahamut-an Ko. Kag ang Imo kasogo-an yari sa sulud sang akon kasudlan.” Salmos 40:8 Kag sa wala pa Sia magkayab sa langit, Sia nag siling, “Ako nagbantay sang mga sogo sang Akon Amay, kag Ako nagapabilin sa Iya gugma.” Juan 15:10. Ang Kasulatan nagasiling, “Kag sa sini mahibalo-an ta, nga ginakilala ta Sia, kon ginabantayan ta ang Iya mga sogo.. .. Ang nagasiling nga yara sa Iya, dapat maglakat subung sang paglakat Niya.” 1 Juan 2:3-6. “Kay si Kristo nag-antus man tungud sa aton, nga ginbilinan kita Niya sing solondan, agud pagsundon ninyo ang Iya mga tikang.” 1 Pedro 2:21. {PK 82.1}

Ang kondisyon sang kabuhi nga walay katapusan sa karon amo man gihapon subung sang una—subung man gihapon sang didto sa Paraiso sa wala pa ang pagkahulog sang aton una nga mga ginikanan—amo ang himpit nga pagkamatinumanon sa Dios, ang himpit nga pagkamatarung. Kon ang walay katapusan nga kabuhi ihatag sa liwan pa nga kondisyon nga lain sini, niyan ang kalipayan sang bug-os nga kalibutan manginyara sa katalagman. Ang dalan pagabuksan sa sala, kaupud sang tanan niya nga mga kalautan kag kaimohan, nga tnapapadayon nga wala sing katapusan. {PK 82.2}

Ang Pagkinahanglan Sang Gahum ni Kristo

Mahimo ni Adan, sa wala pa ang pagkahulog niya sa sala, ang pagbuhat sing matarung nga pagginawi bangud sa pagkamatinumanon sa mga kasogo-an sang Dios. Apang wala niya mahimo ini, kag tungud sang iya sala ang aton mga kinaugali nahulog, kag dili kita makahimo sang aton kaugalingon nga inagmatarung. Tungud kay kita mga makasasala, mga dili balaan, dili kita makatuman sing himpit sang balaan nga kasogo-an. Wala kita sing katarungan nga sa aton kaugalingon nga ikasugata sa ginakinahanglan sang kasogo-an sang Dios. Apang si Kristo nag-aman sing dalan agud makagowa kita. Nagapuyo Sia sa duta, sa tunga sang mga pagtilaw kag mga pagsulay subung sang aton pagasugataon. Nagkabuhi Sia sing walay sala nga kabuhi. Namatay Sia tungud sa aton, kag karon nagatanyag Sia sa pagkuha sang aton mga sala kag sa paghatag sa aton sang Iya katarungan. Kon ighatag nimo ang imo kaugalingon sa Iya, kag batonon Sia subung nga imo manluluwas, niyan, bisan kon daw ano ka makasasala ang imo kabuhi, tungud sa Iya, pagaisipon ikaw nga matarung. Ang kinaugali ni Kristo magatindug sa baylo sang imo kinaugali, kag pagabatonon ikaw sa atubangan sang Dios su-bung gid sang wala ikaw makasala. {PK 83.1}

Labut pa sini, si Kristo nagabaylo sang tagiposoon. Nagapabilin Sia sa imo tagiposoon bangud sa pagtoo. Dapat ikaw sa pagpadayon sini nga pagpakig-angot sa kay Kristo bangud sa pagtoo kag sa dayon nga pagpanugyan sang imo kabubut-on sa Iya; kag sa gihapon sang ginahimo nimo ini, magapangabudlay Sia sa imo kag magahimo suno sang

Iya maayo nga luyag. Ngani makasiling ikaw, “Kag ang ginakabuhi ko karon sa unud, ginakabuhi ko sa pagtoo sa Anak sang Dios nga naghigugma sa akon kag nagtugyan Sia sang Iya kaugalingon tungud sa akon.” Galasia 2:20. Busa si Jesus nagsiling sa Iya mga gintoton-an, “Kay indi kamo ang mga nagapamolong, kondi ang Espiritu sang inyo Amay, nga nagapamolong sa inyo.” Mateo 10:20 Niyan kaupud kay Kristo nga nagapanghikot sa imo, mapakita mo ang amo man nga espiritu kag magabuhat sang amo man nga buluhaton—ang buluhaton sang katarungan kag pagkamatinumanon. {PK 84.1}

Indi Kita Makapabugal

Ngani wala kita sing aton kaugalingon nga ikapabugal. Wala kita sing katarungan sa pagpalabawlabaw sa aton kaugalingon. Ang aton lamang duug sang paglaum yara sa katarungan ni Kristo nga ginhatag sa aton, kag sa sinang ginahimo sang Iya Espiritu Santo nga nagapanghikot sa aton kag tungud sa aton. {PK 84.2}

Kon kita ang maghambal nahanungud sang pagtoo, may yara nga ginkalainan nga dapat nga pag-itanum sa painoino. May yara nga bagay sang pagpati nga lain gid katama sang sa pagtoo. Ang pagkaamo kag ang gahum sang Dios, ang kamatooran sang Iya polong, amo ang mga kamatooran nga bisan pa si Satanas kag ang iya mga sumolonod dili makapanghiwala sa ila tagiposoon. Ang Biblia nagasiling nga “Ang yawa nagatoloo man, kag nagakulurug (Jakobo 2:19); apang ini dili amo ang pagtoo. Sa diin may yara, dili lamang ang pagpati sa polong sang Dios, kondi man ang pagpanugyan sang kabubut-on sa Iya; sa diin ang tagiposoon ginatugyan sa Iya, ang gugma ginabutang sa Iya, yara ang pagtoo, ang pagtoo nga nagapanghikot tungud sa gugma, kag nagapaputli sang kalag. Bangud sini nga pagtoo, ang tagiposoon ginabag-o suno sa larawan sang Dios. Kag ang tagiposoon nga yara anay sa wala mabag-o nga kahimtangan nga dili makatuman sang kasogo-an sang Dios, kag indi gid makasarang, sa karon nagaka lipay sa iya mga balaan nga mga tulumanon, nga magasinggit kaupud sang manugsalmo, “Nga pagkadaku sang akon paghigugma sa Imo kasogo-an! Sa bug-os nga adlaw amo sia ang akon pamalandongon.” Salmos 119: 97. Kag ang pagkamatarung sang kasogo-an, natuman sa aton, “nga nagagilinawi indi siling sang unud, kondi siling sang Espiritu.” Roma 8:1. {PK 84.3}

Dili Ka Magpakaluya

May yara nga nakahibalo sang manugpatawad nga gugma ni Kristo, kag nagahandum sing totoo nga manginanak sang Dios, apang ginakilala nila nga ang ila kinaugali dili himpit, ang ila kabuhi masinalaypon, kag handa sila sa pagpangduhaduha kon bala ang ila mga tagiposoon ginpabag-o sang Espiritu Santo. Sa mga tagsing paglaum. Dapat kita gihapon sa pagyaub kag sa subung sina magasiling ako, Dili ka mag-isol nga wala paghibi sa tiilan ni fesus tungud sang aton mga kakulangan kag mga kasaypanan; apang dili kita magpakaluya. Bisin kon kita madaug sang aton kaaway, wala kita pagsikwaya, wala pagpatumbaya-i kag wala pagdumili sang Dios. Wala; si Kristo yara sa too sang Dios, nga nagaampo tungud sa aton. Ang siling sang hinigugma nga si Juan, “Mga nonoy ko, nagasulat ako sa inyo sini nga mga butang, agud nga indi kamo magpakasala. Apang kon may iban nga nakasala, may dalangpan kita sa Amay, si Jesukristo nga

matarung.” 1 Juan 2:1. Kag dili pagkalimti ang mga polong ni Kristo, “Kay ang Amay gid, nagahigugma sa inyo.” Juan 16:27. Nagahandum Sia nga pag-iuli Niya kamo sa Iya kaugalingon, sa pagtan-aw sang Iya kaugalingon nga kaputli kag kabalaan nga magasilak sa inyo. Kag kon lamang magpanugyan ikaw sang imo kaugalingon sa Iya, Sia nga nagpanugud sang maayo nga buluhaton, magapadayon sa iya tubtub sa adlaw ni Jesukristo. Pangamuyo ka sing labi ka hanuut; magtoo ka sing labi kalig-on. Sa ginawala naton ang pagsalig sa aton kaugalingon nga gahum, magpanalig kita sa gahum sang aton Manunubus, kag magadayaw kita sa Iya nga amo Sia ang kabuhi sang aton lawas. {PK 85.1}

Indi Pa Kita Himpit

Sa nagapalapit ikaw sing labi sa kay Jesus, magalabi pa ikaw ka masinalaypon sa imo kaugalingon nga mga mata; tungud kay ang imo mga itololok magaaathag, kag ang imo pagkadilihimpit makita nimo sing maathag nga may maathag nga ginkalainan sang sa Iya himpit nga kinaugali. Ini amo ang mga kasanagan nga ang mga daya ni Satanas nadulaan sang iya gahum, nga ang manugpabuhi nga pagbuyok sang Espiritu sang Dios nagapamadmad sa imo. {PK 86.1}

Wala sing madalum nga gugma sa kay Jesus nga sarang makapuyo sa tagiposoon nga wala nagakilala sang iya kaugalingon nga pagkamalauton. Ang kalag nga binalhin sang bugay ni Kristo magakaluyag sang Iya langitnon nga kinaugali, apang kon dili naton makita ang aton kaugalingon nga pagkalaut, ina amo ang dilimagsayup nga kasanagan nga wala kita makakita sang kagayon kag pagkaayo ni Kristo. {PK 87.1}

Sa nagalabi kadiutay ang aton pagtalupangud sa pagpakamahal sang aton kaugalingon, nagalabi ang aton pagtalupangud sa pagpakamahal sang walay katubtuban nga kaputli kag pagkamahigugma-on sang aton Manluluwas. Ang pagtamud sa aton kaugalingon nga pagkamakasasala, magatabog sa aton pakadto sa Iya nga sarang makapatawad; kag kon ang kalag, nga magkilala sang iya pagkaluya, magdangup sa kay Jesus, igapahayag Niya ang Iya kaugalingon sa gahum. Sang ang pagtalupangud sang aton kinahanglan nagatabog sa aton sing labi pakadto sa Iya kag sa polong sang Dios, nagalabi man kataas ang pagtolok naton sang Iya kinaugali, kag nagalabi man ka bug-os ang pagsilak sang Iya larawan. {PK 87.2}

BAHIN 8

ANG PAGTUBU SA KAY KRISTO

ANG pagbaylo sang tagiposoon nga bangud sini mangin-anak kita sang Dios, ginhambal sa Biblia subung nga pagkatawo. Sa liwan ginapaangay sia sa pagtubu sang maayo nga binhi nga ginpanggas sang mangunguma. Sa amo man nga bagay yadtong mga bag-o lamang maliso kay Kristo, kaangay lamang sang “mga kabataan nga bag-o magkalatawo,” sa ‘pagtubu’ (1 Pedro 2:2; Epeso 4:15) sa kadaku-on sang mga lalaki kag babae sa kay Kristo Jesus. Okon kaangay sang mga maayo nga binhi nga napanggas sa latagon, kinahanglan sila magtubu kag magdala sing bunga. Si Isaias nagasiling nga pagahingalanan sila nga “mga terebinto (kakahoyan) sang katarungan, nga tinanum ni Jehoba, nga sa iya maghimaya Sia.” Isaias 61:3. Busa gikan sa kinaugali nga kabuhi, ang mga halimbawa ginakuha, sa pagbulig sa aton sa paghangup sing maayo sang makatilingala nga mga kamatooran sang espirituhanon nga kabuhi. {PK 89.1}

Dili ang tanan nga kaalam kag kinaadman sang tawo makahatag sing kabuhi sa labing diutay nga butang nga tinuga. Lamang bangud sa kabuhi nga ginhatag sang Dios, sa Iya kaugalingon, nga ang mga tanum okon mga sapat sarang mabuhi. Subung man bangud lamang sang kabuhi gikan sa Dios nga ang espirituhanon nga kabuhi mapatawo sa mga tagiposoon sang tawo. Luwas lamang kon ang tawo “matawo gikan sa ibabaw” (Juan 3:3), dili sia makamanginumalambit sang kabuhi nga ginkari-an ni Kristo sa paghatag. {PK 89.2}

Pagtubu Espirituhanon

Subung sang sa kabuhi, amo man ang pagtubu. Ang Dios amo ang nagapabuskad sang bukol kag nagapabunga sang bulak. Bangud sa Iya gahum nagatubu ang binhi, “ang una hilamon, ugaling ang uhay, sa olehi ang pinasi nga matinggag sang uhay.” Markos 4:28. Kag ang manalagna nga si Oseas nagasiling nahanungud sa kay Israel, nga “sia magapamulak subung sang lirio.” “Magahatag sila liwan sing kabuhi sa trigo; kag magapalamulak sila subung sang puno sang ubas.” Oseas 14:5, 7. Kag si Jesus nagsogo sa aton, “Pamalandongang ninyo ang mga lirio kon paano ang pagtubo nila.” Lukas 12:27. Ang mga tanum kag ang mga bulak wala nagatulubu sa ila kaugalingon nga pagtatap okon paghimud-os okon pagpaninguha, kondi nga bangud sa pagbaton sadtong ginahatag sang Dios nga magasagud sang ila kabuhi. Ang bata dili, sa bisan ano nga paghimudos okon gahum nga sa iya kaugalingon, makadugang sa iya kataason. Subung man ikaw, bangud sa paghimud-os okon pagpaninguha nga sa imo kaugalingon, dili ka makaagum sing pagtubu nga espirituhanon. Ang tanum, okon ang bata, nagatulubu bangud sa pagbaton gikan sa iya palibut sadtong mga butang nga nagaalagad sa iya kabuhi—hangin, silak sang adlaw, kag pagka-on. Kon ano ining mga hiyas sang kinaugali sa mga kasapatan kag mga tanum, amo man si Kristo sa sadtong mga nagasalalig sa Iya. Sia amo ang ila “manginkapawa sa gihapon,” “ang adlaw kag kalasag.” Isaias 60:19. Salmos 84:11. Manginsubung Sia “sang tonog kay Israel,” “Magapanaug Sia subung sang ulan sa ibabaw sang ginalaban nga latagon.” Oseas 14:5;

Salmos 72:6. Sia amo ang buhi nga tubig, “ang tinapay sang Dios” nga “nagpanaug sa langit kag nagahatag sang kabuhi sa kalibutan.” Juan 6:33. {PK 90.1}

Sa dili matupungan nga hatag sang Iya Anak, ang Dios nagpalibut sa bug-os nga kalibutan sing hangin sang bugay nga totoo subung sang hangin nga nagalibut sa kalibutan. Tanan yadtong magapili sa paghaklu sining manughatag sing kabuhi nga hangin, magakabuhi, kag magatulubu sa kataaason sang mga tawo, lalaki kag babae, sa kay Jesukristo. {PK 91.1}

Subung nga ang bulak nagaliso sa adlaw, agud nga ang masilaw nga silak makabulig sa pagpahimpit sang iya kagayon kag kaambong, amo man magaliso kita sa Adlaw sang Katarungan, agud nga ang kapawa sang langit magsilak sa aton, agud nga ang aton mga kinaugali magtubu sa kaanggid ni Kristo. {PK 91.2}

Isa Liwan ka Halimbawa

Si Jesus nagpanudlo sang amo man nga butang sang pagsiling Niya, “Magpalabilin kamo sa Akon, kag Ako sa inyo. Subung nga ang sanga indi makapamunga sa iya lamang, kon wala magaangut sa pinuno, subung man kamo sina, kon indi kamo magpalabilin sa Akon . . . kay kon wala Ako, wala kamo sing sarang mahimo.” Juan 15:4, 5. Kinahanglan ka magsalig sa kay Kristo, agud nga makakabuhi ikaw sing balaan nga pagkabuhi, subung nga ang sanga nagasalig sa iya puno tungud sang iya pagtubu kag pagpamunga. Kon mahamulag ikaw sa Iya wala ikaw sing kabuhi. Wala na ikaw sing gahum sa pagbato sa mga panulay okon sa pagtubu sa bugay kag pagkabalaan. Kon magpabilin ikaw sa Iya, magatubu ikaw sing bugana. Kon nagakuha ka sing kabuhi gikan sa Iya dili ikaw maglayong okon magdimabungahon. Manginkaangay ikaw sang kahoy nga natanum sa luyo sang mga kasapaan sang mga tubig. {PK 91.3}

Grabe nga Saynp

Madamu ang nagapatubu sing hunahuna nga himoOn lamang nila ang iban nga bahin sang buluhaton sa ila kaugalingon. Nagsalig sila sa kay Kristo nga sa kapatawaran sang sala, apang karon nagapaninguha sila sa ila kaugalingon nga pagpangabudlay sa pagkabuhi sing matarung. Apang ang kasubung sini tanan nga mga pagpangabudlay mahulog. Si Jesus nagsiling, “kon wala Ako wala kamo sing sarang mahimo.” Ang aton pagtubu sa bugay, ang aton kalipay, ang aton pagkamapuslanon—tanang nagasandig sa aton paghiusa kaupud ni Kristo. Bangud sa paghiambitay kaupud Niya sa adlaw-adlaw sa oras oras—bangud sa pagpabilin sa Iya—dapat kita magatubu sa bugay. Dili lamang Sia manugbuhat kondi man manughimpit sang aton pagtoo. Si Kristo amo ang nahauna kag ang katapusan kag ang sa gihapon. Kinahanglan manginkaupod naton Sia, dili lamang sa pamuno kag sa katapusan sang aton panlakatan, kondi sa tagsa ka tikang sang aton dalanon. Si Dabid nagasiling, “Si Jehoba ginabutang ko gihapon sa akon atubangan: tungud kay yara Sia sa akon too, indi ako mati-ong.” Salmos 16:8. {PK 92.1}

Nagapamangkot ikaw, “Anhon ko nga pagpabilin sa kay Kristo?”—Subung man sang imo pagbaton sa Iya sang una. “Busa, sa bagay nga ginbaton ninyo kay Kristo Jesus ang Ginoo, maggilinawi kamo sa Iya.” Kolosas 2:6. “Ang matarung magakabuhi tungud sang pagtoo.” Hebreinhon 10:38. Ginhatag mo ang imo kaugalingon sa Dios nga mangin

Iya sing bug-os, sa pag-alagad kag sa pagtuman sa Iya kag ginbaton mo si Kristo subung nga imo Manluluwas. Dili ka sa imo kaugalingon makatumbas sang imo mga sala okon makabaylo sang imo tagiposoon; apang sa natugyan mo na ang imo kaugalingon sa Dios, nagatoo ikaw nga Sia bangud sa kay Kristo nagbuhat sini nga tanan tungud sa imo. Bangud sa pagtoo mangin Iya ikaw ni Kristo, kag bangud sa pagtoo dapat ikaw sa pagtubu sa Iya—bangud sa paghatag kag sa pagbaton. Dapat ikaw sa paghatag sang tanan—ang imo tagiposoon, ang imo kabubut-on, ang imo pagalagad—ihatag ang imo kaugalingon sa Iya sa pagtuman sang tanan Niya nga mga ginakinahanglan; kag dapat ikaw sa pagbaton sang tanan—si Kristo, nga amo ang kabug-osang sang tanan nga mga pagpakamaayo, sa pagpuyo sa imo tagiposoon, nga mangin-imo kusug, imo katarungan, imo kabulig nga walay katubtuban—sa paghatag sa imo sing gahum sa pagtuman. {PK 92.2}

Imo Nahauna nga Katungdanan

Ipanugyan ang imo kaugalingon sa Dios sa aga; himo-a ini nga imo gid nahauna nga buluhaton. Himo-a nga mangin-imo pangamuyo, “Kuhaa ako Ginoo, subung nga Imo sing bug-os. Ginabutang ko ang tanan nakon nga patikang sa Imo mga tiilan. Gamita ako sa karon nga adlaw sa Imo buluhaton. Puyo Ka sa akon, kag himoa nga ang tanan ko nga mga buluhaton mahimo nga sa Imo.” Ini amo ang matag-adlaw nga buluhaton. Sa tagsa ka aga ipanugyan ang tanan nimo nga mga tinutuyo sa Iya, nga pagatumanon okon pagaisikway sono sa Iya mga pagmandu. Busa sa adlawadlaw ighatag nimo ang imo kabuhi sa kamot sang Dios, kag sa amo nga bagay ang imo kabuhi magaatamat himpit sono sa kabuhi ni Kristo. {PK 93.1}

Ang kabuhi sa kay Kristo amo ang kabuhi nga puno sing pahuway. Ayhan wala sing makabalatyag nga kalipay apang kinahanglan nga may yara nga pagsalig nga mapinadayonon kag mahidaeton. Ang imo paglaum dili sa imo kaugalingon kondi sa kay Kristo. Ang imo kaluyahon yara sa Iya kusug, ang imo pagkadilimaalam sa Iya kaalam, ang imo kapigaw sa Iya mapinadayonon nga kusug. Ngani dili ka magtamud sa imo kaugalingon, dili pagtuguti ang painoino sa pagpabilin sa kaugalingon, kondi nga magtolok ka sa kay Kristo. Ipahamtang ang imo hunahuna sa Iya gugma, sa kagayon, sa kahimpit, sang Iya kinaugali. Si Kristo sa Iya pagdu mili sang Iya kaugalingon, si Kristo sa Iya pagpaubus, si Kristo sa Iya dili matupungan nga gugma—ini amo ang mga halambalanon nga dapat pagpamalar.dongon sang kalag. Lamang bangud sa paghigugma sa Iya, sa paghuwad sa Iya, sa pagsalig sing bug-os sa Iya, nga mapabalhin ikaw sa kaanggid Niya. {PK 94.1}

Espirituhanon nga Pahuway

Si Jesus nagsiling, “Magpalabilin kamo sa Akon.” Ini nga mga polong nagakahologan: pagpahuway, pakaligon, pagsalig. Sa liwan nagaagda Sia, “Kari sa Akon tanan kamo. . . kag pagapapahuwayon Ko kamo.” Mateo 11:28, 29. Ang mga polong sang manugsalmo nagapahayag sang amo man nga hunahuna: “Tolok ka kay Jehoba, kag maghulat sa Iya.” Salmos 37:7. Kag si Isaias naghatag sing pagpalig-on, “Sa pahimuyong kag sa pagsalig mangin inyo kabakuran.” Isaias 30:15. Ini nga pagpahuway dili makita sa pagpakatamad; tungud kay sa pangagda sang Manluluwas ang saad sang pahuway

ginaupdan sang panawag sa pagpangabudlay: “Dalha ninyo ang Akon singkaw sa inyo, . . . kag makakita kamo sing kapahuwayan sa inyo mga kalag.” Mateo 11: 29. Ang tagiposoon nga nagapahuway sing bug-os sa kay Kristo amo ang labing makugi kag hanuut sa pagpangabudlay sa Iya. {PK 94.2}

Daku nga Katalagman

Kon ang painoino magpabilin sa kaugalingon, mahamulag sia gikan sa kay Kristo, nga amo ang tuburan sang kusug kag kabuhi. Busa ngani si Satanas nagapangabudlay sing dayon sa pagpahilayo sang aton mga panghunahuna gikan sa Manluluwas, kag sa amo nga bagay ginaupang niya ang pagpakig-upod kag ang pagpakighambal sang kalag sa kay Kristo. Ang kalalipayan sang kalibutan, ang mga paghamkon sang kinabuhi kag mga kalisang kag mga kasulub-an, ang mga sayup sang iban, okon ang imo kaugalingon nga sayup kag pagkadilihimpit—sa bisan diin okon sa tanan sini magatinguha sia sa paglingaw sang painoino. Dili ka magpadaya bangud sa sini nga mga pahito. Madamu ang matuud nga mga maid-id, kag nagahalandum sa pagkabuhi nga sa Dios, sia man (si Satanas) ang nagatinguha sa pagdul-ong sa ila sa pagtamud sa ila kaugalingon nga mga sayup kag mga kaluyahon, kag ngani bangud sa pagpabulag sa ila gikan sa kay Kristo, nagalaum sia sa pagdaug. Dili naton paghimo ang kaugalingon nga amo ang kabug-osan sang tanan, kag patubu-on ang paghimud-os kag ang kahadluk kon bala maluwas kita okon dili. Tanan ini nagapatalikud sang kalag gikan sa tuburan sang aton kusug. Itugyan ang pagbantay sang imo kaugalingon sa Dios, kag magsalig ka sa Iya. Maghambal ka kag magpanumdum nahanungud kay Jesus. Dulaa ang kaugalingon sa Iya. Isikway ang tanan nga mga pagpangduhaduha; kuhaa ang imo kahadluk. Magsiling ka kaupud sa kay apostol Pablo, “Kag indi na ako ang nagakabuhi, kondi nagakabuhi sa akon si Kristo. Kag ang ginakabuhi ko karon sa unud, ginakabuhi ko sa pagtoo sa Anak sang Dios, nga naghigugma sa akon, kag nagtugyan Sia sang Iya kaugalingon tungud sa akon.” Galasia 2:20. Magsalig ka sa Dios. Sarang Sia makabantay sadtong imo gintugyan sa Iya. Kon igtugyan mo ang imo kaugalingon sa Iya kamut pagadal-on ka Niya nga labi pa sang sa mandadaug bangud sa Iya nga naghigugma sa imo. {PK 95.1}

Magtolok kay Jesus

Sang pagsuklub ni Kristo sang kinaugali nga tawhanon sa Iya kaugalingon ginhihtan Niya ang kaliwatan nga tawhanon sa Iya kaugalingon sang higot sang gugma nga dili gid nga mas-a inabugto sang bisan ano nga gahum, luwas lamang sang luyag sang tawo sa iya kau^aligon. Si Satanas magabutang sa gahipon sing mga daya sa pagpaganyat sa aton sa pagbugto sini nga higot —nga amo ang pagpili sa pagpabulag sang aton kaugalingon sa kay Kristo. Dili sini ang aton kinahanglan nga pagbantayan, sa pagpaninguha, sa pagpangamuyo nga wala sing butang nga magdaya sa aton sa pagpili sing isa pa ka agalon; tungud kay hilway kita sa gihapon sa paghimo sini. Apang iunay naton ang aton mga mata sa kay Kristo, kag magabantay Sia sa aton. Kon magtolok kita sa kay Jesus, wala kita sing katalagman. Wala sing bisan ano nga makakuha sa aton gikan sa Iya mga kamut. Sa pagtolok sa gihapon sa Iya, “ginabalhin kita sa amo man nga larawan sang himaya nga sa himaya, siling nga gikan sa Espritu sang Ginoo.” 2 Korinto 3:18. {PK 96.1}

Sa sini nga bagay nga ang una nga mga gintotonan nakadangat sa kaanggid sa ila minamahal nga Manluluwas. Sang pagkabati sadtong mga pinadala sang mga polong ni Jesus, binatyag nila ang ila pagkinahanglan sa Iya. Ginpangita nila, nakita nila, ginsunod nila Sia. Nanginkaupud Niya sila sa balay, sa latok sa palangamuyo-an, kag sa latagon. Nanginkaupud Niya sila subung sang manunudlo nga nagaupud sa mga bumulutho, nga nagabalaton sa adlaw-adalaw gikan sa Iya mga bibig sing mga leksyon sang balaan nga kamatooran. Nagtolok sila sa Iya, subung sang ginahimo sang isa ka alagad sa isa ka agalon, sa paghibalo sang ila mga katungdanan. Yadto nga mga gintoton-an mga tawo man, “nga kaanggid naton sa kinaugali.” Jakobo 5:17. May amo man sila nga mga sala nga alawayon. Nagakinahanglan sila sang amo man nga bugay, agud sa pagkabuhi sang balaan nga kabuhi. {PK 97.1}

Experiensia ni Juan

Bisan pa si Juan, ang hinigugma nga gintoton-an, ang isa nga nagpahayag sing labi ka himpit nga pagka anggid sa Manluluwas, wala makaagum sinang kinaugali sang pagkamahigugma-on. Dili lamang sia puno sang pagkamatinaastaason kag mahinamkonon sang dungug, kondi nga mainiton kag mabinatyagon. Apang sang pinahayag sa iya ang kinaugali sang Isa nga la-ngit non, nakita niya ang iya pagkakulang, kag nagpaubus sia sang iya pagkahibalo. Ang kusng kag ang pagkamapainulubon, ang gahum kag ang kalolo, ang pagkahalangdon kag ang kahagup, nga iya nakita sa matag-adlaw nga kabuhi sang Anak sang Dios, nagpuno sang iya kalag sing kaluyag kag gugma. Sa adlaw adlaw ang iya tagiposoon ginapahapiit sa kay Kristo, tubtub nga dili niya makita ang iya kaugalingon tungud sa iya paghigugma sa Agalon. Ang iya mabinatyagon kag mahinamkunon nga gawi ginpanugyan sa manugdihon nga gahum ni Kristo. Ang manugtuga liwan nga pagbuyok sang Espiritu Santo nagpabag-o sang Iya tagiposoon. Ang gahum sang gugma ni Kristo naghikot sing pagliwan sang karakter. Ini amo ang matuud kag malig-on nga bunga sang pagpakig-upud sa kay Kristo. Kon si Kristo nagapabilin sa tagiposoon, ang bug-os nga kinaugali maliwan. Ang Espiritu ni Kristo, ang Iya gugma, magapahumok sang tagiposoon, magadaug sang kalag, kag magabayaw sang mga hunahuna kag mga handuin sa Dios kag sa langit. {PK 97.2}

Kaupod Sia Gihapon

Sang pagkayab ni Kristo sa langit. ang balatyagon nahanungud sang iya pagtambong yara pa gihapon kaupud sang Iya mga sumulonod. Isa ka pagtambong sang Iya kaugalingon, nga puno sang gugma kag kapawa. Si Jesus nga Manluluwas, nga naglakat kag nagpakighambal kag nagpangamuyo kaupud nila, nga amo Sia ang naghambal sing mga polong sang paglaum kag kalipay sa ila mga tagiposoon, ginkuha gikan sa ila pakadto sa langit, samtang ang balita sang paghidaet yara pa sa Iya mga bibig, kag ang tunog sang Iya tingug nagbalik sa ila, sang pagbaton sang gal-um sang mga manugtunda sa Iya. “Yari karon, Ako kaupud ninyo, tubtub sa kapusan sang sang panuigon.” Mateo 28:20. Nagkayab sa langit sa dagway nga tawhanon. Nahibalo-an nila nga yara Sia sa atubangan sang lingkoran nga harianon sang Dios, nga ila Abyan kag Manluluwas sa gihapon; nga ang iya mga kalooy wala magliwan; nga Sia nagakahanoklog pa sa

gihapon sang mga pag-antus sang mga katawohan. Ginpahayag Niya sa atubangan sang Dios ang kapuslanan sang kabilihanang nga Iya ginbayad sa Iya mga tinubus. Nahibalohan nila nga nagsaka Sia sa langit sa pag-aman sa ila sing duug, kag nga magakari Sia liwan, sa pagkuha sa ila nga sa Iya kaugalingon. {PK 98.1}

Sa Tapus Sang Pagkayab

Sang pagtilipon nila sa tapus sang Iya pagkayab, mga mabinalak-on sila sa pagpahayag sang ila mga pangabay sa Amay sa ngalan ni Jesus. Sa isa ka solemne nga pagtahud naglayaub sila sa pangamuyo, nga nagasulitsulit sang mga polong sang pagpalig-on nga “Bisan ano nga butang nga inyo pangayoon sa Amay sa Akon ngalan, pagaihatag ini sa inyo. Tubtub karon kamo wala makapangayo sing bisan ano sa Akon ngalan; magpangayo kamo kag magbalaton kamo agud nga ang inyo kalipay maghimpit.” Juan 16:23, 24. Ginbayaw nila ang kamut sang pagtoo sing mataastaas, upud sang daku nga katarungan: “Si Kristo amo ang napatay; labi pa gid ang ginbanhaw man, ang yadto man sa too sang Dios, kag ang nagatabang man bangud sa aton.” Ro-ma 8:34. Kag ang Pentikostes nagdala sa ila sing pagtambong sang Manuglipay, nga nahanungud sa Iya nagsiling si Kristo nga: “Magapabilin Sia kaupod ninyo.” Kag nagsiling pa gid Sia, “Kapuslanan ninyo, nga magtaliwan Ako; kay kon indi Ako magtaliwan, ang Manuglipay indi makakari sa inyo; apang kon Ako magtaliwan, igapadala Ko Sia sa inyo.” Juan 14:17; 16:7. Sumugud sadto bangud sa Espiritu, si Kristo nagpabilin sing dayon sa mga tagiposoon sang Iya mga inanak. Ang ila pagpakigbuylog sa Iya labi pa kahapiit sang sa nagapakighiupud Sia sa ila sa lawasnon. Ang kapawa kag ang gugma, kag ang gahum sang nagapuyo nga Kristo, nagsilak bangud sa ila, sa bagay nga ang mga tawo nga makakita, “nagkalatingala sila, kag nakilalaan nila, nga nagpakig-upud sila kay Jesus.” Binuhatan 4:13. {PK 99.1}

Si Kristo Wala Magbalhin

Kon ano si Kristo sa Iya una nga mga gintoton-an, ginahandum Niya nga mangin amo man Sia sa Iya mga inanak sa karon nga mga adlaw, tungud kay sa sinang katapusan nga pangamuyo, kaupud sang diutay nga kinabon sang mga pinadala nga nagalilibut sa Iya nagsiling Sia, “Kag wala Ako nagaampo tungud lamang sini sa ila, kondi tungud man sa mga nagatoloo sa Akon tungud sang ila polong.” Juan 17:20. {PK 100.1}

Si Jesus nagpangamuyo tungud sa aton, kag nag-ampo Sia nga mangin-isa kita kaupod Niya, subung nga Sia kag ang Amay isa lamang. Daw ano nga paghiusa ini! Ang Manluluwas nagsiling nahanungud sang Iya kaugalingon, “Ang Anak indi sarang makahimo sing ano man sa Iya kaugalingon;” “Ang Amay, nga nagapuyo sa Akon, Sia gid ang nagahimo sang mga buhat.” Juan 5:19; 14:10. Niyan kon si Kristo nagapuyo sa aton mga tagiposoon, magahikot Sia sa sulud naton, “sang pagbuut, kag sang pagbuhat man, siling sang Iya kahamuut.” Pilipos 2:13. Magapangabudlay kita subung sang Iya man pagpangabudlay: kinahanglan kita sa pagpahayag sang amo man nga espiritu. Kag ngani, tu-ngud kay ginahigugma naton Sia kag nagapabilin sa Iya, “magtulubo kita sa tanan nga mga butang nga sa Iya sadto, nga amo ang olo, nga si Kristo.” Epeso 4:15. {PK 100.2}

BAHIN 9

ANG BULUHATON KAG ANG KABUHI

ANG DIOS amo ang tubman sang kabuhi kag sang kapawa kag sang kalipay sa bug-os nga kalibutan. Kasubung sang silak sang kapawa gikan sa adlaw, subung sang mga ilig sang tubig nga nagatubud gikan sa buhi nga tuburan, ang pagpakamaayo nagailig gikan sa Iya pakadto sa tanan Niya nga mga tinuga. Kag sa bisan diin lamang nga ang kabuhi sang Dios yara sa mga tagiposoon sang mga lawo, magailag sia sa iban sa gugma kag pagpakamaayo. {PK 103.1}

Ang kalipay sang aton Manluluwas yara sa pagbayaw kag pagpanubus sa nahulog nga mga lawo. Tungud sini wala Niya pag-isipa ang Iya kabuhi nga mahal sa Iya kaugalingon, kondi nga ginbatas Niya ang krus, nga nagatamay Sia sang kaluiluy-an. Ngani, ang mga manugtunda nagapalangabudlay gihapon tungud sa kalipayan sang iban. Ini amo ang ila kalipay. Ang ginakabig sang maiyaiyahon nga tagiposoon subung nga labing manubu nga buluhaton, nga amo ang pag-alagad sa sadtong mga kailo nga sa bisan ano nga bagay mga kubus sa kinaugali kag tinindugan, amo ang buluhaton sang mga walay sala nga mga inanugtunda. Ang Espiritu sang gugma nga mainantuson ni Kristo, amo ang espiritu nga nagaiugub sang langit, kag amo sia ang ginatunaan sang langitnon nga kalipayan. Ini amo ang espiritu nga pagahuptan sang mga sumulunod ni Kristo, ang buluhaton nga ila pagahimoon. {PK 103.2}

Kon ang gugma ni Kristo ginapahamtang sa tagiposoon, kasubung sang mga mahamut nga bulak dili sia matagu. Ang iya balaan nga nga pagbuyuk pagabatyagon sang tanan nga aton mapalapitan. Ang Espiritu ni Kristo sa tagiposoon kasubung sang isa ka tuburan sa kahanayakan, nga nagailig sa pagpabugnaw sa tanan, kag ginahimo niya nga yadtong mga madali na mawala maghandum sa pag-inum sang tubig sang kabuhi. {PK 104.1}

Ang gugma sa kay Jesus mapahayag bangud sa han dum sa pagpangabudlay subung sang Iya pagpangabudlay, nga sa pagpakamaayo kag sa pagbayaw sang mga katawohan. Magadul-ong sia sa paghigugma, sa pagkalolo, kag pagkalooy sa tanan nga mga tinuga nga ginatatap sang aton langitnon nga Amay. {PK 104.2}

Indi Kabuhi nga Mahapus

Ang kabuhi sang manluluwas sa duta dili kabuhi nga mahapus kag paghangad lamang sa Iya kaugalingon, kondi nga nagpangabudlay Sia sing mapinadayonon, hanoot, kag sa wala sing kalapyo tungud sa kaluwasan sang mga nadula nga mga katawohan. Sumugud sa pasungan tubtub sa Kalbaryo ginusuy Niya ang dalan sang pagdumili sa kaugalingon kag wala gid magpaninguha sa paglikaw sang mga mabudlay nga mga buluhaton, sa mga mapaul nga mga pagpanlakatan, kag sa mga makalalapyo nga mga alatipanon kag mga pagpanga budlay. Nagsiling Sia, “Ang Anak sang tawo wala magkari, agud pag-alagaron Sia kondi sa pag-alagad, kag sa paghatag sang Iya kabuhi nga gawad tungud sa kadam-an.” Mateo 20:28. Ini amo ang isa ka labing daku nga tuyo sang Iya kabuhi. Ang tanan ikaduha na Ia

mang. Ang Iya kalan-on kag ilimnon amo ang paghimo sang kabubut-on sang Dios kag ang pagtapus sang Iya buluhaton. Ang kaugalingon kag ang gugma sa kaugalingon, wala sing bahin sa Iya pagpangabudlay. {PK 104.3}

Handa sa Pag-antus Kon Ini Ginakinahanglan

Subung man yadtong mga umalambit sang bugay ni Kristo magmanginhanda sa paghimo sang bisan ano nga pag-antus agud nga ang iban nga Iya ginpakamatyan makaambit man sang langitnon nga bugay. Magahimo sila sang ila bug-os nga masarangan sa pagpaayo pa gid sang kalibutan bangud sang ila pagpabilin sa iya. Ini nga espiritu amo gid ang magatubu sa kalag nga naliso sing matuudtuud. Sa gilayon sang pagkari sang isa sa kay Kristo matawo ang isa ka handum sa iya tagiposoon sa pagpahibalo sa iban kon daw ano kahamili nga abyan ang iya nakita sa kay Jesus; ang manugluwas kag manugpabalaan nga kamatooran dili sarang matakpan sa sulud sang iya tagiposoon. Kon kita napanaputan sang katarungan ni Kristo, kag napun-an sang kalipay sang Iya Espiritu nga nagapuyo sa aton, dili kita sarang makahipus. Kon natilawan kag nakitan naton nga ang Ginoo maayo, may aton kita nga inugsugid. Kaangay sa kay Pelipe sang pagkakita niya sang Manluluwas, paga-agdahon naton ang iban sa Iya atubangan. Himulatan naton ang pagpahayag sa ila sang pagkamakawiwili ni Kristo, kag ang mga wala makit-i nga mga kamatooran sang palaabuton nga kalibutan. Magaabut ang daku nga handum sa pagsunod sa dalan nga ginlakatan ni Jesus. Magaabut ang hanuut nga handum nga yadtong yara sa palibut naton makakita sang “Kordero sang Dios, nga nagakuha sang sala sang kalibutan.” {PK 105.1}

Kag ang mga pagpaninguha sa pagpakamaayo sa iban magabalus sing pagpakamaayo sa aton kaugali-ngon. Ini amo ang katuyu-an sang Dios sa paghatag sa aton sing bahin nga aton pagabuhaton sa piano sang pagpanubus. Ginhatagan Niya ang tawo sing kahigayonan sa pagkamangin-umalambit sang langitnon nga kinaugali, kag, sa balus sini, sa pagpalaton sang pagpakamaayo sa ila masigkatawo. Ini amo ang mataas nga dungug, labing daku nga kalipay, nga masarangan sang Dios sa paghatag sa mga tawo. Yadtong nagapakigbahin sa pagpangabudlay sa gugma ginadala sing labi kahapiit sa ila Manunuga. {PK 106.1}

Wala Pag-ihatag sa Manugtunda

Ang Dios sa ginsuguran sarang makahatag sang balita sang kaluwasan, kag sang tanan nga mga buluhaton sa pag-alagad sa gugma, kag sang tanan nga mga manugtunda. Sarang Niya magamit ang iban nga mga paagi sa pagtuman sang Iya mga katuyuan. Apang sa Iya walay katubtuban nga gugma, nagpili Sia sa paghimo sa aton nga manginkabulig Niya nga mga manugpangabudlay, kaupud kay Kristo kag sang mga manugtunda, agud nga makaambit kita sang mga pagpakamaayo sang kalipay, kag sang pagbayaw nga espirituhanon, subung nga patubas sining dilimaiyayahon nga pag-alagad. {PK 106.2}

Madala kita sa pagkamainawaon kaupod ni Kristo bangud sa pagpakighiambit sa Iya mga pag-antus. Ang tagsa ka buhat sa pag-antus sang kaugalingon tungud sa kaayohan sang iban magapabaskug sang espiritu sa pagkamaalwanon sa tagiposoon sang manughatag, nga magapahiusa sa iya sing hanuut sa Manluluwas sang kalibutan, nga

“Sia manggaranon, bangud sa inyo nanginimol Sia, agud nga tungud sa Iya kaimolon magmanginmanggaranon kamo.” Kag lamang sa pagtuman naton sing subung sini sang mga langitnon nga mga katuyu-an sang pagtuga sa aton, nga ang kinabuhi manginpagpakamaayo nga sa aton. {PK 106.3}

Kon magpangabudlay ka subung sang buut ni Kris-to nga pagahimoon sang Iya mga gintoton-an, kag mag daug sing mga kalag nga sa Iya, magabatyang ka sang kinahanglan sang isa ka madalum nga experiensia kag isa ka daku nga kaalam sang langitnon nga mga butang, kag pagagutumon kag pagauhawon ka sang katarungan. Magaampo ikaw sa Dios, kag ang imo pagtoo magabaskug, kag ang imo kalag magainum sing bugana sa bobon sang kaluwasan. Kon masugata mo ang mga paghingabut kag mga pagtilaw ini magatuytuy sa imo sa Biblia kag sa pagpangamuyo. Magatubu ikaw sa bugay kag sa kaalam sa kay Kristo, kag magapatubu ikaw sing isa ka bugana nga experiensia. {PK 107.1}

Sa Mataas nga Pagkabuhi

Ang espiritu sang dimaiyaiyahon nga pagpangabudlay tungud sa iban magahatag sa pagginawi sing kadalum, kalig-on kag gugma nga kaangay sang Iya ni Kristo, kag magahatag sing paghidaet kag kalipay sa mga nagahuluput sa iya. Ang mga handum ginabayaw. Wala sing duug nga sa katamad kag sa pagkamaiyaiyahon. Yadtong mga nagasagad okon nagagamit sang bugay nga Kristohanon magatubu kag manginmabaskug sa pagpangabudlay sa Dios. Magaagum sila sing maathag nga paghangup sang mga butang nga espirituha-non, sing malig-on kag nagatubu nga pagtoo, kag sing nagatubu nga gahum sa pagpangamuyo. Ang Espiritu sang Dios, nga nagahikot sa ila espiritu, magapapahayag sang balaan nga ambahanon sang kalag, sa sabat sang langitnon nga mga pagtandug. Yadtong mga nagapanugyan sang ila kaugalingon sa dimaiyaiyahon nga pagpangabudlay tungud sa kaayohan sang iban, amo ang labing matuud nga nagapangabudlay sing matininguhaon sang ila kaugalingon nga kaluwasan. {PK 107.2}

Ang Bagay lamang sa Pagtubu sa Bugay

Ang bagay lamang sa pagtubu sa bugay amo ang paghimo, indi sa kinaugalingon nga kaayohan, sang buluhaton nga gintungtung ni Kristo sa aton—sa pag-pangabudlay sa bug-os naton nga inasarangan, sa pagbulig kag sa pagpakamaayo sa sadtong mga nagakinahanglan sang bulig nga aton mahatag sa ila. Ang kusug nagagikan sa mga pagbanat-banat; ang pagpangabudlay amo ang kasogo-an sang kabuhi. Yadtong mga nagapalaninguha sa pag-agum sing kabuhi nga Kristohanon bangud lamang sa pagbaton sang mga pagpakamaayo nga nagagikan sa bugay, kag wala nagahimo sing bisan ano nga butang nga sa kay Kristo, kasubung lamang sang pagkabuhi bangud sa pagkaon sa wala sing pagpangabudlay. Kag sa spirituhanon subung man sa dutan-on nga bagay, ini sa gihapon magapatubas sang kamusmusan kag kaduluntan. Ang tawo nga magdumili sa pagbanatbanat sang iya mga butkon sa dili madugay madulaan sang tanan nga gahum sa paggamit sa ila. Amo man ang mga Kristohanon nga dili maggamit sang gahum nga ginahatag sang Dios sa ila, dili lamang nga dili sila magtubu sa kay Kristo, kondi nga madula man nila ang kusug nga yara na sa ila. {PK 108.1}

Ang iglesia ni Kristo amo ang galamiton nga ginpili sang Dios nga sa kaluwasan sang tawo. Ang iya buluhaton amo ang pagdala sang balita sang kaluwasan sa kalibutan. Kag ang katungdanan natungtung sa tanan nga mga Kristohanon. Ang tagsatagsa sa masarangan sang iya kusug, kag kahigayonan, dapat sa pagtuman sang sogo sang Manluluwas. Ang gugma ni Kristo, nga pinahayag sa aton, magahimo sa aton nga mangungutang sa sadtong tanan nga wala pa makakilala sa Iya. Ang Dios naghatag sa aton sing kapawa, dili lamang tungud sa aton, kondi nga igpalaton man naton sa iban. {PK 109.1}

Labi Pa nga Buluhaton Dapat Himoon

Kon ang mga sumulunod ni Kristo nagamaladmad sa ila mga katungdanan, may yara kunta nga linibolibo sa baylo sang isa sa karon, nga magabantala sang balita sa mga kadutaan sang mga hentil (mga tawo nga wala pa makalilala sa Dios). Kag ang tanan nga dili makapakigbahin sa lawasnon sa ila kaugalingon sa buluhaton, magasakdag sa iya bangud sang ila mga pagkabutang, sang ila gugma, kag sang ila pangamuyo. Kag may yara nga labi kahanuut pa gid nga mga pagpangabudlay tungud sa mga kalag sa mga kadutaan Kristohanon. {PK 109.2}

Dili kita kinahanglan sa pagkadto sa mga kadutaan sang mga hentil, okon magbiya sang diutay nga duug palibut sang aton puluy-an, kon dira man lamang mahamtang ang aton mga katungdanan, agud nga makapangabudlay kita tungud kay Kristo. Sarang naton mahimo ini sa palibut sang aton puluy-an, sa iglesia, sa tunga sadtong aton gina-updan, kag sa sadtong aton mga kaupud sa palangitan-an. {PK 109.3}

Ang kalabanan nga bahin sang kabuhi sang aton Manluluwas diri sa duta gingamit sa mapainulubon nga pagpangabudlay sa palamandayan sa Nasarct. Ang inanug-alagad nga mga manugtunda nagbantay sang kabuhi sang Ginoo sang nagapanlakatan Sia kaupud sang mga mangunguma kag mga mamumugon nga wala Sia makilal-i kag wala mapasidunggi. Nagatuman Sia sing matutum sang Iya buluhaton sang nagapangabudlay Sia sa Iya kubus nga buluhaton, kasubung gid sang sa pagaayo Niya sang mga nagabalati-an okon sang paglakat Niya sa dagat sang Galilea nga mabalud tungud sang unus. Subung man, sa labing kubus nga mga hilikuton kag sa labing manubu nga mga katungdanan sang kabuhi, magpanlakatan kita kag magpalangabudlay kaupod ni Jesus. {PK 110.1}

Representante ni Kristo

Ang pinadala nagasiling: “Ang tagsatagasa, mga utud, magpadayon nga kaupud sang Dios, didto sa gintawagan.” 1 Korinto 7:24. Ang tawo nga may palangakuan magadumala sang iya buluhaton sa bagay nga magahimaya sa iya Agalon tungud sang iya pagkatutum. Kon matuud sia nga sumulunod ni Kristo, pagadalhon niya ang iya pagtuloohan sa tanan nga butang nga iya ginahimo, kag igpahayag sa tawo ang Espiritu ni Kristo. Ang makinista manginmakugihon kag matutum nga manugpahayag Niya, Sia nga nagpangabudlay sa kubus nga buluhaton sa tunga sang mga bakolod sa Galilea. Ang tanan nga nagahingalan sang ngalan ni Kristo dapat sa pagpangabudlay sa bagay nga ang iban, tungud sa pagtan-aw sang ila maayo nga mga binuhatan, matuytuyan sa paghimaya sang ila Manunuga kag Manluluwas. {PK 110.2}

Madamu ang nagapainalibad sa ila kaugalingon sa paghatag sang ila hiyas sa buluhaton ni Kristo tungud kay ang iban may labaw nga mga ikasarang kag kasangkulan. Ang paghunahuna nga ginhuptan sang kalabanan amo nga yadtong may mga pinasahi lamang nga hiyas amo ang ginakinahanglan sa pagpanugyan sang ila ikasarang sa buluhaton sang Dios. Nag-abut sa inughalangup sang kadamu-an nga ang hiyas ginhatag lamang sa pinasahi nga mga klasc sang tawo, kag dili sa iban, nga, sa wala sing duhaduha, wala pagtawga sa pagpakigbahin sang pagpangabudlay okon sang balus. Apang wala ginapahayag sing subung sina sa palaanggiran. Sang pagtawag sang amay sang panimalay sang iya mga sologoon, ginhatagan niya ang tagsa ka tawo sing buluhaton. {PK 111.1}

Espiritu Sang Pagpaubus

Kaupud sang mahigugmaon nga Espiritu sarang na-ton mahimo ang labing kubus nga mga katungdanan sang kabuhi, “subung nga sa Ginoo.” Kon ang gugma sang Dios yara sa tagiposoon. pagaipahayag sia sang kabuhi. Ang katam-is ni Kristo mangin sa palibut naton, kag ang aton gahum sa pagbuyuk magatib-ong kag magapakamaayo. {PK 111.2}

Indi kinahanglan sa imo ang paghulat sang mga maayo nga mga kahigayonan okon sa pagpaabut sang pinasahi nga mga ikasarang sa wala ikaw pa maglakat sa pag pangabudlay nga sa Ginoo. Dili ikaw kinahanglan magpanghunahuna sang kon anano ang pagaisiling sang kalibutan nahanungud sa imo. Kon ang imo matag-adlaw nga kabuhi amo ang pamatuud sang kaputli kag pagkahanoot sang imo pagtoo, kag ang iban napatalupangud nga nagahandum ikaw sa paghimo sing kaahoyan sa ila, ang imo mga pagpaninguha dili mawala sing bug-os. {PK 111.3}

Ang labing mapainubuson kag imol sa mga gintotonan ni Jesus sarang mahimo nga manginpagpakamaayo sa iban. Ayhan dili sila makatalupangud nga nagahimo sila sang pinasahi nga kaayohan, apang ang wala nila mahangpi nga gahum magapasugud sang balud sang pagpakamaayo nga magapasangkad kag magapadalum, kag ang bulahan nga patubas ayhan dili nila mahibaloan tubtub sa adlaw sang katapusan nga pagbalus. Wala sila nagabatyag okon nakahibalo nga nagahimo sila sang dalagku nga mga butang. Wala sila ginakinahanglan sa paghimud-os sa ila kaugalingon, nahanungud sang kauswagan. Kinahanglan lamang sila sa pagpadayon sing malinong, kag maghimo sing matutum sang buluhaton nga ginatudlo sono sang pagmando sang Dios, kag ang ila kabuhi dili mangin walay pulus. Ang ila kaugalingon nga mga kalag magatubu sono sa kaanggid ni Kristo; sila amo ang manugpangabudlay kaupod sang Dios sa sini nga kinabuhi, kag sa amo nga bagay nagaaman sila nga sa mataas nga buluhaton kag sa walay landong nga kalipay sang kabuhi nga palaabuton. {PK 112.1}

BAHIN 10

ANG PAGKILALA SA DIOS

MAY madamu nga mga paagi nga ginagamit sang Dios sa pagpahibalo sa aton sang Iya kaugalingon kag sa pagdala sa aton sa pagpakig-angot sa Iya. Ang mga tinuga nagahambal sa aton painoino sa wala sing langan. Ang mga nabukasan nga mga tagiposoon pagatandugon sang gugma kag himaya sang Dios subung nga ginapahayag sang mga binuhatan sang Iya mga kamut. Ang nagapamati nga idulungug sarang makabati kag makahangup sang hambal sang Dios bangud sa mga butang nga tinuga. Ang mga malagtum nga mga latagon, ang mga mataas nga mga kakahuyan, ang mga bukol kag mga kabulakan, ang mga panganud, ang na gakahulog nga ulan kag nagasinagana nga mga kasapaan, ang himaya sang mga kalangitan nagahambal sa aton tagiposoon, kag nagaagda sa aton sa pagkilala sa Iya nga amo ang nagtuga sa ila. {PK 113.1}

Leksyon sa Tinuga

Ang aton Manluluwas nagpa-angot sang Iya hamili nga mga leksyon sa mga butang nga tinuga. Ang mga kakahuyan, mga kapispisan, mga kabulakan sa mga nalupyakan, mga kabakoloran, mga linaw, kag mga inaanyag nga mga kalangitan kag subung man ang mga hitabu kag ang mga kahimtangan sa palibut sang aton matag-adlaw nga kabuhi, ginaalangot sila tanan sang mga polong sang kamatooran, agud nga ang Iya ginatudlo sa masunsun aton madumduman, bisan sa tunga sang masaku nga mga hilikuton sang pagkinabuhi sang tawo. {PK 113.2}

Ang Dios nahamuut nga ang Iya mga inanak magdayaw sang Iya mga binuhatan, kag magpangalipay sa mga katahuman nga Iya ginpuni sa aton dutan-on nga puluy-an. Maluyagon Sia sang mga matahum, kag labaw sa tanan nga ma-anyag sa gowa, ginahigugma Niya ang kagayon sang karakter; buut Sia nga aton pagasagurun ang pagkaputli kag pagkasensilyo, nga amo ang malinong nga bugay sang kabulakan. {PK 115.1}

Nagahambal Sang Dios

Kon lamang magpalamati kita, ang mga tinuga sang Dios magatudlo sa aton sing hamili nga mga leksyon sa pagkamasinolondon kag pagkamasinaligon. Sumugud sa mga kabitoonan sa ila paglakat nga walay agi sa kahawaan, nga nagasondanay kutub sa katuigan pa katuigan sa ila tinangdu-an nga alagyan, tubtub sa atomo nga labing diutay, ang mga butang nga tinuga nagatuman sang kabubut-on sang Manunuga. Ang Dios nagabantay sang tanan nga mga butang kag nagasakdag sang tanan nga mga butang nga Iya gintuga. Sia nga nagabayaw sang dili maisip nga mga kalibutan sa tunga sang walay katubtuban nga kahawaan, sa amo man nga ti-on nagatatap Sia sang mga kinahanglan sang diutay nga maya, nga nagakanta sa walay kahadluk. Kon ang mga tawo nagakadto sa ila matag-adlaw nga buluhaton, kag kon sila man ang nagapangamuyo, kon sila nagahigda sa kagab-ihon, kag kon sila man ang nabangon sa kaagahon; kon ang manggaranon nga tawo nagapiesta sa iya balay nga hari-anon, okon ang imol nga tawo

nagatipon sang iya mga kabatan sa wala sing sulud nga latuk, ang tagsalagsa ginabantayan sang aton langiton nga Amay. Wala sing luha nga ginaula nga dili makita sang Dios. Wala sing yuhum nga wala Niya pagpat-ini. {PK 115.2}

Kon magtoo lamang kita sini, ang tanan nga paghimud-os nga wala sing kabangdanan pagatabugon. Ang aton kabuhi dili pagapun-an sang mga kasulub-an kasubung sang sa karon kay ang tanan nga mga butang bisan daku okon diutay ginasalig sa kamut sang Dios, Sia nga wala paggamhi sang madamu nga mga talatapon bisan ginapunaw sang ila mga kabug-aton. Niyan magagum kita sing kapahuwayan sa kalag nga wala maagumi sing madugay na sang kadamu-an. {PK 116.1}

Hunahuna-a ang Palaabuton

Sa nagapangalipay ikaw sa makaluluyag nga katahuman sang duta, hunahunaa ang kalibutan nga palaabuton, nga dili magkilala sa bisan ano nga dagta sang sala kag kamatayon; sa diin ang nawung sang mga tinuga dili na magasuklub sang landong sang kalautan. Ipinta sa imo mga panghunahuna ang puluy-an sang mga tinubus, kag panumduma nga manginlabi pa sia ka mahimayaon sang sa masaysay sang imo maabtik nga hunahuna. Sa nanglainlain nga mga hatag sang Dios sa mga tinuga makit-an naton ang diutay lamang nga silak sang Iya himaya. Nasulat na, “Mga butang nga wala makita sang mata, kag wala mabatii sang dulunggan, wala matawo sa tagiposoon sang tawo, ang mga ginhimos sang Dios sa mga nagahiligugma sa Iya.” 1 Korinto 2:9; {PK 116.2}

Ang manugpamalaybay kag ang mga tomoloon sang mga sapat kag tanum may madamu nga mga butang nga ikasiling nahanungud sang mga tinuga, apang ang Kristohanon lamang amo ang nagapangalipay sing labi sang katahuman sang duta kaupud sang labing mataas nga pag-abiabi, tungud kay nakilala niya ang binuhatan sang iya Amay, kag nakahangup sang Iya gugma sa bulak kag sa tanum kag sa kahoy. Wala sing bisan sin-o nga makaabiabi sing bug-os sang kahulogan sang mga kabakoloran kag mga nalupyakan, kasubaan kag kadagatan nga wala nagatan-aw sa ila subung nga kapahayagan sang gugma sang Dios sa mga tawo. {PK 116.3}

Ang Dios Nagatatap

Ang Dios nagapakighambal sa aton bangud sa Iya mga pagtatap kag tungud sang pagpangabudlay sang Espiritu Santo sa aton mga tagiposoon. Sa mga nagakahanabu kag sa aton mga pagsinalayo, sa mga pagbaylo sang matag-adlaw nga mga hitabu sa aton palibut may makita kita nga mga hamili nga mga leksyon kon lamang ang aton tagiposoon mabuksan sa paghangup sa ila. Ang manugsalmo sang iya pagtalastas sang binuhatan sang Dios nagsiling: “Ang duta puno sang kalooy ni Jehoba.” Salmos 33:5. “Sin-o bala ang maalam? Magbantay sia sining mga butang, kag maghangup sang mga kalooy ni Jehoba.” Salmos 107:43. {PK 117.1}

Ang Dios nagapakighambal sa aton bangud sa Iya mga polong. Diri sini may aton kita sa maathag nga mga dinalan sang pagpahayag sang Iya kinaugali, kag sang Iya pag-atipan sa tawo kag sang daku nga buluhaton sa pagpanubus. Diri sini nabuksan sa atubangan naton ang mga inagihan sang mga patriarkas kag mga manalagna kag sang iban pa man nga mga balaan nga mga tawo sang una nga mga adlaw. Sila ang mga “tawo nga kaanggid naton sa kinaugali.” Jakobo 5:17. Nakitan naton kon daw ano ang ila

pagpanikasug sa tunga sang mga kasulub-an kasubung man sa aton, kon paano ang ila pagkahulog sa idalum sang pagsulay subung man sa aton, kag sa liwat nagpakabaskug sila kag nanginmandadaug bangud sa bugay sang Dios; kag sa pagtan-aw, ginapabaskug kita sa aton mga paghingamu sang katarungan. Sa ginabasa naton ang hamili nga mga ginagihan nga gintugut sa ila, ang kapawa kag ang gugma kag ang pagpakamaayo nga ginpapangalipayan sa ila, kag ang mga buluhaton nga ila nahimo tungud sang bugay nga ginhatag sa ila, ang Espiritu nga nagdaldal sa ila nagapadabdab sing kalayo sang balaan nga handum sa aton mga tagiposoon, kag sing isa ka handum sa pagpakig-angay sa ila sa kinaugali—nga manginsubung sa ila sa paglakat kaupud sa Dios. {PK 117.2}

Ang Balaan nga mga Kasulatan Among Polong Sang Dios

Si Jesus nagsiling nahanungud sang Daan nga Katipan—kag daw ano pagid ini ka totoo sa Bag-o—”kag amo sila ang mga nagapamatuud sa Akon” (Juan 5: 39), ang Manluluwas, nga amo Sia ang natingban sang aton paglaum sang kabuhi nga walay katapusan. Hoo, ang bug-os nga Biblia nagahambal nahanungud kay Kristo. Sumugud sa nahauna nga sinulat nahanungud sang pagtuga—kay sa “wala Sia, wala sing nahimo sang ginhimo” (Juan 1:3)—tubtub sa katapusan nga saad, “Yari karon, nga nagakari Ako sing madali” (Bugna 22: 12), ginabasa naton ang Iya mga binuhatan kag ginapamati-an naton ang Iya tingug. Kon buut ikaw magki lala sang Manluluwas, ton-i ang mga Balaan nga Kasulatan. {PK 118.1}

Pun-i ang bug-os nga tagiposoon sang mga polong sang Dios. Kay sila amo ang buhi nga tubig nga nagapaumpaw sang imo daku nga kauhaw. Amo sila ang buhi nga tinapay nga nanaug gikan sa langit. Si Jesus nagasiling, “Kon kamo indi magka-on sang unud sang Anak sang tawo, kag indi kamo mag-inum sang Iya dugo, wala kamo sing kabuhi sa inyo.” Kag ginsaysay Niya sa Iya kaugalingon nga nagasiling, “Ang mga polong nga Akon ginasiling sa inyo, amo ang espiritu kag kabuhi man.” Juan 6:53, 63. Ang aton lawas ginatukud sang aton mga ginaka-on kag gina-inum, kag subung sa lawasnon nga paagi, amo man ang sa espirituhanon: ang aton ginapamalandong amo man ang nagahatag sing dagway kag kusug sa aton kinaugali nga espirituhanon. {PK 119.1}

Makatilingala nga Halambalanon

Ang halambalanon nahanungud sa pagpanubus amo ang isa ka butang nga ginahandum sang mga manugtunda sa pagtan-aw. Ina amo ang kaalam kag kalantahon sang mga tinubus sa sulud sang walay katubtuban nga panag-on. Dili bala ini takus sang mainandamon nga pagpanghunahuna kag pagtoon sa karon? Ang indi matungkad nga kalooy kag gugma ni Jesus, ang mga pag-antus nga Iya ginhimo bangud sa aton, nagakinahanglan sa aton sing labing mainandamon kag solemne nga pagpamalandong. Dapat kita sa pagtolok sang kinaugali sang aton minamahal nga Mananabang. Dapat naton nga pagpamalandongon ang buluhaton Sadtong nagluwas sa aton gikan sa sala. Kag sang nagapamalandong kita sa langitnon nga mga butang ang aton pagtoo kag gugma magamanginmabakud, kag ang aton pangamuyo manginkahamut-an sing labi sang Dios, kay sila pagasimbogan sang pagtoo kag paghigugma. Magamangin maathag kag hanoot sila. Kinahanglan nga may yara sing walay langan nga pasalig sa kay Jesus, kag matag-adlaw kag buhi nga experiensia sa Iya gugma sa pagluwas sang tanan nga

nagapalapit sa Dios tungud sa Iya. {PK 119.2}

Sa nagapamalandong kita sang kahimpitan sang Manluluwas, nagahandum kita nga pagabaylohan kita sing bug-os kag pagabag-ohon sa larawan sang Iya pagkaputli. May yara nga pagkagutum kag pagkauhaw sa kalag sa pagpakig-angay sa Iya nga aton ginasimba. Kon ang aton panghunahuna ara kay Kristo, magapanugid kita nahanungud sa Iya sa iban, kag ipahayag Sia sa kalibutan. {PK 120.1}

Sa Mga Timawa

Ang Biblia wala ginsulat nga sa mga tomoloon la-mang, hinonoo, ginhimo sia tungud sa timawa nga mga tawo. Ang daku nga mga kamatooran nga kinahanglan sa kaluwasan ginhimo nga masanag subung sang udtong adlaw; kag wala sing bisan sin-o nga magsayup kag magtalang sa ila dalanon luwas lamang sadtong mga nagasunod sang ila kaugalingon nga ihibalo sa baylo sang kabubut-on sang Dios nga ginapahayag sing maathag. {PK 120.2}

Indi kita dapat magbaton sang pagpamatuud sang bisan sin-o nga tawo sang kon ano ang ginatudlo sang Biblia, kondi nga kinahanglan kita sa pagtoon sang polong sang Dios sa aton gid kaugalingon. Kon pagtugutan naton ang iban nga sila ang magapanghunahuna sa baylo naton, ang aton kabaskug magaluya kag magadiutay ang aton mga ikasarang. Ang dungganon nga gahum sang mga panghunahuna maganubu tungud kay wala sila paghanasa sa mga butang nga takus sang ila mga pagpamalandong sa bagay nga madulaan sila sing ikasarang sa paghangup sang madalum nga mga kahulogan sang polong sang Dios. Ang panghunahuna magasangkad kon paggamiton sia sa pagtoon sang mga pag-angtanay sang mga halambalanon sa Biblia, sa pagpasinanto sang texto sa tecto, kag sang espirituhanon nga mga butang sa mga espirituhanon. {PK 120.3}

Nagapalig-on Sang Hunahuna

Wala na sing butang nga ginakabig nga makapaligon sing labi sang panghunahuna sang sa pagtoon sang mga Kasulatan. Wala na sing liwan nga tolon-an nga may gahum sa pagtib-ong sang mga panghunahuna, sa paghatag sing kabaskug sa ihibalo, nga magsubung sang masangkad kag halangdon nga mga kamatooran sang Biblia. Kon ang polong sang Dios pagton-an subung nga nagakaigo, ang mga katawohan may ila sila sing masangkad nga mga panghunahuna, dungganon nga pagginawi, kag sing malig-on nga katuyu-an nga talagsa makita sa karon nga panag-on. {PK 121.1}

Wala sapayan nga may yara nga kaayohan, apang diutay, ang makuha gikan sa padalagan nga pagbasa sang mga Kasulatan. Mabasa ayhan ang bug-os nga Biblia, apang bisan pa dili niya makita ang iya katahuman ni mahangup ang iya madalum kag tinagu nga kahulogan. Ang isa ka dinalan nga naton-an tubtub nga ang iya kahulogan magasanag sa panghunahuna, kag ang iya kaangtanon sa paagi sang kaluwasan magaathag, may daku pa nga kapuslanan sang sa pagbasa sang madamu nga mga kapitulo nga wala sing pinasahi nga katuyu-an nga buut pagaton-an kag wala sing tuhuy nga mga pagtudlo nga makuha. Dili pag-ibulag ang imo Biblia sa imo. Sa gilayon nga may kahigayonan ikaw, basaha sia; itanum ang mga texto sa imo mga hunahuna. Bisin sa nagalakat ikaw sa mga dalan, sarang ikaw makabasa sing isa ka dinalan kag pamalandongon sia, kag sa amo nga bagay matanum nimo sia sa imo mga

panghunahuna. {PK 121.2}

Ang Pangamuyo Kinahanglan sa Pagtoon Sang Biblia

Dili kita makakuha sing kaalam sa wala sing matinalupangdon nga pagpamati kag pagtoon nga ginaupdan sang pangamuyo. Ang iban nga mga bahin sang Kasulatan tama kaathag sa bagay nga dili sila maiwat nga hangpon, apang may yara nga iban nga ang iya kahologan dili naton makita sa iya kadaygan, sa gilayon sang aton pagkabasa. Ang texto kinahanglan nga pag-ipaanggid sa texto. Kinahanglan nga may yara nga mainandamon nga pag-usisa kag mapinangamuyoon nga pagpamalandong. Kag ang amo nga pagtoon magaagum sang bugana nga balus. Subung nga ang manugmina makakita sing malahalon nga metal nga natago sa kaidadalman sang duta, amo man ang isa nga nagausisa sing mapinadayonon sang polong sang Dios subung nga tinago nga manggad, makakita sing mga kamatooran nga may daku nga kapuslanan, nga ang amo natago sa mga palanan-awon sang mga dimainamligon nga mga manug-usisa. Ang mga polong nga binugna nga ginapamalandong sa tagiposoon, manginsubung sang mga tubig nga nagailig gi-kan sa tuburan sang kabuhi. {PK 122.1}

Dili nga mas-a pagton-i ang Biblia sa wala sing pangamuyo. Sa wala pa ang pagbuki sang iya mga pinanid kinahanglan kita sa pagpangayo sang pag-iwag sang Espiritu Santo, kag ini pagaihatag. Sang pagpalapit ni Natanael sa kay Jesus, ang Manluluwas nag siling, “Yari karon ang isa ka matuud nga Israelinhon, nga sa iya walay limbong!” Si Natanael nagsiling, “Diin Mo ako makilala?” Si Jesus nagsabat, “Sa wala pa si Pelipe magtawag sa imo, sang ikaw yadto sa idalum sang iger, nakita Ko ikaw.” Juan 1:47, 48. Kag si Jesus makakita man sa aton sa sulud sang hulut nga aton ginapangamuyo-an, kon pagapangita-on naton Sia sa pagpangayo sing kapawa, agud nga mahibalo-an naton kon anano ang kamatooran. Ang mga manugtunda gikan sa kalibutan sang kapawa manginkaupud sadtong mga nagapangita sang diosnon nga pagtuytuy sa mapinaubuson nga tagiposoon. {PK 123.1}

Ang Espiritu Santo nagabayaw kag nagahimaya sang Manluluwas. Buluhaton Niya ang pagpahayag kay Kristo, sang kaputli sang Iya katarungan, kag sang daku nga kaluwasan nga manginaton tungud sa Iya. Si Jesus nagasiling, “Magabaton Sia sang sa Akon, kag magatalastas sa inyo.” Juan 16:14. Ang Espiritu sang Kamatooran amo lamang ang matutum nga magtotoon sang diosnon nga kamatooran. Daw ano nga ang Dios kinahanglan magpakamahal sang tawo tungud kay ginhatag Niya ang Iya Anak nga namatay tungud sa ila, kag nagsogo sang Iya Espiritu nga manginmagtotoon kag mapinadayonon nga manugtuytuy. {PK 123.2}

BAHIN 11

KAHIGAYONAN SA PAGPANGAMUYO

BANGUD sa mga tinuga kag sa Iya Polong, bangud sa Iya pagbantay kag bangud sa pagtuytuy sang Iya Espiritu, ang Dios nagapakighambal sa aton. Apang indi ini tuman; nagakinahanglan man kita sa pagbukas sang aton mga tagiposoon sa Iya. Agud nga may kabuhi kita nga espirituhanon kag kabaskug, naga-kinahanglan kita sing matuud nga pagpakighambal sa aton Amay nga langitnon. Ang aton panghunahuna sarang mabuyok sa Iya, sarang kita makapamalandong sang Iya mga binuhatan, sang Iya kalooy, sang Iya pagpakamaayo; apang ini indi amo, sono sa bug-os nga kahulogan sang polong, ang pagpakighambal sa Iya. Agud nga makapakighambal kita sa Dios, kinahanglan nga may igasugid kita sa Iya nahanungud sang aton kabuhi karon. {PK 125.1}

Ang pagpangamuyo amo ang pagbukas sang aton tagiposoon sa Dios subung sang sa isa ka abyan. Indi kay ini ginakinahanglan agud sa pagpakilala sa Dios kon ano kita, kondi agud nga mangintakus kita sa pagbaton sa Iya. Ang pangamuyo wala nagapapanaug sang Dios pakadto sa aton, kondi nga nagtib-ong sia sa aton pakadto sa Iya. {PK 125.2}

Sang si Jesus diri pa sa duta, gintudlo-an Niya ang Iya mga gintoton-an sa pagpangamuyo. Gintudlo-an Niya sila sa pagdala sang ila matag-adlaw nga kinahanglanon sa Dios, kag sa pagsalig sang ila mga kinahanglanon sa Iya. Kag ang pagpasalig nga Iya ginhatag sa ila nga ang ila ginapangayo pagapamati-an, ginahatag man sa aton. {PK 125.3}

Si Jesus sa Iya kaugalingon, sang nagapuyo pa Sia kaupud sang mga tawo sa masusun nagapangamuyo. Ang aton Manluluwas nagpakigbahin sang aton mga kinahanglan kag mga kaluyahon, sa bagay nga nagnanginmanug-ampo Sia, manugpangayo, nga nagapangayo sing lab-as nga kusug gikan sa Iya Amay agud nga makagowa Sia nga malig-on sa buluhaton kag sa pagtilaw. Sia amo ang aton solondan sa tanan nga butang. Sia amo ang aton utod sa aton mga kaluyahon, nga “ginsulay sa tanan nga bagay, kasubung naton;” apang tungud kay dili Sia makasasala, nagpahilayo Sia sa kalautan; ginbatas Niya ang mga pagpakigaway kag ang mga pagsakit sa Iya sa kalibutan sang sala. I ungd kay Sia tawhanon, ang pangamuyo para sa Iya nangin-isa ka kinahanglan kag daku nga kahigayonan. Nakakita Sia sing kalipay kag kasadya sa pagpakighambal sa Iya Amay. Kag kon ang Manluluwas sang tawo, ang Anak sang Dios, nagabatyag sang Iya pagkakinahanglan sang pangamuyo, daw ano pa gid kita nga mga maluya, makasasala, mamalasyon nga dili kita magbatyag sang pagkakinahanglan sang hanuut kag walay langan nga pangamuyo. {PK 126.1}

Ang Dios Nagahulat

Ang aton Amay nga langitnon, nagahulat sa pagha-tag sa aton sang kabug-osan sang Iya pagpakamaayo. Aton kahigayonan ang pag-inum sing bugana gid sa tuburan sang walay katubtuban nga gugma. Daw ano ka makatilingala nga dili kita mapinangamuyoon! Ang Dios handa kag maluyag sa pagpamati sang hanuut nga pangamuyo sang Iya labing kubus nga anak, apang may yara sa aton bahin sang tuman kadayag nga

pagkadimatutum sa pagsugid sang aton mga kinahanglanon sa Dios. Anano ang sarang mahunahuna sang mga manugtunda nga langitnon nahanungud sang mga tawo nga imol, kag walay kusug, nga nasakup sa mga pagsulay, kag ang tagiposoon sang Dios sang walay katubtuban nga gugma, nagahuyog sa ila nga handa sa paghatag sing labi sang ila mapangayo kag mapanghunahuna, kag bisan pa dili sila mapinangamuyoon kag tama kadiutay lamang sang ila pagtoo? Ang mga manugtunda nagahigugma sa pagyaub sa atubangan sang Dios, nagahigugma sila sa pagpalapit sa Dios. Ginakabig nila ang pagpangamuyo sa Dios subung nga ila labing daku nga kalipay, apang ang mga inanak sang tawo nga nagakinahanglan sing daku nga bulig nga ang Dios lamang amo ang sarang makahatag, amo ang daw may kaligon na sa paglakat nga wala sing tuytuy sang kapawa sang Iya Espiritu, kag pagpakigbuylog sang Iya pagtambong. {PK 127.2}

Patubas Sang Pagpatumbaya

Ang kadudulman sang kalaut nagalibut sa tanan nga nagapatumbaya sa pagpangamuyo. Ang mga pagsulay nga ginahutik sang kaaway nagaolog-olog sa ila sa pagpakasala, kag ini tanan mahanabu tungud kay wala nila paggamita ang mga kahigayonan nga ginhatag sang Dios sa ila nga amo ang diosnon nga tion sang pangamuyo. Ngaa bala nga ang mga inanak, lalaki kag babae, sang Dios nagapalabiyabiya sa pagpangamuyo, kon ang pangamuyo amo ang yabi sa kamut sang pagtoo sa pagbukas sang balahandi-anan sang mga langit, sa diin ginatago ang walay dolonan nga pagpakamaayo sang Makaako? Sa wala sing walay langan nga pagpangamuyo kag matutum nga pagpulaw may katalagman kita sa pagtubu nga dimahinalungon kag sa paglipas sa dalan nga matadlong. Ang aton kaaway nagatinguha sa walay langan sa pagbalabag sang dalan pakadto sa lingkoran nga pakilooyan, agud nga tungud sang hanoot nga mga pagampo kag pagtoo, dili kita makaambit sang bugay kag gahum nga sarang ikabato sa mga panulay. {PK 127.1}

May yara nga tuhoy nga mga kahimtangan nga ba-ngud sa ila sarang kita makalaum nga ang Dios magasabat sang aton mga pangamuyo. Ang isa sang mga nahauna amo nga magbatyag kita sang aton pagkakinahanglan sa pagpangayo sing bulig gikan sa Iya. Sia nagasaad, “kay Ako magaula sing mga tubig sa ibabaw sang ginauhaw, kag sing mga ilig sa ibabaw sang duta nga mamala.” Isaias 44:3. Ang tanan nga ginagutum kag ginauhaw sang Iya katarungan, nga nagahandum sa Dios, sarang makasalig nga sila pagabusgon. Ang tagiposoon kinahanglan nga pagabuksan sa gahum sang Espiritu, kay kon dili ang pagpakamaayo sang Dios dili mabaton. {PK 128.1}

Ang Pangagda

Ang aton labing daku nga kinahanglan, sa iya kaugalingon, amo ang isa ka katarungan nga nagapakilooy sing labing mapinatalupangdon tungud sa aton. Apang ang Dios kinahanglan pagpangitaon sa paghimo sini nga butang sa aton. Sia nagasiling: “Pangayo kamo, kag kamo pagahatagan;” kag, “ang bisan sa Iya kaugalingon nga Anak wala magpatawad, kondi gintugyan Niya Sia bangud sa aton nga tanan, paano bala nga indi maghatag man sa aton sa walay bili kaupud Niya sang tanan nga mga butang?” Mateo 7:7; Roma 8:32. {PK 128.2}

Kon may mga sala kita nga ginahuptan sa aton mga tagiposoon, kon nagakapyot kita sa aton kinilala nga sala, ang Ginoo dili magpamati sa aton; apang ang pangamuyo sang

mahinulsulon kag masinakiton nga kalag ginabaton sa gihapon. Kon ang tanan nga nakilala nga mga sala pagitu-ad naton kag paghinulsulan sarang kita makapaabut nga ang Dios magasabat sang aton mga pangabay. Ang aton pagkaayo dili makahatag sa aton sang pagkahamuut sang Dios, kondi nga ang pagkatakus ni Jesus amo ang magaluwas sa aton, ang Iya dugo amo ang magatinlo sa aton; apang may aton kita nga bahin nga pagahimoon agud sa pagtuman sang mga kinahanglanon sang pagbaton. {PK 129.1}

Kinahanglan ang Pagtoo

Ang pangamuyo nga mandadaug may isa pa liwan ka bahin nga kinahanglanon: ang pagtoo. “Kay kina-hanglan nga ang nagapalapit sa Dios, magtoo nga amo Sia, kag nga manugtumbas Sia sa mga nagapangita sa Iya.” Hebrienhon 11:6. Si Jesus nagsiling sa Iya mga gintoton-an, “Ang tanan nga mga butang nga pagpangayoon ninyo sa pagpangamuyo, magtoloo kamo nga pagabatonon ninyo sila, kag mainyo ninyo.” Markos 11:24. Ginatoohan bala naton Sia sa Iya polong? {PK 129.2}

Ang pagpasalig bugana kag wala sing dolonan, kag matutum Sia nga nagsaad. Kon dili naton mabaton ang amo gid nga butang nga aton ginapangayo, sa dag-on sang aton pagpangayo, dapat kila sa gihapon sa pagtoo nga ang Ginoo nakabati, kag nga pagasabton Niya ang aton mga pangamuyo. Tama sa aton ka masinalaypon kag makitid sing panghunahuna sa bagay nga konkaisa nagapangayo kita sang mga butang nga dili makahatag sing pagpakamaayo sa aton, kag ang aton Amay nga langitnon, sa Iya daku nga gugma, nagasabat sang aton mga pangamuyo bangud sa paghatag sa aton sadtong mga butang nga manginsakaayohan naton—butang nga pagahandumon naton kon kaupud sang palananawon nga ginasilakan sang langitnon nga kapawa makita naton ang tanan nga mga butang subung nga amo gid sila. Kon ang aton pangamuyo daw sa wala pagsabta, kinahanglan kita sa pagpangalig-on gihapon sa saad; tungud kay ang dag-on sa pagsabat sa pagkamatuud magaabut, kag mabaton naton ang pagpakamaayo nga aton kinahanglan sing labi. Apang ang pagsiling nga ang pangamuyo pagsabton sa gihapon sa amo gid nga bagay kag sa amo gid nga pinasahi nga butang nga aton ginapangayo, palabilabi. Ang Dios tama kaalam sa pagsayup, kag tama kaayo sa pagpugung sang bisan ano nga butang nga maayo sa sadtong mga nagalalakat sa katadlongan. Niyang dili ka magkahadluk sa pagsalig sa Iya, bisan pa nga dili nimo makita sa gilayon ang sabat sang imo mga pangamuyo. Magsalig ka sa Iya malig-on nga saad, “Pangayo kamo, kag kamo pagahatagan.” Mateo 7:7. {PK 129.3}

Magsalig Ka sa Ginoo

Kon magpamati kita sing laygay nga may pangduhaduha kag kahadluk, okon pagtinguhaan naton sa pagpasanag ang bisan ano nga butang nga dili naton makita sing maathag, sa waala pa kita sing pagtoo, ang mga kagamu magadugang lamang kag magadalum. Apang kon magpalapit kita sa Dios, nga nagabatyag sang aton pagkawalay masarangan kag pagsalig subung nga amo kita, kag kon sa mapinaubuson kag masinaligon nga pagtoo, ipahibalo naton ang aton mga kinahanglan sa Iya nga walay katubtuban sa kaalam, nga sa Iya wala sing nalipdan sang bisan ano nga butang, kag nga nagagahum sang tanan nga butang bangud sa Iya gahum kag polong, Sia makasarang kag maluyag sa pagtabang sa aton mga pagbaku, kag magapasilak Sia sang kapawa sa

aton mga tagiposoon. Bangud sa hanoot nga pagpangamuyo madala kita sa pagpakig-angot sa panghunahuna sang Makagagahum. Ayhan wala kita sing talandaan nga makita sa tion nga ang guya sang aton Manunubus nagahuyog sa aton sa paghikaloooy kag paghigugma; apang ini amo sa gihapon. Ayhan dili naton mabatyagan ang Iya mga pagtangdug, apang ang Iya kamut yara sa ibabaw naton sa daku nga paghigugma kag pagkaawa. {PK 130.1}

Dapat Kita Magpatawad

Kon magpalapit kita sa pagpangayo sing kalooy kag pagpakamaayo gikan sa Dios, kinahanglan kita sa paghuput sing espiritu nga mahigugmaon kag mapinatawaron sa aton kaugalingon nga mga tagiposoon. Paano ang pagpangamuyo naton, “Patawara kami sang mga utang namon, subung man nga ginapatawad namon ang mga mangungutang namon” (Mateo 6:12), kag sa amo man nga ti-on maghuput sing espiritu nga dimapinatawaron? Kon maluyag kita nga pagpamati-an ang aton kaugalingon nga mga pangamuyo, kinahanglan kita sa pagpatawad sa iban sa amo man nga bagay, kag sa amo man nga talaksan subung nga nagahandum kita nga pagapatawaron. {PK 131.1}

Ang pagkamapinadayonon sa pagpangamuyo amo ang isa ka kinahanglanon agud nga ang aton pangamuyo pagbatonon. Kinahanglan kita sa pagpanga-muyo sing walay langan kon maluyag kita sa pag-tubu sa pagtoo kag kaalam. “Magpaladayon kamo sa pagpangamuyo,” “pagpaladayon kamo sa pagpanga-muyo, nga nagapulaw sa iya, nga may pagpasalamat.” Roma 12:12; Kolosas 4:2. Si Pedro nagalaygay sa mga tomoloo, “busa, magbulut-anan kamo, kag magpululaw kamo, sa pagpangamuyo.” 1 Pedro 4:7. Si Pablo nagsiling “tungud sang pagpangamuyo kag sa pag-ampo nga may pagpasalamat, makilal-an sa atubangan sang Dios ang inyo mga pinangayo.” Pilipos 4:6. “Apang kamo, mga hinigugma” siling ni Judas, “magpalangamuyo kamo sa Espiritu Santo, magpalanago kamo sa gugma sang Dios.” Judas 20, 21. Ang walay langan nga pangamuyo amo ang walay untat nga pagpakigbuylog sang kalag sa Dios, agud nga ang kabuhi gikan sa Dios mag-ilig sa aton kabuhi; kag gikan sa aton kabuhi, ang kaputli kag ang kabalaan maga-ilig pabalik sa Dios. {PK 132.1}

Magmaukod Ka

Kinahanglan gid nga magpangamuyo kita sing maukod, dili pagtuguti ang bisan ano nga butang sa pagsablag sa imo. Magapaninguha ka sa pagbutang sing ti-on sa pagpakighambal sa tunga ni Jesus kag sang imo kaugalingon nga kalag. Paghimusli ang tanan nga kahigayonan sa pagkadto sa diin ginahiwat ang katiponan sa pangamuyo. Yadtong nagatinguha sing matuudtuud gid sa pagpakighambal sa Dios, makita sila sa katiponan sang pangamuyo, nga matutum sa ila mga katungdanan, kag makugi kag nagapaninguha sa pag-ani sang tanan nga kaayohan nga sarang nila maagum. Pagapa-uswagong nila ang tanan nga kahigayonan sa pagbutang sang ila kaugalingon sa diin sarang sila makabaton sang mga silak sang kapawa gikan sa langit. {PK 132.2}

Ang Pangamuyo sa Tagu Kinahanglan gid

Kinahanglan kita sa pagpangamuyo sa aton mga panimalay; kag labi sa tanan, dili kita magkalimut sa pagpangamuyo sa tagu, tungud kay ini amo ang kabuhi sang kalag. Maiwat sa kalag ang pagtubu samtang ginapatumbaya-an ang pagpangamuyo. Dili

tuman ang pagpangamuyo sa panimalay okon sa dayag. Sa isahanon pagbuksi ang imo kalag sa manug-usisa nga mata sang Dios. Ang pangamuyo sa tagu pagaipabati lamang sa manugpamati sang pangamuyo nga Dios. Wala sing manini-id nga idulungug nga magabaton sang lulan sang subung nga mga palangayoon. Sa pangamuyo sa tagu ang kalag hilway gikan sa tanan nga mga kagahud sa palibut, hilway gikan sa kagamu. Sing matawhay apang hanoot, magalambut ang pangamuyo sa Dios. Matam-is kag mapinadayonon nga gahum ang magailig gikan sa Iya nga nagatan-aw sa tagu, nga ang Iya idulungug nabuksan sa pagpamati sang pangmuyo nga nagagikan sa tagiposoon. Bangud sa matawhay kag sensilyo nga pagtoo, ang kalag magapakighambal sa Dios, kag magatipon sia nga sa iya kaugalingon sing mga silak sang langitnon nga kapawa agud sa pagpabaskug kag sa pagbulig sa iya sa iya mga pagpakig-away batok kay Satanas. Ang Dios amo ang aton kuta sang kaligonan. {PK 133.1}

Magpangamuyo kamo sa inyo mga hulut; kag subung man sa inyo pagkadto sa inyo mga buluhaton sa matag-adlaw, pag-itib-ong ninyo sing masunsun ang inyo mga tagiposoon sa Dios. Subung sini ang paglakat ni Enok kaupud sa Dios. Ini nga mga pangamuyo sa tagu magasaka subung sang hamili nga insiensio sa atubangan sang lingkoran nga harianon sang bugay. Si Satanas dili sarang makadaug sa kalag nga ang iya tagiposoon didto sa Dios. {PK 134.1}

San-o Kita Magapangamuyo

Wala sing ti-on okon duug nga sa diin indi nagakaigo ang pagtib-ong sing isa ka pangamuyo sa Dios. Wala sing bisan ano nga butang nga maka-upang sa aton gikan sa pagtib-ong sang aton mga tagiposoon sa espiritu sa isa ka hanoot nga pangamuyo. Sa tunga sang mga kadam-an, sa mga dalan, sa tunga sang mga buluhaton, palangitan-an, sarang kita makatib-ong sing isa ka pangamuyo sa Dios, kag makapangayo sing langitnon nga pagtuytuy, subung sang ginhimo ni Nehemias sang pagpahayag niya sang iya mga pangabay sa atu-bangan sang hari nga si Artaherhes. Ang pagpanga-muyo sa tagu sarang naton mahimo sa bisan diin la-mang kita. Kinahanglan nga pagbuksan naton sa gihapon ang gawang sang tagiposoon, kag pagitib-ong naton ang isa ka pangagda nga si Jesus magkari kag magpuyo sa kalag subung nga isa ka langitnon nga durnulu-aw. {PK 134.2}

Bisan pa nga yara kita sa tunga sang nadagta-an kag dunut nga kahawa-an sa palibut naton, wala kita sing kinahanglan sa paghaklo sang ila mabalo nga hangin, kondi nga magkabuhi kita gikan sa putli nga hangin sang langit. Sarang kita makatakup sang tanan nga gawang batok sa diputli nga mga painoino kag dibalaan nga mga hunahuna bangud sa pagtib-ong sang kalag sa atubangan sang Dios sa hanoot nga pangamuyo. Yadtong mga nagabulukas sang ila mga tagiposoon agud sa pagbaton sang pagsakdag kag pagpakamaayo sang Dios dapat sa pagkabuhi sa labi kabalaan nga palibut sang sa iya sang duta, kag dapat sa paghuput sing walay langan nga pagpakighambal kaupud sang langit. {PK 134.3}

Labi Kaathag nga Palanan-awon Kinahanglan

Kinahanglan kita sa pag-ambit sing labi pa kaathag nga palanan-awon nahanungud kay Jesus, kag sing labi kahimpit nga paghangup nahanungud sang kabilihanang sang mga

butang nga walay katubtuban. Ang katahum sang pagkabalaan amo ang paglipay sang tagiposoon sang mga inanak sang Dios; kag agud nga ini mahimo, kinahanglan kita sa pagpangita sang diosnon nga palanan-awon sang langitnon nga mga butang. {PK 135.1} Pag-itib-ong naton ang aton kalag, agud nga ang Dios maghatag sa aton sing gininhawa sang langitnon nga hangin. Sarang kita makapalapit sa Dios agud nga sa tanan nga mga pagtilaw nga wala ginapaabut, ang aton mga hunahuna magliso sa Iya subung nga kinaugali sang pagliso sang bulak sa adlaw. {PK 135.2}

Pag-ipahayag ang inyo mga kinahanglan, ang inyo mga kalipayan, ang inyo mga kasulub-an, ang inyo mga paghimud-os kag ang inyo mga kahadluk sa atubangan sang Dios. Indi kamo makapabug-at sa Iya; indi kamo makapataka sa Iya. Sia nga nakaisip sang mga buhok sang inyo olo wala magapabaya sang mga kinahanglanon sang Iya mga inanak. “Ang Ginoo mahinoklogon gid, kag maloloy-on.” Jakobo 5:11. Ang Iya tagiposoon sang gugma ginatandug sang aton mga kasulub-an, kag bisan sang aton paghinambit sa ila. Ipahayag sa Iya ang tanan nga butang nga nagapalibug sang inyo mga hunahuna. Wala sing bisan ano nga butang nga tama kadaku nga dili Niya madala, tungud kay ginauyatan Niya ang mga kalibutan, ginagahaman Niya ang tanan nga buluhaton sang bug-os nga kalibutan. Wala sing bisan ano nga butang nga may kaangtanan sa aton paghidaet bisan kon daw ano sila ka diutay nga dili Niya matalupangdan. Wala sing bahin sang aton mga gin-agihan nga tama kadulum sa Iya sa pagbasa; wala sing kagamu nga tama kaiwat sa Iya sa paghusay. Wala sing kalainan nga mahulog sa labing diutay sang Iya mga inanak, wala sing handum nga nagapalibug sang kalag, wala sing kalipay nga nagalipay, wala sing hanuut nga pangamuyo nga nagagowa sa mga bibig, nga wala pagbantayi sang aton Amay nga langitnon, okon wala Niya pagkabalak-i. “Sia nagaayo sang mga boong sa tagiposoon, kag nagabugkos sang ila mga pilas.” Sal-mos 147:3. Ang kaangtanan sa tunga sang Dios kag sang tagsa ka kalag maathag kag bug-os nga subung gid abi sang sa wala na sing liwan nga kalag nga ginhatagan Niya sang Iya hinigugma nga Anak. {PK 135.3}

Sa Ngalan ni Jesus

Si Jesus nagsiling, “Kamo magapalangayo sa Akon ngalan; kag Ako indi nagasiling sa inyo nga Ako magaampo sa Amay tungud sa inyo; kay ang Amay gid nagahigugma sa inyo.” Juan 16:26, 27. “Ako ang nagpili sa inyo; . . . agud nga bisan ano nga butang ang inyo pagpangayoon sa Amay sa Akon ngalan, pagaihatag sa inyo.” Juan 15:16. Apang ang pagpangamuyo sa ngalan ni Jesus labi pa sang sa pagsambit sina ngalan sa pagsugud kag sa katapusan sang pangamuyo. Amo sia ang pangamuyo sa hunahuna kag sa espiritu ni Jesus; samtang nagatoo kita sa Iya mga saad, magsalig kita sa Iya bugay, kag magbuhat sang Iya mga buluhaton. {PK 136.1}

Pangabudlay kag Pangamuyo Nagaupdanay

Ang Dios wala nagasiling nga ang iban sa aton kinahanglan nga magmangin-ermitanyo kag magmonhe, kag nga magpalanago kita gikan sa kalibutan agud nga matugyan naton ang aton kaugalingon sa mga buluhaton sang panimbahon. Ang kabuhi kinahanglan nga manginkasubung sang kabuhi ni Kristo—sa ulut sang kabukiran kag sang katawohan. Ang tawo nga wala sing liwan nga ginahimo kondi nga ang pagpangamuyo lamang, sa

dili madugay magauntat sa pagpangamuyo, okon ang iya mga pangamuyo manginsulitsulit nga sa mga bibig lamang. Kon ang tawo maggowa gikan sa katilingban, gikan sa mga katungdanan nga Kristohanon kag gikan sa pagpas-an sang krus; kon mag-untat sila sa pagpangabudlay sing makugihon nga sa Agalon, nga nagpangabudlay sing makugihon tungud sa ila, madula sa ila ang butang nga kinahanglan nila igpangamuyo kag wala sila sing daku nga handum sa pagpangamuyo. Ang ila mga pangamuyo manginsa-ila lamang kaugalingon kag manginmaiyaiahon. Dili sila makapangamuyo nahanungud sa kinahanglanon sang mga katawohan okon nahanungud sa pagpauswag sang ginhari-an ni Kristo, sa pagpangayo sing kusug nga ila pagagamiton sa pagpangabudlay. {PK 137.1}

Magaantus kita sing isa ka kapierdehan kon pagpatumbayaan naton ang kahigayonan sa pagtililipon agud sa pagpabaskug sang isa kag isa sa buluhaton sang Dios. Ang mga kamatooran sang Iya polong madulaan sang ila kabaskug kag pagkaimportante sa aton mga panghunahuna. Ang aton mga tagiposoon dili na masilakan kag mapaliso sang ila manugpabalaan nga gahum, kag mahulog kita gikan sa pagkaespirituhanon. Sa aton mga paghiliupod subung nga mga Kristohanon daku nga kapierdehan ang aton nahimo bangud sang tama naton ka kulang sing kaawa sa isa kag isa. Ang isa nga nagapuyo lamang tungud sa iya kaugalingon wala nagahimo sang buluhaton nga buut sang Dios nga iya pagahimoon. Ang nagakaigo nga pagpauswag sang mga kagawian sa pagkamainimponon nga yari sa aton kinaugali nagadala sa aton sa paghigugma sa iban, kag amo ang isa ka paagi sa pagpauswag kag pagpabaskug sa aton sa buluhaton sang Dios. {PK 138.1}

Magpabaskugay ang Isa kag Isa

Kon ang mga Kristohanon magkilitaay sing tingub, nga magasinugiray ang isa kag isa nahanungud sang gugma sang Dios kag sang hamili nga mga kamatooran sang pagpanubus, ang ila kaugalingon nga mga tagiposoon mapabugnawan, kag mapaglig-on nila ang isa kag isa. Sing labi makatoon kita sa matag-adlaw nahanungud sang aton Amay nga langitnon, nga nagahiagum sang lab-as nga pinaniiran sang Iya bugay; niyan magahandum kita sa paghambal nahanungud sang Iya gugma; kag sa ginahimo naton ini, ang aton kaugalingon nga tagiposoon mapaalabaab kag mapabaskug. Kon magpanumdum kita kag maghambal sing labi nahanungud kay Jesus, kag dili sang aton kaugalingon, magaagum kita sing daku sang Iya pagtambong. {PK 138.2}

Pagkaon Sang Hunahuna

Kon lamang pagdumdumon naton ang Dios sing subung kasunsun sang makita naton ang kasanagan sang Iya pagtatap sa aton, mahuptan naton Sia sa aton mga panghunahuna, kag magakalipay kita sa paghambal kag sa pagdayaw sa Iya. Nagahambal kita nahanungud sang mga butang nga umalagi tungud kay may daku kita nga kabalaka sa ila. Nagahambal kita nahanungud sang aton mga abyan tungud kay ginahigugma naton sila; ang aton mga kalipayan kag mga kasulub-an yara nahigot kaupud nila. Apang may labing daku pa kita nga katarungan sa paghigugma sa Dios sang sa paghigugma naton sa aton mga abyan nga dutan-on. Ngani kinahanglan nga manginkinaugali nga butang sa kalibutan ang paghimo sa Iya nga nahauna sa tanan

naton nga mga panghunahuna, sa paghambal nahanungud sang Iya kaayo kag sa pagsugid sang Iya gahum. Ang manggaranon nga hatag nga Iya ginhatag sa aton wala pagtuyo-a nga sa pagkuha sing bug-os sang aton mga panghunahuna kag paghigugma, sa bagay nga indi na kita kinahanglan maghatag sa Dios sing ano man; sila amo ang magapapahanumdum sa aton sa walay langan nahanungud sa Iya, kag sa paghigot sa aton sa mga higot sang paghigugma kag pagkamapinasalamaton sa aton langitnon nga Manughatag. Nagapuyo kita sing tama ka lapit sa mga nanubu-an sang duta. Bayawon naton ang aton mga mata sa nabuksan nga gawang sang puluy-an nga balaan sa ibabaw, sa diin ang kapawa sang himaya sang Dios nagasilak sa nawung ni Kristo, nga “sarang man makaluwas Sia sing bug-os sa mga nagapalapit tungud sa Iya sa Dios.” Hebrichon 7:25. {PK 139.1}

Kinahanglan kita sa pagdayaw sa Dios sing labi “tungud sang Iya kalooy kag tungud sang Iya mga kalatingalahan nga sa mga inanak sang mga tawo.” Salmos 107:8. Ang aton mga buluhaton sa pagpangamuyo dili manginbug-os lamang sa mga pagpangayo kag pagbaton. Dili ta lamang pagdumdumon ang aton mga kakulangan, kag dili ang nahanungud sang mga kaayohan nga aton ginabaton. Wala kita nagapangamuyo sing lakas, kondi tama kahalushalus ang aton pagpasalamat. Kita amo ang walay langan nga manugbaton sang mga kalooy sang Dios, kag daw ano ka diutay sang pagpasalamat ang aton ginapahayag, daw ano ka diutay ang aton pagdayaw sa Iya tungud sang Iya nahimo sa aton. {PK 140.1}

Magmalipayon Ka

Sang una ang Ginoo nagsogo kay Israel, kon magtilipon sila sa Iya buluhaton, “Didto pagakaonon ninyo sila sa atubangan ni Jehoba, nga inyo Dios, kag magakalalipay kamo, kamo kag ang inyo mga panimalay, sa tanan nga mga buluhaton sang inyo mga kamut, kag nga sa ila ginpakamaayo sa imo ni Jehoba, nga imo Dios.” Deuteronomio 12:7. Ang butang nga ginahimo nga sa himaya sang Dios dapat nga paghimoon sing malipayon, kaupud sang mga pag-ambahan kag mga pagdayaw kag mga pagpasalamat, kag indi nga may kasubu kag kasakit. {PK 140.2}

Ang aton Dios amo ang isa ka malolo, kag maloloyon nga Amay. Ang Iya buluhaton dili pagkabigon subung nga nagapasubu sang tagiposoon, kag nagapangitngit. Kinahanglan mangin kalalipayan ang pagsimba sa Ginoo kag ang pagpakigbahin sa Iya mga buluhaton. Ang Dios dili buut nga ang Iya mga inanak nga sa ila ginhatag ang daku nga kaluwasan. maghimo sang Iya buluhaton sa bagay nga subung abi nga Sia amo ang isa ka matig-a kag tama kautitid nga agalon. Sia amo ang ila labing maayo nga abyan; kag nga kon sila ang magsimba sa Iya, nagapaabut Sia sa pagpakig-upod sa ila, sa pagpakamaayo kag sa paglipay sa ila, sa pagpuno sang ila mga tagiposoon sing kalipay kag pag-higugma. Ang Ginoo nagahandum nga ang Iya mga inanak magpangalipay sa Iya mga buluhaton, kag magpangita sing kahamungayaan sa baylo sang kabudlayan sa Iya mga buluhaton. Ginahandum Niya nga yadtong tanan nga nagapalapit sa pagsimba sa Iya magpalauli nga nagadalala kaupud nila sang hamili nga mga hunahuna nahanungud sang Iya pagbantay kag paghigugma, agud nga makapangalipay sila sa ila mga buluhaton sa matag-adlaw, kag agud nga makabaton sila sing bugay sa paghimo

sing maminatud-on kag sing matutum sang tanan nga mga butang. {PK 140.3}

Magtipon Palibut sa Krus

Kinahanglan kita sa pagtipon palibut sa krus. Si Kristo kag Sia nga linansang sa krus kinahanglan nga manginbutang nga aton pagpamalandungon, kag paghambalon, kag pagpangalipayan. Dapat nga paghuptan naton sa aton mga hunahuna ang tanan nga mga pagpakamaayo nga ginabaton naton gikan sa Dios, kag kon mahangpan naton ang Iya daku nga gugma, kinahanglan kita magpakahanda sa pagsalig sang tanan nga mga butang sa kamut nga ginlansang sa krus tungud sa aton. {PK 141.1}

Ang kalag sarang makasaka malapit sa mga langit sa ibabaw sang mga mga pakpak sang mga pagdayaw. Ang Dios ginasimba kaupud sang alambahanon kag mga tulunggon sa puluy-an nga langitnon, kag sa aton pagpahayag sang aton mga pagpasalamat ginasunod naton ang panimbahon sang langitnon nga mga pumuluyo sang langit. “Ang nagahalad sing pagdayaw nagahimaya” sa Dios. Salmos 50:23. Magpalapit kita kaupud sang matinahoron nga kalipay sa atubangan sang Manunuga, kaupud sang “ambahanon sang pagdayaw kag sang tingug sa pagkinanta.” Isaias 51:3. {PK 142.1}

BAHIN 12

KABANGDANAN SANG PAGPANDUHADUHA

MADAM U, ilabi nagid yadtong mga bag-ohan pa lamang sa kabuhi Kristohanon, ang ginagamu sing masunsun bangud sang panghunahuna sang pagkamadinuhaduhaon. May madamu nga mga butang sa Biblia nga dili nila sarang masaysay, okon bisan mahangup, kag si Satanas nagagamit sini nga mga butang sa pagpaluya sang ila pagtoo sa Kasulatan subung nga binugna gikan sa Dios. Nagapamangkot sila, “Paano ang akon paghibalo sang matadlong nga dalan? Kon ang Biblia matuud gid nga polong sang Dios, paano ang akon paglikaw sa mga pagpangduhaduha kag mga palaligban?” {PK 143.1}

Ang Dios wala nagapilit sa aton sa pagtoo, sa wala sing paghatag sing tuman nga mga kamatooran nga sa iya pagaipasad naton ang aton pagtoo. Ang Iya pagkaamo, ang Iya kinaugali, ang pagkamaminatud-on sang Iya Polong, ini sila tanan gintukud bangud sang mga pagpamatuud nga nagapahayag sa aton kaisipan; kag ini nga mga pagpamatuud bugana. Apang ang Dios wala gid magkuha sang kabangdanan sa pagpangduhaduha. Ang aton pagtoo kinahanglan pagaipahamtang sa mga kamatooran kag indi sa mga butang nga makita. Yadtong maluyag sa pagpangduhaduha may kahigayonan; apang yadtong nagahandum sa paghibalo sang kamatooran, makakita sing madamu nga mga kasanagan sa diin mapahamtang nila ang ila pagtoo. {PK 143.2}

Dili gid nga mas-a mahimo sang tawhanon nga hunahuna ang paghangup sing bug-os sang kinaugali okon mga buluhaton sang walay katubtuban nga Dios. Sa mga manginalamon, kag sa mga lantip sing mga panghunahuna, inang balaan nga Dios kinahanglan sa gihapon nga magpabilin nga napasaputan subung nga isa ka tinagu. “Malambut mo bala ang kadalumon sang Dios? Kon makadangat ka bala sa kadulunan gid sang Makagagahum? Mataas ini subung sang mga langit: ano ang mahimo mo didto? Labing madalum pa ini sang kadadalman: paano bala ang pagkilala mo sa iya?” Job 11:7,8. {PK 145.1}

Pagkadalum Sang Kamanggaran

Ang pinadala nga si Pablo nagasiling, “Oh kadalum sang kamanggaran kag sang kaalam, kag sang ihibalo sang Dios! Daw ano nga pagkadimatungkad sang Iya mga paghukom, kag pagkadimatultulan sang Iya mga dalan!” Roma 11:33. Apang, “ang gal-um kag ang kadudulman nagapalibut sa Iya; ang katarungan kag ang paghukom amo sila ang sadsaran sang Iya lingkoran nga harianon.” Salmos 97:2. Malambutan lamang na-ton sa paghangup ang nahanugud sang Iya mga ginahimo sa aton kag ang gugma nga nagsogo sa Iya, agud nga makilala naton ang Iya walay dulunan nga gugma kag kalooy nga natingub sa Iya walay katubtuban nga gahum. Sarang naton mahangpan ang Iya mga katuyuan nga may kapuslanan sa aton sa paghibalo; kag luwas sini, magsalig kita sa gihapon sa kamut nga gamhanan, sa tagiposoon nga puno sang paghigugma. {PK 145.2}

Ang polong sang Dios kasubung sang kinaugali sang iya Magbubuhat nga langitnon nagapahayag sang mga tinagu nga dili nga mas-a mahangpan sing bug-os sang mamalasyon nga tinuga. Ang pagsulud sang sala sa kalibutan, ang pagpakatawo ni

Kristo, ang pagkatawo liwan, ang pagkabanhaw, kag madamu pa nga mga halambalanon nga ginapahayag sa Biblia, mga tinago nga tama kadalum sa tawhanon nga hunahuna sa pagsaysay, okon bisan sa paghangup sing bug-os. Apang wala kita sing katarungan sa pagpangduhaduha sang polong sang Dios tungud kay dili naton mahangpan ang pagkatinagu sang Iya pagkadios. Sa dutan-on nga kalibutan ginalibutan kita sa walay langan sang mga tinagu nga dili naton matungkad. Ang tama kalabing kubus nga dagway sang kabuhi nagapahayag sing isa ka kaliligban, sa bagay nga ang labing maalam nga mga pilosopo wala sing gahum sa pagsaysay. Sa bisan diin may yara nga mga katingalahan nga dili naton malambutan. Matingala pa bala kita sa paghibalo nga sa espirituhanon nga kalibutan may yara man nga mga katingalahan nga indi naton matungkad? Ang mga kaiwaton nagasandig lamang sa pagkaluya kag pagkakitid sang hunahuna sang tawo. Ang Dios naghatag sa aton sa mga Kasulatan sing madamu nga mga kasanagan nahanungud sang ila langitnon nga kinaugali, kag dili kita dapat magpangduhaduha sa Iya mga polong, tungud lamang kay dili kita makahangup sang tanan nga mga tinagu sang Iya pagkadios. {PK 145.3}

“Maiwat nga Hangpon”

Ang pinadala nga si Pedro nagsiling, nga may yara sa Kasulatan sang “mga butang nga ang iban sa ila mga maiwat nga hangpon, nga ginapatiko sang mga dimaalam kag mga mahuyang. . . . nga sa kaugalingon nga kapahamakan nila.” 2 Pedro 3:16. Ang mga kaiwatan sa Kasulatan ginakabig sang mga madinuhaduhaon subung nga isa ka pagpakigbais batok sa Biblia, apang malayo sa sini, nagabulig sila sa paghatag sing mabaskug nga mga kasanagan nahanungud sang iya langitnon nga pagkabinugna. Apang kon abi wala sia sing sulud nga mga kasulatan nahanungud sa Dios nga mga maiwat hangpon kondi lamang yadtong mga mahapus; kon ang iya pagkadaku kag pagkahalangdon sarang lamang malambut sang tawhanon nga panghunahuna, niyan ang Biblia dili makahatag sing malig-on nga pagpamatuud nahanungud sang iya langitnon nga kagamhanan. Ang pagkadaku kag ang pagkatinagu sang mga halambalanon nga ginapahayag, dapat sa pagpabaskug sang pagtoo sa iya subung nga polong sang Dios. {PK 146.1}

Pagkaon Espirituhanon sa Tanan

Ang Biblia nagapahayag sang kamatooran sa isa ka sensilyo kag himpit nga pagpa-igo sa mga kinahanglanon kag mga handum sang tawhanon nga tagiposoon, nga nagapatingala kag nagapaorong sang labing lantip nga mga panghunahuna, kag nagapatakus sang mga kubus kag dimaalam sa paghangup sang dalan sang kaluwasan. Kag wala labut sini, ining sensilyo nga mga kamatooran nagaangot sa mga halambalanon nga tama kataas, tama kasanyug, tama ka labaw sang sa masarangan sang gahum nga tawhanon sa paghangup, sa bagay nga sarang lamang naton mabaton sila tungud kay ang Dios amo ang naghambal sa ila. Sa sini nga bagay, ang piano sa pagtubus ginahumlad sa atubangan naton, agud nga ang tagsa ka kalag makakita sang mga alintaga nga pagalaktan niya sa iya paghinulsul sa Dios, kag sa iya pagtoo sa aton Ginoong Jesukristo, agud nga maluwas kita sa paagi nga tinangdo-an sang Dios; apang sa idalum sini nga mga kamatooran nga mahapus hangpon, yara ang mga ti-nagu nga

amo ang palalipdan sang Iya himaya—mga tinagu nga nagalandas sang panghunahuna sa iya mga pagusisa, apang bisan pa nagapabaskug sa maminatudon nga manug-usisa sang Biblia, nagalabi kadalum ang iya paghangup nga sia amo ang polong sang buhi nga Dios, kag ang tawhanon nga katarungan nagapasakup sa atubangan sang pagkahalangdon sang langitnon nga binugna. {PK 147.1}

Ang Aton Pagkilala May Dolonan

Ang pagkilala nga dili kita makahangup sing bug-os sang dalagku nga mga kamatooran sa Biblia amo lamang ang pagkilala nga ang hunahuna nga may ka-tapusan dili makasarang sa paghangup sang mga bu-tang nga walay katapusan; nga ang tawo, kaupud sang iya may dulunan nga kaalam nga tawhanon, dili sarang makahangup sang mga katuyu-an sang Walay Katubtuban. {PK 148.1}

Tungud kay dili sila makatungkad sang tanan Niya nga mga tinagu, ang mga madinuhaduhaon kag ang dimatinoohon nagasikway sang polong sang Dios; kag dili ang tanan nga nagasiling nga nagatoo sa Biblia ang hilway gikan sa katalagman sini nga bu-tang. Ang pinadala nagasiling, “Mag-andam kamo, mga utud, nga wala sing bisan sin-o sa inyo, nga may malain nga tagiposoon nga dimatinoohon, sang pagbulag niya sa buhi nga Dios.” Hebreinhon 3:12. Matarung ang pagtoon sing maid-id sang mga pagtudlo sang Biblia, kag ang pag-usisa sang mga “kadadalman sang Dios” (1 Korinto 2:10), subung nga ginapahayag sila sa Kasulatan. Samtang “ang mga butang nga tinagu nahanungud kay Jehoba,” “ang mga butang nga binugna nahanungud sa aton.” Deuteronomio 29:29. {PK 148.2}

Buluhaton ni Satanas

Apang buluhaton ni Satanas ang pagpatiku sang manug-usisa nga gahum sang panghunahuna. Ang bugal ginasimbug sa ila pagtoon sang kamatooran sang Biblia, sa bagay nga ang mga tawo nagabatyang sang pagkadimapinailubon kag pagkapierde kon dili sila makasaysay sang tanan nga bahin sang Kasulatan sa ila kaugalingon nga kaayohan. Tama ka makahuluya nga sa ila ang pagkilala nga dili sila makahangup sang binugna nga mga polong. Dili sila maluyag sa paghulat sing mapinailubon tubtub nga ang Dios magtan-aw nga nagakaigo na ang pagpahayag sa ila sang kamatooran. Nagabatyang sila nga ang ila kubus nga kaalam nga tawhanon tuman na nga makapatakus sa ila sa paghangup sang Kasulatan, kag tungud kay dili sila makahimo sini, ginapanghiwala nila ang iya kagamhanan. Matuud nga madamu sang mga pagtudlo kag mga pagtolon-an nga ginatoohan sang kalabanan nga siling nila nagagikan sa Biblia, nga wala sing sadsaran sa iya mga pagtudlo, kag sa pagkamatuud nagabatok sa bug-os nga kahulogan sang ginabugna. Ini nga mga butang amo ang nanginkabangdanan sang pagpangduhaduha kag mga kagamu sa madamu nga mga hunahuna. Apang, dili ini sila mapasibangud sa polong sang Dios, kondi sa pagpatiko sang tawo sa iya. {PK 149.1}

Kon masarangan pa lamang sang mga tawo nga tinuga ang pagdangat sa bug-os nga paghangup naha-nungud sa Dios kag sang Iya mga binuhatan, niyan, sa nalambut na nila ini nga butang, wala na sing ki-nahanglan sa ila ang pagtukib sang kamatooran, dili na sila magatubo sa kaalam, dili na sila magatubo sa hunahuna okon sa tagiposoon. Ang Dios dili na manginlabaw sa tanan; kag ang tawo, sa nalambut na niya ang talaksan sang

kaalam kag ikasarang, maga-untat sa paguswag. Magpasalamat kita sa Dios nga indi subung sini. Ang Dios walay katubtuban; sa Iya yara “natago ang tanan nga mga bahandi sang kaalam kag pagkilala.” Kolosas 2:3. Kag sa sulud sang walay katubtuban, ang tawo maga-usisa sa gihapon, magatoon sa gihapon, apang dili maka-urut sang kamanggaran sang Iya kaalam, sang Iya kaayo, kag sang Iya gahum. {PK 150.1}

Plano Sang Dios sa Aton

Ang Dios nagahandum nga bisan pa sa sini nga pagkinabuhi ang mga kamatooran sang Iya polong mabuksan sa gihapon sa Iya mga tinawo. May isa lamang ka paagi nga bangud sa iya sarang madangat ini nga kaalam. Makadangat kita sa paghangup sang polong sang Dios bangud lamang sa pag-iwag sang Espiritu nga bangud sa iya ginhatag ini nga mga polong: “Wala sing may nakakilala sang mga butang sang Dios, kondi ang Espiritu sang Dios;” “kay ang Espiritu naga-usisa sang tanan nga mga butang, bisan pa sang sa mga kadadalman sang Dios.” 1 Korinto 2:11, 10. Kag ang saad sang Manluluwas sa Iya mga sumulunod amo, “Apang kon magkari Sia, ang Espiritu sang kamatooran, magatuytuy Sia sa inyo sa bug-os nga kamatooran; . . . kay magabaton Sia sang sa Akon, kag magatalastas sa inyo.” Juan 16:13, 14. {PK 150.2}

Ang Dios nagahandum nga ang tawo maghanas sang iya manug-usisa nga gahum; kag nga ang pagtoon sang Biblia magapabaskug kag magatib-ong sang hunahuna nga dili mahimo sang bisan ano nga pagtolon-an. Apang mag-andam kita nga dili naton pagpakadioson ang katarungan, nga nasakup sa kaluyahon kag pagkadisangkol sang tawo. Kon dili kita buat nga ang Kasulatan magmadulum sa aton mga hunahuna, sa bagay nga ang labing maathag nga mga kamatooran dili naton mahangpan, dapat kita sa paghuput sang pagkasensilyo kag pagtoo sang diutay nga bata, nga handa sa pagtoon, kag nagapangayo sang pagbulig sang Espiritu Santo. Ang pagkilala sang gahum kag sang kaalam sang Dios, kag sang aton pagkadisarang sa paghangup sang Iya pagkadaku, dapat sa pagpabaskug sa aton sa pagpaubus, kag dapat kita sa pagbukas sang Iya polong subung nga buat kita magsulud sa Iya atubangan kaupud sang balaan nga pagtahud. Kon magkari kita sa Biblia, ang katarungan kinahanglan sa pagkilala sang kagamhanan nga mataas pa sang sa iya sang tawo, kag ang tagiposoon kag ang ihibalo dapat sa pagyaub sa daku nga AMO AKO. {PK 151.1}

Espirituhanon nga Bulig Kinahanglan

May madamu nga mga butang nga kon tan-awon nimo daw sa maiwat kag madulum, nga pagaipahayag sing mahapus kag maathag sang Dios sa sadtong nagapangita sing subung sang kasanagan nila. Apang sa wala sing pagtuytuy sang Espiritu Santo magapadayon kita sa pagpatiko sang mga Kasulatan okon sa pagbadbad sa ila sing baliskad. May ma-damu nga pagbasa sang Biblia nga wala sing kapuslanan, kag sa makadamu nga bagay isa ka daku nga daut. Kon ang polong sang Dios pagbuksan sa wala sing pagtahud kag wala sing pangamuyo; kon ang panghunahuna kag ang mga handum wala sa Dios, okon wala nagakasinanto sa Iya kabubut-on, ang panghunahuna ginadulman sang mga pagpangduhaduha; kag sa amo nga pagtoon sang Biblia, ang pagkamadinuhaduhaon nagabaskug. Ang kaaway amo ang nagagahum sang panghunahuna kag sang mga handum, kag nagatudlo sia sing mga pagbadbad nga dili

matadlong. Kon ang tawo wala nagapangita sang kabubut-on sang Dios sa polong kag sa buhat, niyan bisan kon daw ano sila kaalam, may katalagman sila sa pagsayup sa ila mga paghangup sang Kasulatan, kag dili maayo ang pagsalig sa ila mga pagsaysay. Yadtong mga nagabasa sang Kasulatan sa pagpangita sing mga sayup, wala sing espirituhanon nga palanan-awon. Kaupud sang pinatiko nga pagtolok makakita sila sing madamu nga mga kabangdanan sa pagpangduhaduha kag pagkadimatinoohon, sa mga butang nga tama kaathag kag mahapus. {PK 151.2}

Matuud nga Kabangdanan Sang Pagduhaduha

Ayhan malikman mo sila, apang ang matuud gid nga kabangdanan sa pagpangduhaduha kag pagkadi-matinoohon, sa kalabanan nga bagay, amo ang paghigugma sa sala. Ang mga pagtudlo kag ang mga paglaygay sa polong sang Dios dili kahalamut-an sang mga bugalon, mahigugma-on sa sala nga tagiposoon, kag yadtong mga dili maluyag sa pagtuman sang iya mga tulumanon, handa sa pagpangduhaduha sang iya kagamhanan. Agud nga makalambut kita sang kamato-oran, kinahanglan kita sa paghuput sing putli nga handum sa paghibalo sang kamatooran, kag sing paghigugma sa tagiposoon sa pagtuman sa iya. Kag ang tanan nga nagapalapit sa sini nga espiritu sa pagtoon sang Biblia, makakita sing madamu nga mga kasanagan nga sia amo ang polong sang Dios, kag nga makaagum sila sing isa ka paghangup sang iya mga kamatooran nga magahimo sa ila nga maalam nga sa kaluwasan. {PK 152.1}

Si Kristo nagsiling, “Kon sin-o ang buut maghimo sang iya kabubut-on, makahibalo sia sang pagtolon-an, kon nagagikan sa Dios, kon Ako nagahambal sa Akon kaugalingon.” Juan 7:17. Sa baylo sang pagbais kag sang pagkabilar nahanungud sang butang nga dili nimo mahangpan, magatalupangud ikaw sa kapawa nga nagsilak na sa imo, kag magabaton ka sing labi pa nga kapawa. Bangud sang bugay ni Kristo, buhata ang tanan nga katungdanan nga napaathag na sa imo mga inughalangup, kag pagapatakuson ikaw sa paghangup kag sa paghimo sadtong mga butang nga imo ginapangduhaduhaan sa karon. {PK 153.1}

Kasanagan Sang Pinaniiran

May yara nga kasanagan nga nabuksan sa tanan—sa labing mangin-alamon, kag sa mga dili gid makahibalo magbasa—ang kasanagan sang pinaniiran. Ang Dios nagaagda sa aton sa pagtilaw sa aton kaugalingon sang pagkatotoo sang Iya polong, ang kamatooran sang Iya mga saad. Ginatawag Niya kita, “Kinamkinama ninyo kag tan-awon nga maayo si Jehoba.” Salmos 34:8. Sa baylo sang pagsalig sa mga polong sang iban, dapat kita sa pagtilaw sa aton kaugalingon. Nagasiling Sia, “magpangayo kamo, kag magabalaton kamo.” Juan 16:24. Ang Iya mga saad magakalatuman. Wala pa gid sila magpaso; dili sila nga mas-a magpaso. Kag sa nagapalapit kita sa kay Jesus, kag magpangalipay sa kabugosan sang Iya gugma, ang aton mga pagpangduhaduha kag mga kadudulman mawala sa kapawa sang Iya pagtambong. {PK 153.2}

Indi Sugilanon

Ang pinadala nga si Pablo nagasiling nga ang Dios “nagluwas sa aton sa kagamhanan sang mga kadudul-man, kag nagpasaylo sa aton sa ginhari-an sang Iya hinigugma nga Anak.” Kolosas 1:13. Ang tagsatagsa nga nakaliton gikan sa kamatayon pakadto sa

kabuhi sarang “makasaksi sing talandaan nga ang Dios among maminatud-on.” Juan 3:33. Sarang sia makapamatuud, “Nagkinahanglan ako anay sing kabulig, kag nakir-an ko sia sa kay Jesus. Ang tanan nga kakulangan nahatagan, ang kagutum sang akon kalag nabusug; kag sa karon ang Biblia amo ang isa ka bugna sa akon ni Jesukristo. Magapamangkot ikaw kay ngaa nga nagatoo ako sa kay Jesus?—Tungud kay Sia para sa akon amo ang isa ka la-ngitnon nga Manluluwas. Kay ngaa nagatoo ako sa Biblia?—Tungud kay nakit-an nakon sia subung nga tingug sang Dios sa akon kalag.” Ayhan yari sa aton kaugalingon ang pagpamatuud nga ang Biblia matuud, nga si Kristo amo ang Anak sang Dios. Nakahibalo kita nga wala kita nagasunod sa mga sugilanon nga ginpatok sing sampaton gid. {PK 154.1}

Si Pedro naglaygay sa iya mga kauturan nga nagasiling, “magtulubo kamo sa bugay, kag sa pagkilala sa aton Ginoo kag Manluluwas nga si Jesukristo.” 2 Pedro 3:18. Kon ang mga tinawo sang Dios nagatulubo sa bugay, magaagum sila sa gihapon sing maathag nga paghangup sang Iya polong. Makakita sila sing bag-o nga kapawa kag katahum sa iya balaan nga mga kamatooran. Ini manginmatuud sa maragtas sang iglesia sa tanan nga mga panag-on, kag subung man manginmatuud sia tubtub sa katapusan. “Ang banas sang mga matarung subung sang kapawa sang pamanagbanag, nga ang iya kasilaw nagaamat-amat pagdugang, tubtub nga ang adlaw maghimpit.” Hulubaton 4:18. {PK 154.2}

Makatolok Kita sa Kaolehi-an

Bangud sa pagtoo makatolok kita sa kaolehi-an, kag makahakus kita sang saad sang Dios sa pagpatubo sang ihibalo, nga ang gahum nga tawhanon magatingub sa mga gahum nga langitnon, kag ang tanan nga gahum sang kalag pagai-angot sa Tuburan sang kapawa. Makapangalipay kita nga ang tanan nga mga butang nga nagpalibug sa aton nahangungud sang pagkamakagagahum sang Dios paga-ipaathag sa sadtong adlaw; ang mga butang nga maiwat hangpon niyan makakita sing kasaysayan; kag sa diin ang aton panghunahuna nga tawhanon nakakita lamang sing mga kalibug kag kagumon, makita naton ang labing himpit kag matahum nga pagkasinanto. “Kay karon nagatolok kita sing madulum tungud sang isa ka salaming: apang niyan sa guya kag guya: karon nakakilala ako sa bahin, apang niyan pagakilalahon ako subung sang pagkilala man sa akon.” 1 Korinto 13:12. {PK 155.1}

BAHIN 13

ANG PAGPANGALIPAY SA GINOO

ANG mga inanak sang Dios ginatawag nga manungpahayag ni Kristo, nga nagapakita sang mga kaayohan kag kalooy sang Ginoo. Subung nga si Jesus nagpahayag sa aton sang matuud nga kinaugali sang Amay, subung man kinahanglan kita sa pagpahayag kay Kristo sa kalibutan nga wala makahibalo sang Iya malolo kag maloloy-on nga gugma. “Subung nga Imo Ako ginpadala sa kalibutan,” siling ni Jesus, “ginpadala Ko man sila sa kalibutan.” “Ako sa ila, kag Ikaw sa Akon . . . agud nga ang kalibutan magkilala nga Ikaw nagpadala sa Akon.” Juan 17:18, 23. Ang pinadala nga si Pablo nagsiling sa mga gintoton-an ni Jesus, “Hayag nga kamo ang sulat ni Kristo,” “nga ginkilala kag ginbasa sang tanan nga mga tawo.” 2 Korinto 3:3, 2. Sa tagsatagsa sang Iya mga inanak, si Jesus nagpadala sing sulat sa kalibutan. Kon ikaw isa sang mga sumulunod ni Kristo, nagapadala Sia, bangud sa imo, sing isa ka sulat sa panimalay, sa minoro, sa dalan. nga imo ginapuy-an. Si Jesus nga nagapuyo sa imo, nagahandum sa pagpakighambal sa tagiposoon sadtong mga wala pa makakilala sa Iya. Ayhan wala sila nagabasa sang Biblia, okon wala nagapamati sa tingug nga nagahambal sa iya mga pinanid: wala nila makit-i ang gugma sang Dios bangud sa Iya mga binuhatan. Apang kon ikaw amo ang matuud nga manugpahayag ni Jesus, basi pa nga bangud sa imo madala sila sa pagkilala sang mga butang nahanungud sang Iya kaayo, kag madaug sila sa paghigugma kag pag-alagad sa Iya. {PK 157.1}

Ang mga Kristohanon ginabutang subung nga mga manugdala sang kapawa sa dalanon palangit. Kinahanglan sila sa pagpasilak sa kalibutan sang kapawa nga nagasilak sa ila gikan kay Kristo. Ang ila kabuhi kag kinaugali mangin subung sa bagay nga bangud sa ila, ang iban makakuha sing matuud nga paghangup nahanungud kay Kristo kag sang Iya mga buluhaton. {PK 158.1}

Kon ginapahayag naton si Kristo, pagahimoon na-ton ang Iya buluhaton nga makawiwili, subung nga amo sia. Ang mga Kristohanon nga nagatipon sing mga kadulum kag mga kasubu sa ila mga kalag, kag nagakulumud kag nagamululay, nagahatag sa iban sing butig nga pagpahayag nahanungud sa Dios kag sang pagkabuhi nga Kristohanon. Nagahatag sila sing panghunahuna nga ang Dios dili buut nga ang Iya mga inanak magmalipayon, kag sa sini nga bagay, nagahimo sila sing butig nga pagpamatuud batok sa aton Amay nga langiton. {PK 158.2}

Si Satanas Nagakalipay

Si Satanas nagakalipay kon matuytuyan niya ang mga inanak sang Dios sa pagkadimatinoohon kag sa pagkamasinulub-on. Nagakalipay sia sa pagtan-aw sa aton nga dimasinaligon sa Dios, nga nagapangduhaduha nahanungud sang Iya pagkahanda kag gahum sa pagluwas sa aton. Nagakalipay sia nga magbatyag kita nga ang Ginoo nagadaut sa aton bangud sang Iya mga pagbantay. Ang buluhaton ni Satanas amo ang pagpahayag nga ang Dios kulang sing pagkaawa kag paghikalooy. Ginapasayup niya ang pagsaysay sang kamatooran nahanungud sa Iya. Ginapun-an niya ang aton mga

pala-nan-awon sing mga butig nga paghangup nahanungud sa Dios; kag sa baylo sa pagpabilin sa kamatooran sang aton Amay nga langitnon, sa masunsun ginabutang naton ang aton painoino sa butig nga mga pagpahayag ni Satanas, kag wala naton ginapasidunggi ang Dios bangud sa dipagsalig sa Iya kag sa pagkumud batok sa Iya. Si Satanas nagapaninguha sa gihapon sa pagpadulum sang kabuhi nga sa pagtoloohan. Ginahandum niya nga magpakita sia subung nga malisud kag mabudlay; kag kon ang Kristohanon magpahayag sang iya kaugalingon nga kabuhi sa sini nga bagay sang pagtoloohan, sia amo, bangud sang iya pagkadimatinoohon, ang nagaduha sang kabutigan ni Satanas. {PK 158.3}

Toloka ang Bulak

Madamu sang nagapanlakatan sa dalanon sang ka-buhi ang nagamulalong sang ila mga kasal-anan kag mga kasaypanan kag mga kasulub-an. Sang didto ako sa Europa ang isa ka utud nga babae nga naghimo sini kag nga yara sa daku nga kasakit nagsulat sa akon, nga nagapangayo sing pila lamang ka mga polong sa pagpabaskug. Sa madason nga gab-i sa tapus nakon mabasa ang iya sulat nagdamgo ako nga yadto ako sa sulud sang isa ka katamnan, kag ang isa nga daw sa tag-iya sang katamnan amo ang nagtuytuy sa akon sa iya mga banas. Nagapamopo ako sang mga bulak kag nagapangalipay sa ila kahamut, kag ining utud nga babae, nga nagbuylog sa akon luyo, nagpatalupangud sa akon nahanungud sang malaw-ay nga mga tunok nga nagabalag sa iya alagyan. Didto nagakumud sia kag nagapangalisud. Wala sia nagaagi sa alagyan, nga nagasunod sa tuytuy, kondi nga nagalakat sia sa tunga sang sapinit kag mga tunok. “Oh” ang panganduhoy niya, “Kanugon nga ining matahum nga katamnan ginadautan sining mga tunok, indi bala? Niyan ang tuytuy nagsiling, “Pabayai lamang ang mga tunok, kay magasuyak lamang sila sa imo. Pamopo-a lamang ang mga rosal; lirio kag ang mga klabel.” {PK 159.1}

Wala bala sing masanag nga duug sa inyo experiensia? Wala bala kamo makaagum sang hamili nga mga ti-on nga ang inyo mga tagiposoon nagpitik sa daku nga kalipay sa pagsabat sa Espiritu sang Dios? Kon pagbasahon ninyo ang mga sinulat nahanungud sang inyo mga gin-agihan sa inyo kabuhi, wala bala kamo sing makita nga mga maanyag nga mga pinanid? Indi bala ang mga saad sang Dios kaangay sang mga maamyon nga mga bulak nga nagatulubo sa higad sang inyo mga dalanon? Dili bala ninyo pagtugutan ang iya mga katahum kag katam-is sa pagpuno sang inyo mga tagiposoon sing kalipay? {PK 160.1}

Pakiana

Ang mga sapinit kag mga tunok magapilas kag magapasubu lamang sa inyo; kag kon inyo pagtiponon ini nga mga butang, kag igpahayag sila sa iban, wala bala kamo, luwas sa pagpakubus sang pagkaayo sang Dios sa inyo kaugalingon, nagapugung sa sadtong sa palibut ninyo sa paglakat sa dalan sang kabuhi? {PK 160.2}

Indi maayo ang pagtipon sang tanan nga mga malain nga mga butang nga aton gin-agihan sa mga nagliligad nga mga adlaw sa aton kabuhi—ang iya kalautan kag kasulub-an—sa paghambal nahanungud sa ila, kag sa pagpangalisud tubtub nga mapunaw kita sa kasubu. Ang nasub-an nga kalag puno sang mga kadudulman, nga nagatakup sang

kapawa sang Dios gikan sa iya kalag, kag magahatag sing landong sa dalanon sang iban. {PK 160.3}

Magpasalamat kita sa Dios tungud sang masanag nga mga palananawon nga Iya ginpahayag sa aton. Pagatingubon naton ang tanan nga mga bulahan nga mga pagpasalig nahanungud sang Iya gugma, agud nga magatan-aw kita sa ila sa walay langan. Ang Anak sang Dios nga nagbiya sang lingkoran nga harianon sang Iya Amay, nga nasaputan sing dutan-on ang Iya pagkalangitnon, agud nga sarang Sia makaluwas sang tawo gikan sa gahum ni Satanas; ang Iya pagdaug nga sa kaayohan naton, nga nagabukas sang langit sa tawo, nga nagapahayag sa tawhanon nga palanan-awon sang hulut nga sa diin ang Dios nagapahayag sang Iya himaya; ang nahulog nga katawohan nga ginbatak gikan sa kaidadalman sa diin ginhulog sia sang sala, kag gindala liwat sa pagpakig-angot sa walay katubtuban nga Dios, kag sa tapus naantus ang langitnon nga pagtilaw bangud sa pagtoo sa aton Manunubus, ginpasaputan sang katarungan ni Kristo, kag ginpakataas sa Iya lingkoran nga harianon—ini amo ang talan-awon nga buut sang Dios nga pagpamalandongon naton. {PK 161.1}

Nagapasubu sa Dios

Kon daw nagaduhaduha kita nahanugnud sang gug ma sang Dios, kag wala kita sing pagsalig sa Iya mga saad, wala naton Sia ginapasidunggi kag ginapasubu-an naton ang Iya Espiritu Santo. Daw ano ang pagbatyag sang isa ka iloy kon ang iya kabataan nagakumud sa gihapon sa iya, subung abi nga ginahimoan sila sing malain, bisan nga ang iya bug-os nga pagpanikasug sa iya kabuhi amo ang paghatag sa ila sing kaayohan kag sing kalipay? Pananglitan magpangduhaduha sila nahanungud sang iya gugma; magagisi ini sang iya tagiposoon. Daw ano nga pagabatyagon sang mga ginikanan kon pagkabigon sila sang ila mga anak sing subung sini? Kag daw ano man ang pagkabig sang aton Amay nga langitnon kon magdimasinaligon kita nahanungud sang Iya gugma, nga amo ang nagsogo sa Iya sa paghatag sang Iya bugtong nga Anak agud nga makaagum kita sing kabuhi? Ang pinadala nagasulat: “Ang bisan sa Iya kaugalingon nga Anak wala magpatawad, kondi gintugyan Niya Sia bangud sa aton nga tanan, paano bala nga indi maghatag man sa aton sa walay bili kaupud Niya sang tanan nga mga butang?” Roma 8:32. Apang pila nga bangud sang ila buhat, kon indi bangud sa ila mga polong, ang nagasiling, “Ang Dios wala nagapatungud sini sa akon. Ayhan nagahigugma Sia sa iban, apang wala Sia nagahigugma sa akon.” {PK 161.2}

Ini Nagadaut Sang Kalag

Tanan ini nagadaut lamang sang imo kaugalingon nga kalag; kay ang tagsa ka polong sang pagduhaduha nga imo ginamitlang magagda sang mga pagsulay ni Satanas; ini nagapabaskug sa imo sa imo katuyu-an sa pagpanduhaduha kag ginapapahilayo nimo gikan sa imo ang mga manugbantay nga mga manugtunda. Kon si Satanas magsulay sa imo dili ka magmitlang sing mga polong sa pagpangduhaduha okon pagpangalisud. Kon magpili ikaw sa pagbukas sang gawang sa iya mga pagsulay, ang imo painoino mapunan sing pagkadimasinaligon kag sing mabinatukon nga mga pakiana. Kon maghambal ka sang imo ginabatyag, ang tanan nga mga pagpangduhaduha nga imo ginpahayag indi lamang manag-uli sa imo kaugalingon, kondi nga amo sia ang isa ka binhi nga magatubo

kag magabunga sa kabuhi sang iban, kag maiwat na ang pagsagang sang gahum sang imo mga polong. Ikaw, sa imo kaugalingon ayhan sarang makaluwas gikan sa mga pagsulay kag gikan sa siod ni Satanas, apang ang iban, nga ginhapay sang imo gahum, indi na sarang makapalagyo gikan sa pagkadimatinoohon nga imo ginpahayag. Daw ano ka importante nga maghambal lamang kita sang mga butang nga makahatag sing espirituhanon nga kabaskug kag kabuhi! {PK 162.1}

Mga Manugtunda Nagapamati

Ang mga manugtunda nagadungug sa pagpamati kon ano nga klase sang sugid ang imo ginadala sa kalibutan nahanungud sang imo Agalon nga langitnon. Magsugilanon kamo sa Iya Sia nga nagakabuhi sa paghimo sing pagpakilooy tungud sa inyo sa atubangan sang Amay. Kon magkamusta kamo sa inyo abyan, pagowa ang mga pagdayaw sa Dios sa inyo mga bibig kag tagiposoon. Ini amo ang magapawili sang iya painolno kay Jesus. {PK 163.1}

Ang tanan may mga pagtilaw; mga kasubu nga daw halus madala, mga pagsulay nga maiwat sumpongon. Dili pagisugid ang imo mga kagamu sa imo masigkamakasasala, kondi nga pagdalhon nimo ang tanan nga mga butang sa Dios sa pangamuyo. Himo-a nga isa ka pagsolondan nga dili gid magmitlang sing bisan isa ka taga sang pagpangduhaduha okon kaluyahon. Daku ang imo masarangan sa pagpasanag sang kabuhi sang iban kag sa pagpabaskug sang ila mga pagpaninguha. Bangud sang mga polong sang paglaum kag balaan nga paglipay. {PK 163.2}

May madamu nga mga kalag nga maisug nga ginaipit sing tama sang mga pagtilaw, nga daw halus na mapunaw sa ila pagpakig-away batok sa kagamhanan sang kalaut. Dili pagpaluyaha ang mga tagsubung sa ila mabudlay nga mga pagpakig-away. Lipaya sila sang mga maisug kag may paglaum nga mga polong nga magapabaskug sa ila sa ila mga dalanon. Sa amo nga bagay ang kapawa ni Kristo magasilak gikan sa imo. “Kay walay bisan sin-o sa aton nga nagakabuhi nga sa iya.” Roma 14:7. Bangud sang aton dihungud nga pagginawi ang iban sarang mapaluya kag mapabaskug, okon mapaluya kag mapabiya gikan kay Kristo kag sa kamatooran. {PK 164.1}

Sayup nga Paghangup

Madamu ang nagahuluput sing sayup nga pagha-ngup nahanungud sang kabuhi kag sang kinaugali ni Kristo. Nagapanghunahuna sila nga indi Sia mahirup kag malipayon, nga Sia delikado, estrikto, kag dimasinadihon. Sa makadamu ang bug-os nga pagkabuhi nga Kristohanon ginapahayag sa idalum sining madulum nga palanan-awon. {PK 164.2}

Sa masunsun ginasiling nga si Jesus naghibi, apang wala gid mahibalo-i nga nagkadlaw Sia. Ang aton Manluluwas sa pagkamatuud isa ka lalaki sang mga kasakit kag nakakilala sang mga kasubu, tungud kay ginbuksan Niya ang Iya tagiposoon sa tanan nga mga pagkakailo sang mga tawo. Apang bisan nga ang Iya kabuhi amo ang isa nga nagadumili sang kaugalingon kag na pun-an sing mga kasakit kag mga kahul-anan, ang Iya espiritu wala paglapyo-a. Ang Iya guya wala magpakita sing mga pagkasubu kag pagkapait, kondi nga malinong nga puno sing paghidaet kag malipayon. Ang Iya tagiposoon nangintuburan sang tubig nga nagatubud nga sa kabuhi nga walay katapusan; kag sa bisan diin lamang Sia kumadto, nagadala Sia sing pagpahuway kag paghidaet, kalipay

kag kasadya. {PK 164.3}

Huwaran ni Kristo

Ang aton Manluluwas maligdong kag hanoot, apang dili nga walay paglaum okon masingki. Ang kabuhi sang tanan nga nagasunod sa Iya pagapun-an sang mga hanoot nga katuyu-an; magahuput sing madalum nga pagtalupangud nahanungud sang tawohanon nga salabton. Ang paglinangolango pagabayaan; kag wala sing mga pagsininggit nga pagpangalipay, kag wala sing binastos nga paglinahoglahog kondi ang pagtolooan ni Jesus magahatag sing paghidaet subung sang isa ka suba. Wala sia nagapalong sang kapawa sang kalipay; wala nagadumili sang pagkamasinadiahon, okon nagapasubu sang manayanaya kag nagayuhumyuhum nga nawung. Si Kristo wala magkari agud nga pag-alagaron, kondi nga sa pag-alagad; kag kon ang Iya gugma maggahum sa tagiposoon, magasunod kita sang Iya huwaran. {PK 165.1}

Kon pagahuptan naton sa gihapon sa aton mga pa-inoino ang dili maayo kag dili matarung nga buhat sang iban, makita naton nga daw dili mahimo ang paghigugma sa ila subung sang paghigugma ni Kristo sa aton; apang kon ang aton panghunahuna nagapuyo sa makatilingala nga gugma kag kalooy ni Kristo ang amo man nga espiritu magailig sa iban. Kinahanglan kita maghigugmaanay kag magtinahuray ang isa kag isa, walay sapayan sang mga sayup kag pagkadihimpit sang iban nga indi naton malikawan ang pagtalupangud. Ang pagpa-ubus kag ang pagkadimasinaligon sa aton kaugalingon amo ang takus nga paghanason, kag ang pagpailub sa mga sayup sang iban. Ini magalaglag sang tanan nga bagay sang pagkamaiyaiyahon, kag magahimo sa aton nga mainalwanon sa tagiposoon kag mahinatagon. {PK 165.2}

Dili Ka Maghimud-os

Ang Manluluwas nagsiling, “Magsalig ka kay Jehoba, kag maghimo ka sing maayo: sa nagakabuhi ka sa duta, sa may katutum pakan-on ikaw.” Salmos 37:3. “Magsalig ka kay Jehoba.” Ang tagsa ka adlaw nagadala sang iya mga lulan, mga paghimud-os kag mga kalisang kag kon ini sila masumalang naton, daw ano kita kaabtik sa paghambal nahanungud sang aton mga kaiwatan kag mga pagtilaw. May madamu nga mga kagamu nga nagsamput, may madamu nga mga kahadluk nga ginahuptan, ang tagsubung ka bug-at nga lulan ginapahayag sa bagay nga ang iban ayhan magahunahuna nga wala kita sing maloloy-on kag mahigugmaon nga Manluluwas, nga handa sa pagpamati sang tanan nga aton pangabay, kag nga isa ka kabulig naton nga sarang makita sa tagsa ka ti-on sang kinahanglan. {PK 166.1}

Ang iban nagakahadluk sa gihapon kag nagapanghulam sing kagamu. Sa tanan nga adlaw ginalikupan sila sang tandaan sang gugma sang Dios; sa tanan nga adlaw nagapangalipay sila sa kabuganaan sang Iya pagtatap apang ginakalimutan nila ini nga mga pagpakamaayo. Ang ila painoino nagapuyo sa gihapon sa mga butang nga malain nga ginakahadlukan nila nga magaabut; okon nga ang iban nga mga kagamu nga ayhan matuud ara, nga bisan mga diutay, nagapadulum sang ila mga mata sa madamu nga mga butang nga nagakinahanglan sang pagpasalamat. Ang mga kaiwatan nga ila masugata, sa baylo nga magatuytuy sa ila sa Dios, nga amo lamang ang tuburan sang ila kabulig, magapapahamulag sa ila sa Iya, tungud kay nagapukaw sila sing mga kagamu kag mga

pagpangalisud. {PK 166.2}

Manginmaayo bala sa aton ang pagkadimatinoohon? Kay ngaa nga dili kita mapinasalamaton kag masinaligon? Si Jesus amo ang aton abyan; ang bug-os nga langit may kabalaka nahanungud sang aton kaayohan. Dili naton pagtugutan ang mga kalisang kag ang mga paghimud-os sa matag-adlaw nga pangabuhi sa pagpagamu sang painoino kag sa pagpasubu sang nawung. Kon paghimoon naton ini dili madula sa gihapon ang mga butang nga magapagamu sa aton. Dili kita magpadayon sa pagpangita sang butang nga nagapastidyar kag nagapaas-as lamang sa aton, kag wala nagabulig sa aton sa pagbatas sang mga pagtilaw. {PK 167.1}

Ginapalibug Ka?

Ayhan ginapalibug ikaw sa imo mga buluhaton; ang imo palaabuton ayhan nagaamat-amat dulum sa kada adlaw, kag ayhan ginapahadluk ikaw sang mga kapierdehan; apang dili ka magpakaluya; itugyan ang imo mga paghimud-os sa Dios, kag magpakalinong kag magmalipayon. Magpangamuyo ka nga hatagan ikaw sing kaalam sa pagdumala sang imo mga buluhaton sing mainalamon, kag sa amo nga bagay malikaw ikaw gikan sa kapierdehan kag kalaglagaan. Buhata ang imo bug-os nga masarangan sa pagpauswag. Si Jesus nagsaad sa paghatag sang Iya pagbulig, apang dapat nga pagbuylogan sia sang aton mga pagpaninguha. Kon magsalig kita sa aton Kabulig, kinahanglan kita sa paghimo sang aton bug-os nga masarangan, kag pagabatonon naton ang patubas sing malipayon. {PK 167.2}

Indi kabubut-on sang Dios nga ang Iya mga tinawo malulanan sing mga paghimud-os. Apang ang aton Ginoo wala magadaya sa aton. Wala Sia nagasiling sa aton, “Dili ka magkahadluk; wala sing mga katalagman sa imo dalanon.” Nakahibalo Sia nga may yara nga mga pagtilaw kag mga katalagman, kag ginpahibalo Niya sa aton ini sing maathag. Dili Niya tuyo ang pagkuha sang Iya mga tinawo gikan sa kalibutan sang sala kag kalautan, kondi nga ginatudlo Niya sila sa maligon nga dalangpan. Ang Iya pangamuyo tungud sa Iya mga gintoton-an amo, “Ako wala nagaampo, nga pagkuhaon Mo sila sa kalibutan, kondi nga Imo sila pagbantayan sa kalaut.” “Sa kalibutan,” siling Niya, “kamo may kangitngitan, apang magsalalig kamo; nadaug Ko ang kalibutan.” Juan 17:15; 16:33. {PK 168.1}

Leksyon Gikan sa Tinuga

Sang Iya pagwali sa bukid, si Kristo nagtudlo sa Iya mga gintoton-an sang hamili nga mga leksyon nahanungud sang pagkakinahanglan sang pagsalig sa Dios. Ini nga mga leksyon ginhatag agud nga sa pagpabaskug sang mga inanak sang Dios sa tanan nga mga katuigan kag naglambut sila tubtub sa aton kaadlawan nga napun-an sing mga pagtudlo kag paglipay. Gintudlo sang Manluluwas ang Iya mga gintoton-an sa mga kapispisan sa kalangitan sa ila mga paghilingyaw sa daku nga pagdayaw, nga wala makakilala sang ginatawag nga paghimud-os, tungud kay “wala sila magasab-ug bisan magaan.” Apang ang Daku nga Amay nagahatag sa ila sang ila mga kinahanglan. Ang Manluluwas nagpamangkot, “Dili bala kamo labi pa sa ila?” Mateo 6: 26. Ang Daku nga Manughatag sa tawo kag sa mga kasapatan nagahumlad sang Iya mga kamut kag nagasagud sang tanan Niya nga mga tinuga. Ang mga kapispisan sa kalangitan wala Niya ginakalimuti.

Wala Niya pag-itugon ang mga kalan-on sa ila mga tuktuk kondi nga nagaaman Sia nga sa ila mga kinahanglanon. Kinahanglan sila sa pagtipon sang mga tuluk-on nga Iya ginsab-ug nga sa ila. Kinahanglan sila sa pag-aman sang mga galamiton nga sa ila magagmay nga mga pugad. Kinahanglan sila sa pagtugon sang ila mga buto. Nagapakadto sila sa ila mga buluhaton nga nagakinanta, tungud kay “ginapaka-on sila sang inyo Amay nga langitnon.” Kag “dili bala kamo labi pa sa ila?” Dili bala kamo, nga mga mahibalo-anon nga mga sumilimba nga espirituhanon, labi pa sang sa mga kapispisan sang kalangitan? Dili bala ang Tagiya sang aton pagkaamo, ang Manugbantay sang aton kabuhi, ang Isa nga naghuman sa aton sa Iya kaugalingon nga larawan, maghatag sang aton mga kinahanglanon kon lamang magsalig kita sa Iya? {PK 168.2}

Mga Bulak

Gintudlo ni Kristo ang Iya mga gintoton-an sa mga kabulakan sang latagon, nga nagatulubu sing malambu, kag nagasilak sa ila himaya nga ginhatag sa ila sang Amay nga langitnon, subung nga isa Niya ka pagpahayag sang Iya gugma sa tawo. Nagsiling Sia, “Talupangda ninyo ang mga lirio sa latagon, daw anong pagtubo nila.” Ang katahum kag ang pagkascensilyo sining buhi nga bulak nagalabaw pa sa bug-os nga kahimayaan ni Solomon. Ang labing mahimayaon nga panapton nga sarang mahimo sang kaalam nga tawohanon dili makaangay sa kinaugali nga bugay kag himaya sang mga kabulakan nga tinuga sang Dios. Si Jesus nagpamangkot, “kon ang hilamon sa latagon nga karon ara, kag buas igadap-ung sa dapog, ginasaputan sang Dios, indi magasaput Sia sing labi pa sa inyo, nga mga diutay sing pagtoo?” Mateo 6:28, 30. Kon ang Dios, ang la-ngitnon nga manugpuni, nagahatag sa mga bulak, nga sa karon ara pa kag buas wala na. sing matahum kag nanglainlain nga mga du-ag, daw ano pa gid ang Iya pagtatap sa sadtong gintuga Niya sa Iya kaugalingon nga himaya? Ini nga leksyon nga ginhatag ni Kristo amo ang isa ka pagsabdong sa mahimud-osen nga hunahuna, sa kalisang kag sa mga pagpangduhaduha sang tagiposoon nga wala sing pagtoo. {PK 169.1}

Ang Buut Sang Dios

Buut ang Ginoo nga ang tanan Niya nga mga ina nak, lalaki kag babae, magmalipayon, puno sing paghidaet kag matinumanon. Si Jesus nagasiling, “ang Akon paghidaet ginahatag Ko sa inyo; indi Ko ighatag sa inyo, siling sang paghatag sang kalibutan. Dili magkalisang ang inyo tagiposoon, kag indi man magmatalaw.” “Ako nagasiling sa inyo sini nga mga butang, agud nga ang Akon kalipay magpabilin sa inyo, kag ang inyo kalipay maghimpit.” Juan 14:27; 15:11. {PK 170.1}

Ang kalipayan nga ginapangita gikan sa mga maiyaiyahon nga mga tinutuyo, luwas sa dalan sang katungdanan, dili natimbang sing maayo, dimapinadayonon, kag umalagi; madula sia kag ang kalag mapun-an sing kapung-aw kag kasakit; apang may yara nga kalipay kag pagkakontento sa buluhaton sang Dios; ang mga Kristohanon dili ginapabayaan nga magalakat sa walay kalig-onan nga mga dalan; wala sila ginapabay-i sa mga kasakit nga walay pulus kag mga kasulub-an. Bisan kon wala kita sing mga kalipayan sa sini nga kinabuhi, sarang kita sa gihapon makapangalipay bangud sa

paglantaw sa isa ka kinabuhi nga palaabuton. {PK 170.2}

Sa Sini nga Kinabuhi

Apang bisan diri sini, ang mga Kristohanon sarang makaagum sing kalipayan bangud sa pagpakighambal sa kay Kristo; sarang sila makaagum sing kapawa sang Iya gugma, kag sing walay katubtuban nga kalipay gikan sa Iya mga pagtambong. Ang tagsa ka tikang sa pagkabuhi magapapalapit sa aton sa tiilan ni Jesus, magahatag sa aton sing madalum nga pinaniiran nahanunungud sang Iya gugma, kag magadala sa aton sing isa ka tikang nayon sa bulahan nga puluy-an sang paghidaet. Niyan dili naton pag-isikway ang aton mga paglaum, kondi nga magsalig kita sing malig-on, nga labing malig-on pa sang sa una. “Tubtub diri ginbuligan kami ni Jehoba” (1 Samuel 7:12). kag magabulig Sia sa aton tubtub sa katapusan. Magtolok kita sa mga haligi sang handumanan nga nagapahanumdum sang mga ginhimo sang Ginoo agud sa paglipay sa aton kag sa pagluwas sa aton gikan sa mga kamut sang manuglaglag. Paghuptan naton sing lab-as sa aton mga panghunahuna ang tanan nga mga kalooy nga ginpakita sang Dios sa aton—ang mga luha nga Iya ginpahiran, ang mga kasakitan nga Iya ginpauntat, ang mga paghimud-os nga Iya ginkuha, ang mga kahadluk nga Iya gintabug, ang mga kinawad-on nga iya ginsakdag, ang mga pagpakamaayo nga Iya ginhatag—nga nagapabaskug sa aton tungud sa tanan nga aton ginaatubang sa bug-os nga dalanon nga nabilin pa sa aton mga pagpanlakatan. {PK 171.1}

Wala kita sing mahimo, kondi ang pag-atubang sang bag-o nga mga kahimtangan nga makalilisang sa palaabuton nga pagpakig-away, apang maglantaw kita sa mga nagliligad kag subung man sa palaabuton, kag magsiling, “Tubtub diri ginbuligan kami ni Jehoba.” “Ang imo kalinong magadugay subung sang imo Kaadlawan.” Deuteronomio 33:25. Ang mga pagtilaw dili maglabi sa kusug nga pagaihatag sa aton sa pagdala sa iya. Niyan pagahimoon naton ang aton buluhaton sa bisan diin naton sia makita, nga nagatoo nga bisan ano nga butang ang mahanabu, ang kusug nga nagakabagay sa mga pagtilaw pagaihatag. {PK 172.1}

Mga Gawang Magabukas

Kag sa dili madugay ang mga gawang sang kalangitan magabukas sa pagpasulud sang mga inanak sang Dios, kag gikan sa mga bibig sang Hari sang kahimayaan ang pagpakamaayo mabati-an nila sang ila mga idulungug kasubung sang isa ka matahum nga musika, “Kalari kamo, mga pinapakamaayo sang Akon Amay, panubli-a ninyo ang ginhari-an, nga gin-aman sa inyo kutub pa sang pagtukud sang kalibutan.” Mateo 25:34. {PK 172.2}

Niyan ang mga tinubus pagapasudlon sa puluy-an nga gin-aman ni Jesus sa ila. Didto ang ila mga kaupdanan dili na amo ang mga mahigko sang duta, mga butigon, makidiosdioson, ang mga diputli, ang mga dimatinoohon; kondi nga magapakig-upud sila sa sadtong mga nagdala-ug kay Satanang, kag nga bangud sang langitnon nga bugay nakahuput sing putli nga mga pagginawi. Ang tanan nga mga balatyagon nga malaut, ang tanan nga pagkadihimpit, nga nagasakit sa ila din. nakuha na tanan bangud sang dugo ni Kristo, kag ang pagkahalangdon kag ang kasilaw sang Iya himaya nga labi pa sang sa kapawa sang adlaw, pagaihatag sa ila. Kag ang katahum sang pagginawi, ang

kahimpit sang Iya kinaugali, magasilak sa ila, nga labi pa sang pagsilak sining sa gowa nga pagkahalangdon. Wala sila sing dagta sa atubangan sang daku kag putli nga lingkoran nga harianon, nga nagapakig-ambit sang kadungganon kag mga kahigayonan sang mga manugtunda. {PK 172.3}

Tungud sining mahimayaon nga panubli-on nga manginiya, “ano ang ikahatag sang isa ka tawo nga baylo sang iya kalag?” Mateo 16:26. Ayhan imol sia apang bisan pa nagaagum sia sa iya kaugalingon sing isa ka manggad kag kadungganon nga dili sarang mahatag sang kalibutan. Ang kalag nga tinubus kag tininlo-an gikan sa sala, kaupud sang tanan nga mga dungganon nga gahum nga natugyan sa buluhaton sang Dios, dili maisip ang iya kabilihanon; kag may daku nga kalipay sa langit sa atubangan sang Dios kag sang balaan nga mga manugtunda bangud sang isa ka kalag nga maluwas, isa ka kalipay nga ginapahayag sa mga alambahanon sang balaan nga pagdaug. {PK 173.1}